

Hechos

Jesús tojanašebuachená chë Uámana Espíritu jíchmuama

¹ Teófilo, atšbe natsana librěšaňe tcbonjuábobema lempe ntšamo Jesús tojanmama y tojánabuatambama, chca tojanbojatsě orscana, ² y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěftsanaměndá, chë Uámana Espíritbiajana, ndayá jamama yojánamnama. ³ Jesús cruciňe tojanóbana y tojtanayenentšana, ba soye chë ichmóněnga yojáneběbuacana, chca, chěnga jinŷanŷiyama cha ndegombre tojtanayenama. Canta bnětsana tentscuana cha yojáneběbuacana y Běngbe Bětsabe aměndayama chěnga yojanabuatambá.

⁴ Canŷe, Jesús chabe ichmóněngaftaca yojětsemna ora, měntšá tojanaměndá: —Jerusalenentšana ndoňe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaóshjanguěntscuana, ndayama atše tcbonjáuyana.

⁵ Ndegombre, Juan entšanga bėjayeca tonjaněbaye; pero ndoňe baytesna, Běngbe Bětsá chë Uámana Espíritu bochanjíchmuá, tšěngaftangbe ainaniňe jtsemándayama cháuamashěnguama ca.

Jesús celoye tojtantsjuá

⁶ Canŷe, chë ichmóněnga Jesúseftaca cánŷiňe imojtsemna ora, chěnga tmojantjá: —¿César y chë Romoquěngbe aměndayentšana tašcochjatsebacá, y

mora bēnga, Israeloca entšanga, canye Rey quemochtsatsbomna ca?

⁷ As Jesús tojaněyana: —Tšēngaftanga ndoñe quecmátamna chē soyēngama jtsetatšēmbuana. Nye atšbe Taitá aĩne; y cha, chabe obenánaca echanjamánda mocna ora y ndayté chca chaopasama. ⁸ Chē Uámana Espíritu tšēngaftangbe ainaniñe jtsemándayama chaojabo ora, tšēngaftanga obenana šmochanjóyēngacñe. Chentšana, ntšamo atšbiana šmotatšēmbcá, chē tcbonjabuatambá soyēnga, entšanga šmochjáuyana Jerusalenentše, nyets Judea luariñe, Samarioca y quem luarentša nyets luarēnguenáchnaca ca.

⁹ Chē soyēnga tojánayanentšana y chabe uatsjéndayēnga imojtsonyaye ora, Bēngbe Bětsá, Jesúsbioye tbojtanatsbaná y canye jantšetše chábioye ibojútsbotse y ndoñe más tmonjanobená cha jinỹama. ¹⁰ Jesús celoye yojtsetsjuama chēnga bēn imojtserreparánēntscuana, nye ndeolpe, uta boyabásata uafjantse entšayaca bopormánata chēngbe juachaca tbojabántsaye, ¹¹ y chēngbioye tmojaněyana: “Galileoca entšanga, ¿ndáyeca celoye šmojtsantješana? Jesús, chē tšēngaftangaftaca enjamná celoye tontá y ntšamo mora šmonjinỹcá cha celoye jtama, cachcá quem luaroye cha echanjésabo ca.”

Júdasbe cuenta Matías tmojanábuayana

¹² Jesusbe ichmónēnga chē Olivos tjashocana Jerusalenoye tmojtaná. Chē tjocana Jerusalenóntscoñna bécoñe inamna, ndayēntscoca canye ochnayté jama yojanlesenciana nyetsá.

13 Jerusalenoye tmojtánashjajna orna, chë yebnentša tsbanánoca tsoye tmojtánásëngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiñá, Simón chë Celote ca uabobainá, y Judas, chë Santiagbe uaquiñá. 14 Chënga sempre imojanamana jtenefjnana Bëngbe Bëtsáftaca jencuéntama básefta shembásengaftaca, María Jesusbe mamá y Jesusbe catsátangaftaca.

15 Chë tempo tmojánenefjna canye patse y uta bnëtsana Jesucristbeñe ošbuáchiyënga, y canye, Pedro tojantsá y tojanéyana: 16 “Jesucristbeyeca atšbe catsátanga, endánëyta ntšamo Bëngbe Bëtsabe uabemana palabrënguiñe iuabemancá chaochnënguama, y tempo, David chë Uámana Espíritbeyeca chiñe tojanábema ntšamo Júdashftaca yochjanopásama; chcasna, Judas uayayënga tojanënatse Jesús chamuishachama. 17 Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuiñe jtsoservénama. 18 Tsëngaftanga šmondëtatšëmbo, chë Judas bacna soye tojanmama tmojtánabuená crocénánacna fshantse tmojánbuamema. Chentšana cha tojtsanótsatše y chabe bestšaše tsëntsaca tbojtsanashtëtšena y chabe uafsbentšana nýetsca chabe chunchullëjuangá tojtsanáshana. 19 Jerusalenentše oyenënga chë soyama tmojántatšëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’. 20 Salmos librëšañe, Jesucristo uayayëngbe cucuatšinë boshjuanabiamama mëntsá enduábemana:

Chabe yebna énañe chaotsemna

y ndocná chentše chaondëtsiyena ca.

Y mëntsánaca endayana:

Chabe cuenta inÿa chabe trabajo chaoma ca.

²¹ “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana, ²² Juan Jesúsbioye tbonjanabaye orscana y Bëngbe Bëtsá Jesúsbioye bëngbentsana celaye tbontanatsbanantscuana. Y mora šontsamna canÿa mënguentsá juabuáyanama, Jesús tojtanayenama entšángbioye bëngaftaca jábuayenama ca.”

²³ As chora útata tmojanabocacá: José, nda Barsabás ca imojanábobuatma y ínÿengna Justo ca; y chentšana Matías. ²⁴ Chora Bëngbe Bëtsáftaca mëntsá tmojanencuentá: “Bëngbe Utabná, aca nÿetscangbe ainana icuabuatma; chcasna, šminÿanÿé nda quem útatentsana cochjuábuayanana, ²⁵ canÿe ichmonacá Júdasbe cuenta chaotrabajama. Judas ya ndoñe canÿe ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

²⁶ Y nda chë ichmoná yochtsemnama jtso-tatsëmbuamna tsbanánoye tmojanëtsena y Matías tbojanobuache; as cach orscana, Jesucristbeñe ošbuáchiyënga chabiamna imojanjuabná mo canÿe Jesusbe ustonacá, cachcá ntšamo chë bnëtsana canÿe uatsjëndayëngbiamna chënga imojanjuabnacá.

2

Chë Uámana Espíritu ošbuachiyëngbeñe tojánamashëngo

¹ Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nÿetscanga cánÿiñe canÿe luarentše imojtsemna. ² Ndeolpe, celocana mo canÿe jabuache binÿiécá yojtsaishauenana y chca, tša jabuache shauenanana tojanóshjango nÿets yebnentše, chënga imojtsetbiámanentše. ³ Y chora bichtajënga mo iñeshcá yojónÿna y canÿánÿabeñe yojojátaye. ⁴ Chca chë Uámana Espíritu tojánamashëngo chëngbe ainaniñe jtsemándayama; chora nÿetscanga tmojanontsé inÿetšá biyangana, chënga tempo ndmabiyañe, ntšamo chë Uámana Espíritu yojtsamcá chënga inÿetšá chamotsebiyama.

⁵ Chë tempo Jerusalenentše imojtsemna ba judiënga, Bëngbe Bëtsá puerte adórayënga, nÿets luarëngocana áshjajnënga; chënga tmojánabo Bëngbe Bëtsá jëtschuayama. ⁶ Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsopasánama, er chë inÿe luarocana áshjajnënga imojtsuenana chë Jesucristbeñe ošbuáchiyënga inÿetšá biyangana jtsóyebuambnayana, ntšamo cada ona chënga imojanbiyacá. ⁷ Chë soyëngama entšanga puerte imojenjaná y mëntšá imojtsenatsëtsnaye: “Chë chca montsóyebuambnanga Galileoquënga mondmëna. ⁸ Chcase, ¿ntšámoyeca bënga imojtsobena chënga joyaunayana cach bënga mondëbiyacá

ca? ⁹ Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëgnaca, ¹⁰ Frigioquënga, Panfilia, Egiptó y Libia, chë Cirene béconana luaroquënga. Báseftangna Romoquënga montsemna; ¹¹ chëngbeñe nderado judiënga camuentše onÿnánënga, pero ínÿengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inÿengna Cretocana y Arabiocánënaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entsanga imojtsichamo.

¹² Chë causa nÿetscanga imojtsenjanaye y ntšamo jtsejuabnayama ntsetatsëmbcá imojtsemna y imojtsentjanaye: “¿Ndayá chë soye yojtsayana ca?”

¹³ Pero ínÿengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

Ntšamo Pedro chora tojanoyebuambá

¹⁴ Chentšana, Pedro tojantsá chë inÿe bnëtsana canÿe ichmónëngaftaca y jabuache tojanontsé chë entsanga jáuyanana, mëntšá: “Atšbe entsanga judiënga y nÿetscanga Jerusalenentše oyenënga, tšabá šmochjouena. Ntšamo tojopasama cbochanjábuaenaye, as chacmésertama.

¹⁵ Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe. ¹⁶ Pero ntšamo

entsopasánamna, Bëngbe Bëtsabe juabna oyebuambnayá Joel mëntśá tojanábema:

17 Bëngbe Bëtsá mëntśá tojánayana: ‘Quem luare jopochócama te chaojtsobeco ora, chë soyënga echanjochnëngo.

Atşe chanjama, atşbe Espíritu nÿetscangbe ainaniñe cháumashënguama.

Chentşana, tşëngaftangbe uaquiñënga y bemianga atşbe soyëngama entşanga mochantşetsëtsnaye;

tşëngaftangbe bobontşëngna, atşe chanjama soyënga mochantşonÿaye mo otjenay-oquécá;

y tşëngaftangbe bëtsëjëmëngna atşbe soyënga mochantşotjénaye.

18 Chca ora, atşe chanjama nÿetsca atşbe oservénëngbiama, boyabásenga y shembásenga, chëngbe ainaniñe atşbe Espíritu cháumashënguama,

as chënga atşbe soyëngama entşanga mochantşetsëtsnaye.

19 Atşe chanjama bëts soyënga celoca;

y quem luariñe echántsemna buiñe, íñeshe y ngona mo jantşetëshcá, atşbe obenana jinÿanÿiyama.

20 Cabá chë puerte uámana te, chë Bëngbe Utabná bëts soyënga jamama ndobuache ora,

shinÿe ndoñe queochátşbuashinÿinÿana

y juashcona buánganëtema mo buiñcá echántsemna.

21 Y as, ndánaca Bëngbe Utabná tbojtsotşëmbuaná, cha bochanjatsbocá.’

Chca Joel tempo tojanábema ca” —Pedro tojánayana.

²² Chora Pedro tojatanéyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tcmonjaninýanyé, Jesúsbioye chabe trabajo biamnayá cha tbojánbemama. Chë soye Bëngbe Bëtsá tcmonjaninýanyé, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinýanyiyama. Cach tsëngaftanga chë soyëngama šmondëtatšëmbo, Bëngbe Bëtsabe obenánaca chë soyënga tsëngaftangbeñe Jesús tonjánmayeca. ²³ Ndegombre tsëngaftangbe cucuatšinë Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana vojamnama; y ntšamo tsëngaftanga cháftaca šmochjanmámnaca cha inatátšëmbo. Tsëngaftangna Jesús šmonjanishache y šmonjanma cha chamóbama y chamocrucificama, bacna entsangbe cucuatšinë. ²⁴ Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

²⁵ Chora Pedro tojatanéyana: “Rey David tempo Jesusbiamma mëntsá tojéftsanabema, ntšamo cha Bëngbe Bëtsábioye tbojaniyanama:

Atšbe Utabná, aca sempre átšeftaca condbétsemna, y siempre átšeftaca condboquedá atše juajabuáchama,
chíyeca ndocná queochatobenaye atše jauátjanama.

²⁶ Chíyeca atše corente oyejuayá sëntsemna,

y atšbe uayášaca cbontsatschuaná.

Atše masque chanjóbana, tšabá sëndétatsëmbo
aca atšbe Bëtsá, atše chaitayenama cochja-
mama.

²⁷ Aca, Bëngbe Bëtsá, obanëngbe luarentše ndoñe
quešcochátsboshjona,

y ndoñe quecochatsleséncia acbe uámana oserven-
abe cuerpo chaotsopochocama.

²⁸ Aca chë tšabe benache šconjaninÿinÿé, ntšamo
tšabe vida jtsebomnama.

Aca átšeftaca condbétsemnama, atše puerte
oyejuayá sëntsemna ca —David
tojéftsanabema ca.”

²⁹ Chentšana Pedro tojatanëyana: “Baconga
y batanga, šontsemna ndegombre tšëngaftanga
jábuayenana tšabá chacmésertama. Bëngbe
tempca bëts taitá David tojanóbana y
tmojanatbontsá, y bënga montsemna cha
tmojanatbontsá luare béconana. ³⁰ Cach David
canÿe Bëngbe Bëtsabe juabna oyebuambnayá
inamna. Cha tšabá inatátsëmbo Bëngbe
Bëtsá bëtscá tbojanšbuáchenama, Davidbe
entšanguentšana canÿa, Cristo, cach Davidcá
rey jabemama. ³¹ David inatátsëmbo chë Uámana
Uabuayaná, chë Cristo, cháuatayenama Bëngbe
Bëtsá yochjanmama. Chama cha tojánayana
y tojéftsanabema, obanëngbe luarentše Cristo
ndoñe ntjéftseboshjonana y Bëngbe Bëtsá ndoñe
ntjalesénciana chabe cuerpo chaotsopochocama
ca. ³² Bëngbe Bëtsá tojama Jesús cháuatayenama y
bënga cha fsënjinÿe. Chíyeca bënga fsëntsetatšëmbo
chca ndegombre bétsemnama. ³³ Bëngbe Bëtsá,
Jesús celoye tbontanatsbaná chabe catšbioica

jtsatsmënama jtsemándayama, y Bëngbe Bëtsá chë Uámana Espíritu Jesúsbioye tbojanëntsabuaché ntšamo chë Taitá tbojanšbuachenacá. Ntšamo tšëngaftanga šmontsonýá y šmontsuenancá entsemna, Jesucrísoftaca chë Uámana Espíritu bëngbe ainaniñe cháumashënguama Bëngbe Bëtsá tojámayeca. ³⁴ David ndoñe Jesuscá celoye tonjána, pero mëntsá tojëftsánábema:

Bëngbe Bëtsá atšbe Utabná Crístbioye tbonjaniyana:

‘Atšbe catšbioica cochtsetbemana,

³⁵ acbe uayayënga acbe cucuatšíñe chamo-
quedama atšbe obenánaca chjamëntscuana
ca.’ ”

³⁶ Chora Pedro tojatanëyana: “Tšëngaftanga nýets Israeloquënga šmochtsetátšëmbo, atše ndegombre cach Jesusbiamana sëntsóyebuambnama. Cha tšëngaftanga šmonjancrucificá, pero Bëngbe Bëtsá chábioye tbonjábema Bëngbe Utabná y chabe Uámana Uabuayaná, chë Cristo ca.”

³⁷ Chë soyënga tmojanuena ora, entšanga cochtsetšenánënga imojtsemna, y Pedro y chë inýe ichmónëngbioye tmojanëyana: —Baconga, ¿ndayá mora jamama šojtsamna ca?

³⁸ As Pedro tojanëjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espíritu tšëngaftangbe ainaniñe jtsemándayama

cháumashënguama. ³⁹ Bëngbe Bëtsá chë soyënga tcmónjanašebuachená tšëngaftangbiama, tšëngaftangbe básengbiama y nÿets chë bën luarënguenache imomna entšangbiama, nÿetscanga chë Bëngbe Utabná Bëngbe Bëtsá chábioye jabama chaojubuáyanënga ca.

⁴⁰ Inÿe palabrëngnaca Pedro tojatanëyana y bëtscá tojanabuayená mëntšá: “¡Bëngbe Bëtsá chë Israeloca bacna entšanga echanjácastigaye. Chašmótsbocamna, chëngbentsana šmochtsojuánañe ca!”

⁴¹ Ba entšanga imojtsanošbuaché ntšamo Pedro tojanëyanama y tmojánenabaye. Cach te mo unga uaranga entšanga nÿetsá tmojanoboté, Jesucristbeñe ošbuáchiyënga jtsemnama.

⁴² Chënga corente imojtseboše jtsamama chë Jesusbe ichmónënga imojtsabuatambá soyënga. Tšabá yojtsacochebiona nÿetscanga cánÿiñe jtsemnama y imojanamana mo chë Jesucristbeñe ošbuachiyëngcá cánÿiñe jtseyayana y cánÿiñe Bëngbe Bëtsáftaca jtsencuéntayana.

Ntšamo chë natsana Crístbeñe ošbuáchiyënga vida innabomna

⁴³ Nÿetscanga imojtsenjnanaye, chë ichmónënga bëts soyënga y inÿe soyënga chabe obenana jinÿanÿiyama chamomama Bëngbe Bëtsá tojánmayeca.

⁴⁴ Nÿetsca chë Jesucristbeñe ošbuáchiyënga sempre cánÿiñe mo canÿacá imojtsemna y nÿetsca chëngbe bomna soyënga nÿetscangbiama yojtsemna. ⁴⁵ Chënga imojanamana fshantsënga jtsatobuíyana y chë imojánbomna soyëngnaca, y chë crocénana

jujátayana ntšamo chë ínÿenga tojtsëjabotcá.
⁴⁶ Cada te imojanamana Bëngbe Bëtsabe bëts yebnentše jénefnana cha jëtschuayama, y yebnënguenache cánÿiñe imojtsesaye oyejuayënga y ndoñe ojëndayënga. ⁴⁷ Chënga imojanamana Bëngbe Bëtsá jtsatschuanayana, y nyetsca entšanga imojtsejuabnaye chë Jesucristbeñe ošbuáchiyëngbiama tšabe entšanga imojamna ca. Y cada te Bëngbe Bëtsá yojtsama más ošbuáchiyënga chamóbotema, chë ndëmuanÿenga cha yojtsatsebacayënga.

3

Pedro canÿe coshétbioye tbojanshná

¹ Canÿe te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entšanga imojanamana Bëngbe Bëtsáftaca jtsencuéntayana. ² Bëngbe Bëtsabe bëts yebnentše canÿe cosheto yojtsemna; tojanonÿná orscana chca šocá inamna. Entšanga imojanamana cada te cha juanatsana canÿe luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnëjuanënga lemošna chaótejañama. ³ Pedro y Juan Bëngbe Bëtsabe bëts yebnoye jamashënguama chë cosheto tojánanÿe ora, canÿe lemošna chátbioye yojótejañe. ⁴ Chatna chë šocá imojtsonÿaye, y Pedro tbojaniyana: “Scochtsënÿaye ca.”

⁵ As cha yojtsënÿaye y yojtsejuabnaye ndayá chjójyëngacñe ca. ⁶ Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe

obenánaca ndayá acbiama jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

⁷ Pedro chca tbojaniyana ora, tbojanábuacueshache catšbióicatše y tbojtanatsbaná, y cachora chë cosheto shecuatšiñe y shëmiabeñe añemo yojsatsbomna. ⁸ As chë cosheto, canye jontsënjëse tšabá tojtantsá y tojanontsé tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojsayontsëjnaye y Bëngbe Bëtsá ibojsatschuanaye, tbojanshnama. ⁹ Chë Bëngbe Bëtsabe bëts yebnentše imojétsemnënga nyetscanga cha tmojáninye tšabá jtsanana y Bëngbe Bëtsá jtsatschuanayana. ¹⁰ Chënga imnatátšëmbo cha chë cosheto yojamnama, chë nda yojanamana Bëngbe Bëtsabe bëts yebnoca, chë Botamana Amashjuantše jótbemana, entšanga lemošna jotejañama. Cha tšabá yojsatsmënamna entšanga ojnánänënga imojtsemna.

Ntšamo Pedro tojanoyebuambá Salomonbe Amashjuana ca uabáinentše

¹¹ Chë cosheto ya shnaná ora, ndoñe yontseboše Juan y Pédrëbentsana joluárana. As, nyetsca entšanga ojnánänënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojétsemnoye. ¹² Pedro chë entšanga tojánanye ora, tojanëyana: “Taitanga y mamanga, Israeloquënga, ¿ndáyeca chë soyëngama ojnánänënga šmojtsemna? ¿Ndáyeca

nÿe ſcojtsëbuáutja? ¿ſmojtsejuabná nÿe bëndatbe obenánaca quem boyabása tifjashná ca? ¿O ſmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca? ¹³ Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinÿanyé chabe oservená Jesús chë más uamaná yomnama. Cha tšëngaftanga chë mándayëngbe cucuatšinë ſmonjánboshjona chamóbama. Pilato enjéteseboſe Jesús jëtsboshjonama, pero tšëngaftanga Pilatbe delante ſmonjánayana chca ndoñe ſmontsanboſe ca, y chíyeca Pilato ndoñe tbontanboshjona. ¹⁴ Jesús uamaná y nÿetsca soyënguiñe tšabá amá enjamna, pero tšëngaftangna cha ſmontsanaboté y Pilato ſmonjanimpadá chabe cuenta canÿe boyabása, entšá obanayá, chabuatsboshjonama. ¹⁵ Y chca, chë ndegombre tšabe vida chašmotsebomnama amábioye tšëngaftanga ſmonjanóba. Pero Bëngbe Bëtsá tojanma cha cháuatayenama y bënga chë soye fsënjáninÿe y chama fsëndétatšëmbo. ¹⁶ Jesús puerte obená endmëñayeca, quem cosheto añémoca entsatsmëna. Ntšamo ſmonjinÿe y ſmonjatatšëmoncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

¹⁷ “Taitanga y mamanga, atſe sëndétatšëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca ſmojanma, ndayá ſmojétsamama ntsetatšëmbcá.

¹⁸ Tempo, Bëngbe Bëtsá chë chabe juabna

oyebuambnayënga tojanamëndá entšanga jábuayenama, chë Bëngbe Bëtsabe Uámana Uabuayaná puerte ngménana yochtsanbomnama. Morna, ntšamo Bëngbe Bëtsá tojanayancá ya tonjochnëngo. ¹⁹ Chcasna, ngménaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama, ²⁰ y tšëngaftangbioye bochanjíchmua Jesús, chë tempo chabe Uámana Uabuayaná Bëngbe Bëtsá tbojanbemá. ²¹ Canye te echanjóshjango, Bëngbe Bëtsá lempe tsmëmacá jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entšanga tojanabuayenacá. ²² Moisés bëngbe bëts taitanga tojanabuayená: ‘Chë Utabná Bëngbe Bëtsá canye chabe juabna oyebuambnayá ntšamo atše sëndmëncá, cmochanjayentšíchmua. Cha tšëngaftangbentšana echanjábocna y tšëngaftanga cmontsamna ntšamo chacmojtsëtsëtsnacá cha jtseyeunanana. ²³ Ndánaca chábioye ndoñe chabonjoyeuná, cha bontsemna chë Bëngbe Bëtsabe entšángbentšana luaroca jtsemnama y chamotsepochocama ca’ —cha tojánayana.

²⁴ “Y nÿetsca chë Bëngbe Bëtsabe juabna oyebuambnayëngnaca Samuel orscana, entšanga tmojanabuayená ndayá quem tempo yochjanchnënguama, ntšamo mora montsonyáca.

25 Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiamana, y tšëngaftangbe bëts taitángaftaca canÿe trato tojánbema; chë soyënga cabá tšëngaftangbiamana entsemna. Bëngbe Bëtsá Abrahámioye mëntsá tbojaniyana: ‘Chë ácbentšana entšángbeyeca tšabe bendicionënga chanjama nyetsca quem luarentša entšangbiamana ca.’ ²⁶ Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnana ca” —Pedro tojánayana.

4

Pedro y Juan Jerusalemëntša mandadëngbe delante

¹ Pedro y Juan cabá entšanga imojtsëtsëtsnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga. ² Chatna entšángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtëna. ³ As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana. ⁴ Masque chca, banga entšanguentšana, ntšamo Pedro y Juan tbojanayancá tmojanuenënga, aíñe Jesucristbeñe imojtsošbuáchiye. Chë tentscuana

shachna uaranga Jesucristbeñe ošbuáchiyënga imojtsemna, nÿe boyabásenga jacuéntase.

⁵ Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna.

⁶ Chéntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nÿetsca pamíllangnaca.

⁷ Chora chënga tmojanmandá Pedro y Juan junatsama, y chëngbe tsëntsaca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatsatá chë soyënga chašotsamama ca?

⁸ As Pedro, chë Uámana Espíritu chabe ainaniñe corente jtsemándayëse, mëntšá tojanéjua: —Israeloca mándayënga y bëtsëjemënga,

⁹ mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama.

¹⁰ Chcasna, ntšamo tojopasama cbochanjabuayená, chca, tšëngaftanga y nÿetsca Israeloca entšanga chë soyënga chašmotsetatšëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjancrucificá y ndabiamama Bëngbe Bëtsá tojanma cháuatayenama.

¹¹ Jesusbiamama Bëngbe Bëtsabe uabemana palabrënguiñe mëntšá endayana: “Chë yebna jebuanënga tmontsanaboté ndëtsbé, mora chë más bëts uashacuanësentše entsejájona ca”. Tšëngaftanga šmondmëna mo chë yebna jebuanëngcá, er

Jesúsbioye šmontsanaboté y mora cha chë más uamaná entsemna. ¹²Nye cha yobena tsëngaftanga jätsebacama. Bëngbe Bëtsá ndocna inye entsábioye tbonjatšetá chabe obenana chca jamama; chíyeca quem luarentse ndocná más quenátobena bënga jätsebacama. Nye Jesucristbe obenánaca aíñe ca —Pedro tojánayana.

¹³Chënga imojenjnaná Pedro y Juan tša añémoca ibojtsóyebuambnama tmojáninye ora, y chata tempo nduatsjínjenata y librëša nduabuatmata bëtsemnama tmojántatsëmbona ora. Chca chë mándayënga tmojántatsëmbona chata Jesúseftaca bayté ibojamnama. ¹⁴Y entsanga imojtsonyaye chë tmojanshná cha chentse chátaftaca yojtsemnama; chë causa, chënga ndocá más tmonjanobená chatbe contra jatichámuana. ¹⁵As chora tmojanamëndá chentšana chábuaisebocnama y chentse tmojanoquedangna chë soyama imojtsenatsëtsnaye. ¹⁶Chënga imojtsentjanaye: “¿Ndayá chátaftaca mochjama ca? Jerusalemntse oyenënga montsetátšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca. ¹⁷Pero entsanga chama ndoñe más chamondëtsencuéntamna, chata mochjáuyana: ‘Ndoñe más entsángbeñe Jesús šmattsebáyana; y ndoñe chašmonjouenëse, jabuache castigo šochántse bomna ca.’ ”

¹⁸As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiamana entsángbeñe jtsabuátambayana. ¹⁹Pero Pedro y Juan

tbojánayana: “¿Ntsamo tsëngaftanga šmatjayana ntsamo fchanjayanama ca? Ndegombre, Bëngbe Bëtsabe bominyiñe ndoñe tsabá quenátsmëna tsëngaftangbioye aïñe joyaunayana y chábioye ndoñe. ²⁰ Er bënga queftsátobena jtsajbanana oyebuambnayana chë tifjinÿe y tifjouena soyëngama ca.”

²¹ Chë mandayëngna chátbioye tojtsanautatjá, pero chentšana tmojtanabáshejuana. Nyetsca entšanga Bëngbe Bëtsá imojtsatschuanaye ntsamo tojanopasama; chíyeca, chë mándayënga ndoñe tmonjanobená tondaye ntjinÿenana ntsamo chata jácastigama. ²² Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

Jesucristbeñe ošbuáchiyënga Bëngbe Bëtsá tmojan-impadá más añemo chauatšatama

²³ Pedro y Juan ya tmojtanabáshejuana ora, tbojánata chë inÿe ošbuáchiyëngaftaca jateninÿenama y lempe ntsamo chë bachnangbe amëndayënga y bëtsëjemëngcá mándayënga chátbioye tmojanëyancá, chëngbioye tmojanacuntá.

²⁴ Chënga chca tmojanuenentšana, nyetscanga cánÿiñe tmojanontsé Bëngbe Bëtsáftaca mëntšá jencuëntama: “Bëngbe Utabná, aca chë nda tojama celoca, fshantse, nyetsca béjayënga y lempe ntsamo chenache yomncá, ²⁵ chë Uámana Espíritbiajana tcojánayana y acbe oservená David, ntsamo tcojanayancá tojanábema, mëntšá:

¿Ndáyeca entšanga yapa imojtsetsátjaye ca?

¿Ndáyeca imojtsejuabná nÿe bonamentiamasoyënga jamana?

26 Quem luarentša reyënga y amëndayënga imoprontánënga,
 nyëtscanga tmojenoyeuná Bëngbe Bëtsá y chabe
 Uámana Uabuayaná chë Cristbe contra jtsemnama ca —cha tojanábema.

27 “Ndegombre chca tonjopasá. Rey Herodes y Poncio Pilato, quem bëts pueblentse, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama. 28 Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama. 29 Morna Bëngbe Bëtsá, mouena ntšamo chënga montsichamo, bënga jasúfriama cašojsamna ca; chcasna, cochjama bënga fchayobená Jesusbe tšabe noticiënga bëts añémoca entšángbeñe jtsóyebuambnayama, 30 y cochjama acbe obenánaca šoquënga tšabá chamotsatsmënema y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

31 Bëngbe Bëtsáftaca jencuéntama tmojanpochocá orna, chë tmojánenefjnentse tojanangmëmema; y nyëtscangbe ainaniñe chë Uámana Espíritu tojanontsé más jtsemándayana, y chënga tmojanontsé más añémoca Bëngbe Bëtsabe soyëngama entšanga jábuayenama.

Nyëtsca bomna soyënga nyëtscangbiamayojtsemna

32 Jesucristbeñe ošbuáchiyënga, nyëtscanga canye juabna imojtsebomna y ainaniñe cach

canÿe ebionana. Ndocná ntjatichamuana chabe soyënga nÿe chabiana yojtsemna ca, pero aïñe imojtsichamo, “atše sëndbomna soyënga nÿetscangbiana entsemna ca”. ³³ Chë Jesusbe ichmónëngna puerte obenánaca mëntšá imojtsichamo: “Fsënjinye y fsëntsetatsëmbo Bëngbe Utabná Jesús obanënguentšana tojtayenama ca.” Y Bëngbe Bëtsá yojtsama chë ichmónënga bëtscá tšabe bendicionënga chamotsebomnama. ³⁴ Jesucristbeñe ošbuachiyëngbeñe ndocná yonjamna ndayánaca uajabotá, er nÿetscanga fshantse o yebna bomnënga imojanamana jtsatobuíyana, y chë crocénana ³⁵ chë ichmónëngbioye jayentšbuáchiyana, ntšamo tojtsëjabortcá nÿetscanga jujátayama. ³⁶ Chca tojanma canÿa Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. ³⁷ Chana, fshantse yojtsatobuiye, y chë crocénana Jesusbe ichmónëngbioye yojáyentšbuachiye, chë uajabótëngbiana chaoservema.

5

Ntšamo Ananías y Safíraftaca tojanopasá

¹ Inamna canÿe bacó, Ananías ca uabainá, y chabe shemna, Safira ca. Chatna canÿe fshantse tbojániye. ² Ananías y Safirna tbojanenóyeunata; chcasna, batšá crocénana cachatbiana tbojanobuajó y chë tojanójama crocénana ichmónëngbioye Ananías tojanamba,

pero tojanéyana chana canjamna nýets crocénana ntsachetśá chë fshantsama tbojanosháchiñe ca. ³ As Pedro tbojaniyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espíritu chë crocenánama jabuambayama ca? Acna chë fshantsama tcmojtabuená crocenánentsana cach acbiana batśá tcontábojama. ⁴ Cabá ntsatobuiye ora, chë fshantse ábeshe endánmëna y tcojtsatobuíyentsana chë crocénana acbiana y chánaca condánobena ntśamo tcojtseboścá jamama. ¿Ndáyeca acbe ainaniñe tcojajuabó chë crocenánama chca jobostérama? Chca jamëse, ndoñe nýe entsángbioye quecatabuambná, sinó Bëngbe Bëtsánaca ca” —Pedro tbojaniyana.

⁵ Ananías chë palabrënga tojanuena ora, obaná tojánshajaye. Y nýetscanga chama tmojántatsëmbonënga corente imojtsauatja. ⁶ Chentśana, básefta bobontsënga tmojánashjajna y Ananíasbe cuerpo entsëjuaca tmojanandmaná y jauátbontsama tmojanamba.

⁷ Mo unga horëntscose, Ananíasbe shema Safira tojánashjango, pero ndoñe yontsetátśëmbo ntśamo chabe boyáftaca tojanopasama. ⁸ Chora Pedro tbojantjá: —Ndegombre śmëyana, ¿chë śmonjayana nýetsnama chë fshantse śmojiye ca?

As chë shema tbojanjuá: —Aíñe, nýetsnama fsënjiye ca.

⁹ Pedro tbojaniyana: —¿Ndáyeca tsëndata šojenoyeuná Bëngbe Utabnabe Espíritu jabuambayama, y cabá castigo jtsebomnama ndoñe šontsobatmana ca? Acbe boyá

jauátbontsama tmonjuambënga muentše bësoca montsemna y mora ácnaca cmochanjuamba ca.

¹⁰ Cachora Safira Pédrëbe shecuatšentše obaná tojánshajaye. Chë bobontsënga tmojtanamáshjna ora, obaná Safira tmojáninÿena; asna, chentšana tmojanamba y cachabe boyabe juachaca tmojanatbontsá. ¹¹ Y nÿetsca Jesucristbeñe ošbuáchiyënga chentše imojtsemnënga y nÿetscanga chë soye tmojántatšëmbonënga, corente imojtsauatja.

Ba bëts soyënga chë ichmónënga tmojanma, Bëngbe Bëtsabe obenana jinÿanÿiyama

¹² Chë Jesucristbe ichmónëngaftaca ba bëts soyënga entšángbeñe yojtsebinÿna Bëngbe Bëtsabe obenana jinÿanÿiyama; y nÿetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentše. ¹³ Chë ínÿenga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsenutana; pero entšangna chë ošbuáchiyëngbiamana tšabá imojtsencuéntaye. ¹⁴ Bëngbe Utabnábeñe ošbuáchiyënga más imojtsóbotena, bëtscá boyabásenga y shembásengnaca. ¹⁵ Tša bëts soyënga chë ichmónëngaftaca yojtsebinÿna; chíyeca entšanga imojanamana jutsnëshangañe y tjuashënguiñe tsáshenoye šoquënga jubuacnana, chca, Pedro chëjana tojtsachnëjuana ora, nÿe mo chabe sómbrënaca chëngbe cuerpëjana chaochnënguama, shnánënga jtsatsmënama. ¹⁶ Jerusalén chábuañe pueblënguentsana ba entšanga imojanamana jabana, y šoquënga y

bacna bayëjbe juabna uambayënga imojtsëyabó; y nyëtscanga shnánënga imojtsatsmëna.

Bëngbe Bëtsá tojanma Pedro y chë inye ichmónënga cárcelocana natjëmbana chámuaisebocnama

¹⁷ Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna. ¹⁸ As chë ichmónëngbioye tmojánishëche y chë bëts pueblentša cárceloye tojtsanëtame. ¹⁹ Pero ibetna, Bëngbe Utabná canye ángel tbojanichmó y chë utámenentša bëšašangá cha tojánatëfjo, chënga tojtanëbuacna y mëntša tojanëyana: ²⁰ “Motsajna, Bëngbe Bëtsabe bëts yebnentše šmochjámashjna, y entšanga šmochjabuayená ntšamo cuanjama chë nyëtsca tescama yomna tšabe vida jtsebomnama, Jesucrísoftaca cányiñe mo canyáca jtsemnëse ca.” ²¹ Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontsé entšanga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtsëjemëngcá mándayënga y inye chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama. ²² Pero chë soldadënga chë utámenoye tmojánashhajna ora, chënga chentše ndoñe tmonjánanyëna. Chcasna, chënga tmojtaná chë mándayënga chca jaúnayama. ²³ Y tmojánayana: “Chë utámenoca fsënjínýena lempe tšabá endëtsëtámeñe y soldadëngna nyëtsca

běšašangá monduabojanŷanga; pero fsēnjatēfjo y tsoye fsēnjámashjna orna ndocná chibiátinŷena ca.”

²⁴ Chē bachnangbe amēndayēnga y chē Bēngbe Bētsabe bēts yebnentša soldadēngbe amēndayá chca tmojanuena ora, yojtsētēmnana y imojt-sentjanaye ndayá chentšana yochjanopásama.

²⁵ Chorna, chēnga imojtsemnentše canŷe boyabása tojánashjango y mēntšá tojanēyana: “Chē šmojutámiēnga mora Bēngbe Bētsabe bēts yebnocá montsemna, entšanga montsabuatambá ca.”

²⁶ Chē soldadēngbe amēndayá tojána soldadēngaca, chē Jesuse ichmónēnga junatsama; pero nŷe tšabá tmojanēnatse, er chēnga entšangbiamá imojtsauatja, nderado cachēngbioye ndētšbēngaca muantsēbaye.

²⁷ Chēngbioca tmojanēshejajna ora, mandayēngbioye tmojanēnatse; chora chē bachnangbe más uámána amēndayá mēntšá tojanēyana: ²⁸ — Bēnga jabuachana tcbontsēuyaná y tcbonjáuyana ndoñe šmontselesenciana jtsóyebuambnayama chē boyabása Jesús tojánayana yojtsemna jabuátambama soyēngama ca. Masque chcasna, mora tšēngaftanga nŷetsca chē Jerusalenentša oyenēnga chabe soyēngama šmojtsabuatambá y šmojtseboše, cha tojanóbanama castigo bēngbeñe chaotsemnama ca.

²⁹ Chorna, Pedro y chē inŷe ichmónēnga tmojánayana: —Bēnga šontsamna natsana Bēngbe Bētsá joyeunayana y chentšana entšángbioye. ³⁰ Chē Taitá, nda bēngbe bēts taitanga monjánadorana, cha tojama Jesús cháuatayenama, chē nda tšēngaftanga šmonjanóba canŷe cruciñe juajabonjēse. ³¹ Bēngbe Bētsá

tbontatsbaná y chabe catšbioica tbojětstbema, jtsamëndayama, y tbojábema entšangbe Unachayá y Atsebacayá, chca, Israeloca entšanga ngménaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnama. ³² Bënga fsëntsichamo ndayá bënga ndegombre tifjinÿe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama chë Uámana Espíritu cháumashëngo chë tmojtseyeunanëngbe ainaniñe jtsemándayama ca —chënga tmojánayana.

³³ Chë mándayënga chca tmojanuena ora, puerta tmojanotjayaná y tmojánbošena chë ichmónënga jtsëbáyama. ³⁴ Pero chë mándayënguentšë yojtsemna canÿe fariseo, Gamaliel ca uabainá. Chana canÿe ley abuatambayá inamna y entšanga puerta innarrespectana. As cha tojantsá y tojanmandá chë ichmónënga ratotema chentšana jubuacnama. ³⁵ Chentšana chë inÿe mándayënga tojanëyana: “Israeloca taitanga, puerta cuedado šmochtsebomna ntšamo quem boyabásengaftaca šmochjamama. ³⁶ Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canÿe uámana entšá canjamna ca, y mo canta patse entšanga cha tmojanasto. Pero chora ínÿenga cha tmontsanóba y chabe ústonënga tmontsanáshana, y chca lempe tontsanopochocá. ³⁷ Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha

chamuastama; pero chánaca ínÿenga tmonsanóba y nÿetsca chabe ústonënga tmonsanáshana. ³⁸ Chíyeca atše cbëyana, quem boyabásenga matabáshejuana y ndocá mataborlánana. Ntšamo chënga montsamancá, nÿe entsangbe juabna y nÿe chëngbe trabajo tojtsemnëse, betsko echanjopochóca. ³⁹ Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyënjanama. Cuedado šmochtsebomna, nderado mo Bëngbe Bëtsabe uayayënga šmuatjanenobiamaca” —cha tojanëyana.

Y as chënga Gamaliel tmojanoyeuná. ⁴⁰ Chcasna, chë ichmónëngbioye tmojánachembo, tmojtsanachebuánganja y tmojanëyana Jesusbe uabáinaca entsángbeñe ndoñe chamondëtsoyebuambná ca; y chentsana tmojtanabáshejuana. ⁴¹ Chora chë ichmónënga chë amëndayëngbentsana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiamá oservénënga bétsemnayeca. ⁴² Chentsana, chënga cada te imojanabuatambá y Jesús, chë Uámana Uabuayaná, chë Cristo bétsemnama entsángbioye imojanabuayiyiná, Bëngbe Bëtsabe bëts yebnentše y yebnënguenáchnaca.

6

Chë ichmónëngbiamá ujabuáchanënga tmojanëbuáyana

¹ Chë tempo, Jesucristbeñe ošbuáchiyënga betsko imojtsóbotena. Chora chë Jesucristbeñe ošbuachiyëngbentše, chë judiënga griego

biyanga batsá imojtsetsátjaye y chë judiënga hebreo biyangbiana mëntsá tmojánayana: “Chë griego biyangbe viudángbioye ndoñe cachcá quemnatëjabuáchana ntšamo chë hebreo biyangbe viudángbioye cada te montsëjabuachancá ca.”

² Asna, chë bnëtsana uta ichmónënga nyetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtsëjaboto soyënguiñe. ³ Chcasna, baconga y batanga, tšëngaftanguentšana canÿséftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espíritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye. ⁴ Y bëngna šontsamna nyets tempo Bëngbe Bëtsáftaca jtsencuéntayana y Bëngbe Bëtsabe palabra entšanga jtsabuayinyayana ca” —chënga tmojánayana.

⁵ Nyetscanga tojanogusetá ntšamo chë ichmónënga tmojanayancá; as, Esteban tmojanábuayana; canÿe boyabása puerte ošbuachiyá cha inamna y chë Uámana Espíritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entšá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá). ⁶ Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë

ichmónëngbe trabajënguiñe chë ubuáyanënga chaújabuachama, chëngbe cucuatsënga chëngbe bestšašentše jajájuase.

⁷ Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más ošbuáchiyënga betsko imojtsóbotena. Y ba judiëngbe bachnángnaca tmojanontsé Jesucristbeñe jtsošbuáchiyana, ntšamo chë ínÿënga imojtsanošbuachecá.

Esteban tmojánishache

⁸ Esteban, Bëngbe Bëtsabe obenana y chábentšana tšabe bendicionënga yojtsebomnëse, entšángbeñe bëts soyënga yojtsama. ⁹ Báseftanga “Ya Cachcá Atabashejuana Oservënënga ca” uabainëngna tmojanontsé Estébanoftaca enatsëtsnayana. Chënga imojamna judiënga Cirenoquënga, Alejandroquënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservënëngbe Yebna ca”. ¹⁰ Pero chë Uámana Espíritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana. ¹¹ As chënga báseftanga tmojanëbuénaye Estébanbe contra podesca soye chamuayanama, mëntsá: “Cha fsënjoyeuná Moisesbiana y Bëngbe Bëtsabiana ndoñe tšabá jtsóyebuambnayana, mo cuafjoyanguangcá ca.” ¹² Chcase chënga tmojanma entšanga, bëtsëjemëngcá mándayënga y ley abuátambayënga Estébanbe contra chamóntsá enbouenanana; y as, Esteban tmojanotbá y chë mándayënga

imojtsemnoye imojuíchëmo. ¹³ Y tmojanënatse básefta entsanga, uayátsenaye soyënga y podesca soyënga Estébanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama. ¹⁴ Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtsepochoća y caochjama bënga nýe chabe mandëngaca mandánënga chamotsiyenama y ndoñe ntšamo Moisés bëngbe bëts taitanga tojëftsanabuatambacá ca.”

¹⁵ Chë mándayënga y nýetscanga chentše imojétsetbiamanënga Esteban tmojanonýinýe ora, tmojáninýe chabe jubiá yojtsebuashinýinýana mo canýe ángelbe jubiácá.

7

Ntšamo Esteban tojanenëuyaná

¹ Chora chë bachnangbe más uámana amëndayá, Estébanbioye tbojantjá: —¿Ntšamo acbiama montsichamcá ndegombre yojtsemna ca?

² As Esteban tojanëjua: —Taitanga y baconga, mouenënga. Bëngbe Bëtsá, chë corente uamaná endmëná, Abrahámbioye tbojánëbëbocna, cha Mesopotamioca yojaniyena ora; tbojánëbëbocna, Harán bëts pueblocá joyéanama cabá nda ora, ³ y Bëngbe Bëtsá tbojaniyana: “Metseboshjona acbe fshantse y acbe pamíllanga y cbochanjinýinýiye luaroye cochjá ca.” ⁴ As Abraham chabe luare Caldea tojëftsanboshjona y tojána Haránoca joyéanama. Chabe taitá tojanóbanentšana, Bëngbe Bëtsá Abrahámbioye chë luaroye tbojanánatse,

chë mora tšëngaftanga šmontsiyenentše. ⁵ Pero quem luariñe ni mo base fshantse ndoñe tbonjëftsanatšetá, ni mo ndayentše jtsiyenama. Pero aĩñe Abrahámbioye tbojanšbuachená chë fshantse jatšetayama, chabiamá y chabe básengbiamá, Abraham tojóbanentšana. Chca tbojanšbuachená ora, Abraham ni canýe šešona bonjánbomna. ⁶ Y Bëngbe Bëtsá mëntšá tbojaniana: “Chë ácbentšana entšanga, ínýengbe luaroca áshjajnënga mochántsemna, y choca oyenënga chëngbe oservënënga chëngbioye mochanjábiama y canta patse uatëntscuana jabuache mochanjasufrina ca.” ⁷ Y mëntšánaca tbojaniana: “Pero atše chanjácastigaye chca oservënënga chacmojábiama luarentša entšanga; y as, chentšana chë ácbentšana entšanga mochanjésebocana y mora bontsemna luaroye mochanjésabo y muentše atše šmochántšadorana ca.” ⁸ Bëngbe Bëtsá Abrahámbioye tbojanšbuachená nýe cha y chabe básengbe Taitá cha jtsemnama y jamama tšabe bendicionënga chëngbeñe chaotsemnama, y chama, chaotsinýnamna tbojanmandá chabe šešona, boyabásetema tojonýná ora, base bobachtema chë más delicadentše jatëtšana. Chíyeca, chabe uaquiñá Isaac tojanonýná ora, posufta tianoye Abraham base bobachtema chë más delicadentše tbojantëtše. Isaac cachcá tojanma chabe uaquiñá Jacóboftaca y Jacob cachcá tojanma chë chabe bnëtsana uta uaquiñëngaftaca. Chënga monjamna chë Israeloca bnëtsana uta bëts pamíllangbe taitanga.

9 “Quem uaquiñenga bēngbe bēts taitanga monjamna. Chēngna, chēngbe uabentsá Josébioye envidia innabomna y tmojtsatanobuiye, Egiptoye canye oservenacá chamotsánatseñama. Pero Bēngbe Bētsá Josébioye nyets tempo ibnauájabuachana, ¹⁰ chíyeca nyetsca chabe ngmenēnguentšana tbojanatsbocá y Bēngbe Bētsá tojanma cha chaotsetatsēmbuama tšabá jóyebuambayama chē Egiptoca réybentše, Faraón ca uabainá. Bēngbe Bētsá tojanma chē Faraón chaoyejuá ntšamo José yojamnama; chíyeca Faraón Josébioye tbojánbema Egiptoca mandado y chabe yebnēnguentše oyenēngbiámna.

11 “Chē tempo, Egiptó y Canaán luariñe bēts shēntsana tojanóshjango y puerta ngménana yojtsemna y bēngbe bēts taitanga ndoñe imontsobena saná jónyēnama. ¹² Pero Jacob tojántatsēmbona Egiptoca saná yojtsemnama; asna, chabe uaquiñenga, chē bēngbe bēts taitanga choye tojanichamó. Chora yojamna chē natsanama chēnga Egiptoye jama. ¹³ Uta soyama chēnga tmojtesaná ora, José chabe catsátanga tojanēyana: ‘Atše José sēndmēna, tšēngaftangbe uabentsá ca.’ Chca chē Faraón Josebe pamíllangbiamna tojántatsēmbona. ¹⁴ Chentšana, José tojanmandá chabe taitá Jacob y nyetsca pamíllanga Egiptoye chamotsama. Canyēsēfta bnētsana shachnēnga imojamna chē Egiptoye tmojánanga. ¹⁵ Chcasna, Jacob Egiptoye tojána choca joyéнанama. Choca cha tojanóbana y chē inye bēngbe bēts taitángnaca. ¹⁶ Jacob y chabe básenga, ntšamo imojtsobancá,

chëngbe cuerpo Siquem bëts puebloye imojtsatambaye y tmojanëtebuantsá, Abraham tojëftsanbuamé cuevëshënguiñe. Abraham canÿe crocenánama Hamorbe uaquiñëngbioye, chëshënga yojtëyentsbuamiñe Siquem puebloca.

¹⁷ “Ntšamo Bëngbe Bëtsá Abrahámbioye tbojanšbuachenacá jamama yojtsobeco ora, Egiptoca corente tmojanoboté Israeloca entsanga y banga chënga imojtsemna. ¹⁸ Cabana, Egiptoca inÿe rey tojanoyayé y cha Josébioye ndoñe tbonjanabuátmana. ¹⁹ Chë reyna, bëngbe entsanga, chë bëngbe bëts taitángbioye tojanaingñë y tojanma chënga puerte chamosufrima; tojanamëndá, chë tmojtsónÿna šešonatémënga cachcá jtsënÿayana chamotsóbanama. ²⁰ Chë tempo canÿe básetema tojanonÿná y cha Moisés ca tmojanabaye. Bëngbe Bëtsá Moisesbiamama oyejuayá yojtsemna y chabe bëtsétsata cach yebnentše tmojanboché unga ishinÿëntscuana. ²¹ Cachcá jonÿayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. ²² Chca, chë Egiptoquënga imnatátšëmbo soyënga Moisés tmojanbuatëmbá y canÿe uámana entsá tojánbocna jóyebuambayama y ndayánaca jamama.

²³ “Canta bnëtsana uata tojánashjache ora, tojanenojuabó jama jtsetatšëmbuama ntšamo chë Israeloquënga, chabe entsanga imojtsemnama. ²⁴ Canÿe, Moisés tojáninÿe canÿe Egiptocá canÿe Israelocábioye ibojtsejantšetaye ora; as Moisés tbojanoboguiyaná y chë Egiptocábioye tbojtsanóba. ²⁵ Moisés yojtsanjuabnaye chë Israeloquënga yojtsósertana, Bëngbe Bëtsá

yochjanma cach Moisesbe obenánaca chë Egiptoca mandentsana chëngbioye játsebacama ca. Pero chë Israeloquënga ndoñe yontsësertana. ²⁶ Yëfsana, Moisés tojánanÿena útata, cach Israelocata, ibojtsentsjanaye; chora cha betesco tojána jetsëuyanama y tojanëyana: ‘Tsëndata catšata šondmëna, ¿ndáyeca šojtsentsjanata ca?’ ²⁷ As, chë ínÿabioye ibojtsentsjanayá Moisésbioye tbojtsanajuatsëntse y tbojanियana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuayanama ca?’ ²⁸ ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’ ²⁹ Moisés chca tojanuena ora, Madián luaroye tojtsanachá y choca yoyoyena inÿe luarocana ashjanganacá. Chentše uta uaquiñata yojëftsabamna.

³⁰ “Chentšana canta bnëtsana uatëse, entšanga ndoyena luariñe, Sinaí tjañe béconana, canÿe ángel tbojánebëbocna zarzësha yojtsángbototjuanentše. ³¹ Moisés yojenjnaná ndayá yojtsonÿama y tšabá jinÿama tojanobeconá ora, tojanuena Bëngbe Bëtsá mëntšá ibojtsatsëtsnaye: ³² ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebomna choye jontješiyama. ³³ As Bëngbe Utabná tbojanियana: ‘Motsenóshebotsca, er aca contsemnentše nÿe atšbiamá luare endmëna, er átšnaca chentše sëntsemna. ³⁴ Ndegombre sënjinÿe ntšamo atšbe entšanga Egiptoca montsesufrina y sënjouena chëngbe oyabojuyana, y atše sënjabo chënga jabátsebacama. Chcasna,

mabouena, Egiptoye cbochanjíchmuca ca' —Bëngbe Bëtsá tbojaniyana.”

³⁵ Chentsana Esteban tojanéyana: “Quem Moisés entsanga tmojtsanaboté y tmojaniyana: ‘¿Nda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëshentše tojanobinÿná ángeloftaca. ³⁶ As Moisés, bëngbe bëts taitanga Egiptocana tojésanébuacna y bëts soyënga tojanma, y inÿe soyënga Bëngbe Bëtsabe obenana jinÿanÿiyama Egiptentše, chë Buángana ca uabaina mar béjayentše y entsanga ndoyena luarentše, canta bnétsana uatëntscuana. ³⁷ Cach Moisés Israeloca entsanga mëntšá tojanéyana: ‘Bëngbe Bëtsá tšëngaftanguentsana canÿa bochanjábema atšcá Bëngbe Bëtsabe juabna oyebuambnaya ca.’

³⁸ Moisés Israeloca entsángaftaca yojëftsemna chë entsanga ndoyena luaroca. Choca chë entsanga tmojánenefjna Siná tjañe béconana. Chentsna canÿe ángel Moisésoftaca tojanoyebuambá, bëngbe bëts taitángbioye chë buayenana soye Moisés chaóyebuambama, chë entsanga tšabe vida jónÿenama palabrenga; y Moisés chca tojanma, bëngnaca chë palabrenga jouenama jobenayama.

³⁹ “Pero bëngbe bëts taitanga ndoñe tmonjánbošena joyeunayama, masna nÿe tmojtsanaboté y Egiptoye jeshëconama imojtsaiseboše. ⁴⁰ Moisés cabá chë tja tsjuanoca chë ángeloftaca yojtsemna ora, chëngbe bachnangbe más uámana amëndayá Aarónbioye mëntšá tmojaniyana: ‘Bëngbe Bëtsabe

cuenta šmayentšpormá canÿe buashinÿinÿana

soye jadórama, bēnga chašúnatsama. Er bēnga quemátstatsēmbo ndayá yojsopasana Moisés, chē Egipciana šonjētsēbuacnáftaca ca.’ ⁴¹ As tmojanma canye buashinýinýana soye mo canye uacnabecá y cha jadórama ba bayēnga tmojanēbaye, y tmojanóboyējuanga cachēnga chē soye tmojanpormáyeca. ⁴² Chē causa, Bēngbe Bētsá chēngbentsana tojtsanojuánañe y cachcá tojesanēnyaye chēngbe bacna soyēnga causa, estrellatémēnga chamotsadoránama. Chca jochnēnguama, Bēngbe Bētsabe juabna oyebuambayēngbe librēšañe mēntsá endayana, ntšamo Bēngbe Bētsá tojanayancá:

Israeloca entšanga,

¿Atše jētschuayama bayēnga chešmēnjanēbaye y chē soyēnga chešmēnjanátšēmbona,

chē canta bnētsana uata entšanga ndoyena luar-entše tšēngaftanga šmonjēftsemna ora?

⁴³ Atše jadóra cuentna, chē Molocbiana jebna soye šmonjanacutsá y cha šmonjánadorana,

y chē Refánbe estréllacnaca cachcá šmonjánama.

Chē soyēnga mo Bēngbe Bētsá cuenta šmonjánbomna y cach tšēngaftanga šmonjanobopormá jadórama.

Mora chē causa atše chanjama, Babilonientsana más chcoye tšēngaftanga chacmotsēnatsama ca” —chiñe endayana.

⁴⁴ “Bēngbe tempsca bēts taitanga entšanga ndoyena luaroca, chē jatsjacama opodena yebna imnabomna; chē yebnentše Bēngbe Bētsá chēngaftaca tojanoyebuambá. Inajebna ntšamo Bēngbe Bētsá Moisésbioye tbojanmandacá, y cha

tojanma ntšamo chaojebuama Bëngbe Bëtsá tbojaninÿinÿecá. ⁴⁵ Bëngbe bëts taitangna chëngbe taitángbentsana chë jatsjacama opodena yebna chëngbiana tmojanóyëngacñe, y chënga chë Canaán luaroye Josuéftaca, chë inÿe luaroquëngaftaca jéntsjava tmojána ora, chë jebna soye tmojanamba y chocna, Bëngbe Bëtsábeyeca chentša entsángbioye Israeloquëngbentsana tmojtanëbuacna; y chë jebna soyna chë tmojanayënjaná luarentše tojanoquedá, rey David yojétsiyenëntscuana. ⁴⁶ David tšabá mandbomná inamna, chíyeca Bëngbe Bëtsá cháftaca puerta yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentše chaotsiyenama. ⁴⁷ Pero Salomón inamna nda chë Bëngbe Bëtsabe bëts yebna tojanjebuá. ⁴⁸ Masque chë celoca Bëngbe Bëtsá, entsangbe jebna yebniñe ndoñe quenatiyena. Ntšamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

⁴⁹ ‘Celoca endmëna chë luare ndayentsana atše tsmánda,

y quem luare endmëna nÿe mo canÿe tšenëtemcá ndayentše atšbe shecuatšënga chjacjaye.

As, ¿ntšamo atšbiana jebna yebna šmochjajebo ca?’ —chë Utabná jayanana—;

‘o ¿ndaye yebnentše atše jóchnama chjobenaye,

⁵⁰ ndegombre cach atše nÿetsca chë soyënga tijamëse ca?’ ”

⁵¹ Esteban mëntsánaca tojanëyana: “Tšëngaftanga nÿets tempo josértama ndëbošënga šmondmëna; šmondbomna ainana mo chë Bëngbe Bëtsábeñe ndošbuáchiyëngbe ainancá,

y Bëngbe Bëtsabe soyëngama nduauenanënga šmondmëna. Tšëngaftanga ndocna te quešmátsboše chë Uámana Espíritu joyeunayana. Ntšamo tšëngaftangbe bëts taitanga monjaniyencá, tšëngaftángnaca cachcá.⁵² ¿Bëngbe Bëtsabe juabna oyebuambnayënguentšana, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entsanga chënga tmojtsanëbaye, y mëngna entsángbioye imojanabuayiyná Cristo, chë ntšamo Bëngbe Bëtsá yobošcá amá yochjánabama. Pero morna, uayayëngbe cucuatšiñe cha šmojábošhona y šmojóba.⁵³ Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” —cha tojanëyana.

Esteban ndëtšbéngaca tmojanóba

⁵⁴ Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnama.

⁵⁵ Pero chë Uámana Espíritu Estébanbe ainaniñe corente yojtsemádaye. Celoye yojontješiye y Bëngbe Bëtsabe buashinýinýanana yojinýe, y Jesús, Bëngbe Bëtsabe catšbioica yojtsatsana.

⁵⁶ As, Esteban tojánayana: “¡Mouenënga, sëntsonýa celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

⁵⁷ Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontsënja.⁵⁸ Chentšana, chënga chë pueblentšana tmojtsanábočna y

ndëtsbéngaca tmojtsanatëchénganja. Chë Estébanbioye mal tmojanquedangna entšayangá tmojtsanenátsejca y canýe bobontse, Saulo ca uabainá, tmojesanábonýiñe chaotsinýenama.

⁵⁹ Ndëtsbéngaca imojtsénanantscuana, Esteban Bëngbe Bëtsáftaca ibojtsencuéntaye y mëntsá tojánayana: “Bëngbe Utabná Jesús, atšbe espíritu šmóyëngaca ca.”

⁶⁰ Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

8

¹ Saulo chentše yojtsemna y tšabá imojtsama ca yojtsejuabnaye, Esteban tmojanóbama.

Saulo yojánama chë Crístbeñe ošbuáchiyënga chamotsesufrínama

Cach te, ínýenga tmojanontšé Jesucrístbeñe ošbuáchiyënga Jerusalenentše ucamenana y jtsamana puerta chamotsesufrínama; chcasna, chënga tmojtsanacheta y Samarioye y Judeoye tmojanáshana. Nýe chë Jesucristbe ichmónënga ndócnoye tmonjánacheta. ² Básefta boyabásenga, Bëngbe Bëtsá adórayëngna, Esteban tmojanamba jauátbontsama y chabiamana puerta tmojánenobošachna. ³ Chëntscuana, Saulo yojtsentšena Jesucrístbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámiamana.

Felipe Samaria luaroca tšabe noticiëngama yojanabuayiná

⁴ Y Jesucristbeñe ošbuáchiyënga tmojanáshanëngna nÿetsquénache imojánabuayiyayeye Jesusbe tšabe noticiënga. ⁵ Chca, Felipe Samarioye tojána y tojanontsé chë Bëngbe Bëtsabe Uámana Uabuayaná, Cristbiamá, chentša entšanga jábuayenama. ⁶ Entšanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe yojtsichamcá tšabá imojtseyeunana. ⁷ Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna. ⁸ Chë soyama chë pueblentša oyenënga corente imojtsóyejuaye.

⁹ Pero canÿe pueblentše Samarioca inamna canÿe boyabása, Simón ca uabainá; cha tempo inamna canÿe bocjuaná y chë Samarioca entšanga chabe soyëngama imojánenjnanaye. Cha yojánichamo cha canÿe uámana entšá canjamna ca. ¹⁰ Y chábioye corente inmayerunana nÿetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inÿanÿnáy ca.”

¹¹ Y ndegombre chënga corente inmayerunana, er cha chë bocjuanana soyëngaca bayté chë entšanga ingñënënga y ojanánënga yojtsabamna. ¹² Pero chë luarentša entšangna, Felipe tmojanoyeuná chë cha yojtsëtsësná tšabe noticiënga Bëngbe Bëtsabe amëndayama y chë

Jesucristbiamá tsábe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye. ¹³ Y cach Simónënaca Jesucristbeñe yojtsošbuáchiye y tojanenábaye, y chentšana cada te Felípeftaca cha yojtsanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

¹⁴ Chë Jerusalenoca imojtsemna ichmónënga tmojántatšëmbona Samarioca entšanga Bëngbe Bëtsabe palabra tmojanóyeunama; as, chora Pedro y Juan choye tmojanichamó. ¹⁵ Pedro y Juan Samarioye tbojánashjango ora, chentše Jesucristbeñe ošbuáchiyëngbiamá Bëngbe Bëtsá tmojanimpadá, as chë Uámana Espíritu chëngbeñe cháúamashënguama jtsemándayama. ¹⁶ Er cabá ni mo cánÿabeñe chë Uámana Espíritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnama imojtsebóseyeca. ¹⁷ As Pedro y Juan chëngbe bestšašinë cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

¹⁸ Simón tojáninÿe, chë ichmónënga entsángbeñe cucuatšënga tmojancjá ora, chë Uámana Espíritu chëngbeñe jamashënguana. As chora Simón chë ichmónënga tojanéyana: —Quem crocénana mosháchiñe, ¹⁹ y átšnaca chë obenana šmatšetá, y ndábeñnaca cucuatšënga chaijajajó ora, chábeñnaca chë Uámana Espíritu cháúamashëngo ca.

²⁰ As Pedro tbojaníyana: —¡Acbe crocénana infiernoye chaotsá y ácnaca, chë Bëngbe Bëtsabe

tšetana soye crocenánaca jobuámiñama yopodena ca tcojajuabó causa! ²¹ Ndegombre, aca bēngaftaca ndoñe quecátsmēna, ni bēngbe trabajo acbiamá quenátsmēna, Bēngbe Bētsabe delante acbe ainaniñe tšabe juabnēnga ndoñe quecátbomna causa. ²² Ngménaca cochjenójuaboye quem bacna soye tcojamama y chca amana cochtsajbaná y Bēngbe Bētsá cochjaimpáda, aca chca tcojájuaboma nderádose cmatjaperdóna. ²³ Atše sēntsetatšēmo, acbe ainaniñe tša bacna juabnēnga ínŷengbiamá yojtsemnama; y bacna soyēnga amana jtsajbanama ndoñe quecátobena causa, aca mo canŷe ntsacjuanacá contsemna ca —Pedro tbojaniyana.

²⁴ As chora Simón tojanéyana: —Bēngbe Utabná atšbiamá šochjaimpáda, ntšamo šmonjauyancá ndoñe chandēpasama ca.

²⁵ Pedro y Juan, ntšamo Bēngbe Utabná Jesucristbiamá tbojaninŷcá y ibnatatšēmbcá entšanga imojtsētsēsnaye. Chentšana, Jerusalenoye tbojésanata y tbojánachnēngo ba Samarioca pueblēnguējana, tšabe noticiēnga entšanga abuaiynaye.

Felipe y chē Etiopía luaroca reinabe uajabuachaná

²⁶ Chentšana, Bēngbe Utabnabe canŷe ángel Felípbioye tbojaniyana: “Moprontá y tsmána luarēngoye motsa, Jerusalenentšana Gaza ca uabaina bēts puebloye benachējana ca.” Chē benachna entšanga ndoyena luarējana yojanachnēngona. ²⁷ As Felipe yojētsētsbaná y tojána. Benachiñe tbojáneninŷyena canŷa Etiopía luarocáftaca. Etiopía luaroca canŷe reiná inamna

y chë boyabásana chabe uajabuachaná y chabe crocénana bojanjá inamna. Chana Jerusalenoye tojánabo Bëngbe Bëtsá jadórama. ²⁸ Chora Etiopía luaroye yojtsataye, chabe cochéshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana librëša yojtsaiualíaye.

²⁹ Chora chë Uámana Espíritu Felípbioye tbojaniyana: “Mobeconá y chë cochésha juachaca cochtsaye ca.” ³⁰ As Felipe betesco yojobeconá. Chora yojouena chë Etiopía luarocá, Isaíasbe uabemana librëša yojtsaiualíaye; as tbojantjá: —¿Chë contsalía soye quecmojtsosertana ca?

³¹ Y chë Etiopía luarocá tbojanjuá: —¿Ntsámo šochjosérta, ndocná šonjabuayenase ca?

Y Felípbioye tbojaniyana: —Diosmanda, atšbe cochëshoye másëngo y atšbe juachaca mabótbema ca.

³² Isaíasbe uabemana librëšañe mëntsá yojtsalíaye:

Cha tmojanánatse mo canye oveshá jóbama cuafjuanatscá;

y chë mo canye oveshá tmojtsëtsbotjné ora, cha iytëca jtsemnana,

chánaca cachcá, chacá tondaye chenátanayana.

³³ Entšanga tmonjanma cha puerta chaosufrima, mo cha canye nduamaná cuaftsemncá y ntsámo ndoñe betsomerecencá cháftaca tmonjanma.

Ndocná nanjobenaye chabe básengbiamá jacuéntana,

quem luarentša chabe vida tmontsanbojuaná causa ca.

34 Chora chë Etiopía luaroca uajabuachaná Felípbioye tbojaniyana: —Diosmanda, šmobuayená, ¿ndabiamama Bëngbe Bëtsabe juabna oyebuambnayá chca yojtsichamo, cachabiamama o ínÿabiamama ca?

35 As Felipe tojanontsé, chë Isaíasbe librëšaňe yojtsayana sóyeca, Jesusbe tšabe noticiënga jábuayenama.

36 Chentša bënëse, canÿe bėjaye obëjniňe juachaňe ibojtsachnëjuana. Chora chë uajabuachaná tojánayana: —Muentše bėjaye entsemna. ¿Ndáyeca ndoňe nanjopódia atše muentše uabainá jtsemnama ca? Diosmanda, šmabaye ca.

37 As Felipe tbojaniyana: —Jesucristbeňe nÿets acbe ainánaca tcojtsošbuáchese, aíňe echanjopódia juabáyama ca.

Y chë boyabása tbojanjuá: —Aíňe, sëntsošbuaché Jesucristo Bëngbe Bëtsabe Uaquiňá yomnama ca.

38 As chë Etiopiocá tojanmandá chë cochësha chauátotonama. Chentšana, nÿets útata chë bėjayoye tbojanashëbëbuástjango y Felipe, chë Etiopioca uajabuachanábioye tbojanabaye.

39 Chë bėjayentšana tbojtanbocna ora, chë Uámana Espíritu Felipe ibojtsánatseňe y chë uajabuachaná ya ndoňe más Felípbioye ibontsonÿaye, pero corente oyejuayá yojtsatoňe. 40 Felipe tojántatšëmbona Azoto bëts puebloca yojtsemnama, y chentšana tojána nÿetsca pueblënguenache chë tšabe noticiënga abuayiynaye, Cesarea puebloye jashjanguëntscuana.

9

*Ntšamo Saulo Crístbeñe ošbuachiyá tojanóbema
(Hch 22.6-16; 26.12-18)*

¹ Saulo chěntscuana cabá Běngbe Utabnábeñe ošbuáchiyěnga yojanautatjná jtsěbáyama. Chama cha tojána chě bachnangbe más uámána aměndayábioye, ² uabemana tsbuanachangá jauátjañama, as chěchangaca jobenayama chě Damascoca judiěngbe enefjuana yebněngoye jama, y chocna, chě Jesucristo tojaninýanýé Benache ustoniñe, boyabásenga o shembásenga tojánýeněse, jótabayama y Jerusalenoye junatsama. Y chca jamama tojánbocna. ³ Pero ya Damasco béconana yojtsaye orna, nýe ndeolpe chabe juachañe celocana canýe běts tcuinýe tojanbuashinýínýena.

⁴ Chora Saulo fshantsoye tojánshajaye y canýe oyebuambnayana tojanuena, měntšá: —Saulo, Saulo, ¿ndáyeca chca šcojtsacmena ca?

⁵ As Saulo tbojantjá: —¿Nda comna, Běngbe Utabná ca?

Y chě oyebuambnayana tbojanjuá: — Atše sěndměna Jesús y aca condama atšbe entšanga chamotsesufrínama. ⁶ Pero matětsbaná y Damascoye mamáshěngo; chentše canýa cmochanjabuayená ndayá jamama cmojtsemnama ca.

⁷ Chě Sáuloftaca imojánajna boyabásenga tša auatjanáněnga imojtsemna y chíyeca ndoñe imontsobena jóyebuambayana; er nýe chě oyebuambnayana tmojanuena, pero ndocná tmonjáninýe. ⁸ As Saulo fshantsentšana tojtantsbaná y tojtanobuchatěfjona ora, tondaye

yontsobena jinÿana. Chcasna, chë ínÿenga tmojëftsano buacuetëntsé y chca, Damascoye tmojanánatse. ⁹ Chentse yojéftsemna unga te, jinÿama ntsobencá, ni ntjascá y tondaye ntjofsiycá.

¹⁰ Damascoca Jesucristbeñe canÿe ošbuachiyá inoyena, Ananías ca uabainá. Cha Bëngbe Utabnábioye mo otjenayoquëcá tbojáninÿe y Bëngbe Bëtsá tbojanियana: —Ananías ca.

As cha tbojanjuá: —Bëngbe Utabná, ¿ndayá ch-jama ca?

¹¹ Y Bëngbe Utabná tbojanियana: —Moprontá y motsa chë “Ndericho tsáshenañe ca” uabáinoye, y Júdasbe yebnentse cochjanotícia canÿe boyabásabiamá, Saulo ca uabainábiamá, Tarso pueblócá; cha mora Bëngbe Bëtsáftaca bentsencuénta. ¹² Saulo ya tonjinÿe mo otjenayoquëcá, canÿe entśá Ananías ca uabainá entsamashjuana y chabe cucuatšënga chabe bestšašifne entsejájua, chca, cha chabuatabínÿnama ca.

¹³ Ananías chca tojanuena ora, tojánayana: —Bëngbe Utabná, banga ba soyënga chabiamá šmonjacuentá; Jerusalenoca tša bacá acbe entšanga imomnënga tojáborye.

¹⁴ Y mora entse bomna mando chë bach-nangbe amëndayëngbentsana, muentse aca otšëmbuanënga jótabayama ca.

¹⁵ As Bëngbe Utabná tbojanियana: —Motsa, er atše cha sënjuábuayana atšbiamá chaotrabajama; chaóyebuambama ndoñe judiëngbeñe, reyëngbeñe y Israeloca entšángbeñnaca, y chca, chënga atšbiamá chamotatsšëmbonama. ¹⁶ Atše cha

chanjinÿinÿiye ntsachetšá ibojtsemna átsbeyeca jasúfriama ca.

¹⁷ As Ananías tojána Saulo yojtsanmëna yebnoye. Tojánamashëngo ora, Saulëbe bestšasiñe chabe cucuatšënga tojanjajó y tbojaniyana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínÿnama y chë Uámana Espíritu acbe ainaniñe jtsemándayama cháumashënguama ca.”

¹⁸ Cachora, Sálulëbe bominÿentšana mo beonbe bobachëshëngcá tojantquécjana, y chca, ibojtsatabinÿna; chora tojantsbaná y tojanenábaye. ¹⁹ Chentšana, Saulo tojanse y añemo yojtsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

Damasco puebloca Saulo entšanga yojanabuayiná

²⁰ Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bétsemnama. ²¹ Chë imojtsuenanënga nÿetscanga imojtsenjanaye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšinë jabáshejuanama.”

²² Pero Saulo cada ora más añémoca yojtsóyebuambnaye y puerte tšabá yojaninÿanÿná Jesús Bëngbe Bëtsabe Uámana Uabuayaná

bétsemnama. Chíyeca chë Damascoca judiënga ndoñe imontsobena ntšamo cha jojuana.

Ntšamo Saulo judiëngbentsana tojtsanachá

²³ Bayté tojanochnëngo ora, judiënga tmojanenoyeuná ntšamo jamëse Saulo jóbama, ²⁴ pero Saulo chë soye tojántatsëmbona. Bnëtë y ibeta, chë bëts pueblentša bëšašanguenache chënga chabiama imojananýá, jtsóbama; ²⁵ pero chë Jesucristbeñe ošbuáchiyënga, ibeta, cha canýe bëts sbarëcuiñe tmojtsanatsuamá, y chë pueblentša shëconana tapiëšëjana tmojtsanëštjango. Chca cha tojanotsbocá.

Saulo Jerusalenoca

²⁶ Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nyëtscanga imojtsebiauatja y ndoñe imontsošbuaché Saulo Jesucristbe ustoná yojtsemnama. ²⁷ Chcasna, Bernabé Sálëbioye tbojëftsanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninyama, ntšamo Bëngbe Utabná tbojaniyanama y ntšamo cha Damascoca tša añémoca Jesusbiam entšanga tojánabuayenama. ²⁸ As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiam bëts añémoca entšanga yojanabuayiyná y ²⁹ yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama. ³⁰ Jesucristbeñe ošbuáchiyënga chca tmojántatsëmbona ora, Saulo

Cesarea luaroye tmojanánatse, y chentšana Tarso pueblroye tmojanichmó.

³¹ Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyëtscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

Pedro Enéasbioye tbojanshná

³² Pedro yojánabuache nyëtsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámna tojána.

³³ Lida pueblentše canya tbojáninyëna, Eneas ca uabainá. Cha jama ndobená inamna y posufta uata jutsnéshañe chca inajájona. ³⁴ Pedro tbojaniyana: “Eneas, Jesucristo tcomnjashná. Matëtsbaná y acbe tjuashe motsejacadá ca.” Y cachora chë jama ndobená tojtantsbaná.

³⁵ Nyëtscanga chë Lida pueblentše y Saronoca oyenënga chë entšá shnaná tmojáninyë. Y as, chënga bacna soyënga amana tmojtsanajbaná y cach orscana tmojanontšé Bëngbe Utabnábeñe ošbuáchiyana.

Pedro tojanma Dorcas cháuatayenama

³⁶ Chë tempo, Jope puebloca yojaniyena canyë shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nyëts tempo tšabe soyënga yojánama y yojanamana chë tojtsëjabetënga jujabuáchana.

³⁷ Pero chora, šocana tbojanshache y tojtsanóbana.

Tmojtsanbebé chentšana, canÿe tsoye tsbanana tsañoca chabe cuerpo tmojtanañajó. ³⁸ Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatšëmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betSCO Jope puebløye mabo ca.”

³⁹ As Pedro tojëftsantsbaná y chë uta boyabásaftaca tojána. Choye tmojánashhajna ora, tmojanánatse chë Dórcasbe cuerpo yojtsemnoye, tsbanánoca; chorna, nÿetsca viudanga šachénaca Pédrëbioye tmojanóbobuashcona y imojtsinÿinÿnaye chë Dorcas yojuañonaná entšayangá y cmešëjuangá, cabá chëngaftaca yojëftsemna ora. ⁴⁰ Pedro tojanmandá nÿetscanga chentšana chamotsebocanama; chora Pedro yojoshëntsamentšiye y Bëngbe Bëtsáftaca ibojencuentá. Chentšana, Pedro chë obanábioye tbojanonÿinÿé y tbojaniyana: “Tabita, matëtsbaná ca.”

As Dorcas tojtanoBuchatefjona y Pédrëbioye tbojáninÿe ora, tojanótbema. ⁴¹ Chora Pedro tbojanábuacueshache y tbojtanatsbaná. As Pedro tojánachembo nÿetsca chë Jesucristbeñe ošbuáchiyënga, chë viudanga y chë ínÿenga, y Dorcas ainá tojtaninÿanÿé. ⁴² Chë soye nÿets Jope pueblentše tojanótatšëmbona y banga Bëngbe Utabnábeñe imojtsošbuáchiye. ⁴³ Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

10

Pedro y Cornelio

¹ Cesarea pueblentše inamna canye boyabása Cornelio ca uabainá; cha inamna chë Italiano ca uabaina soldadëngbe amëndayá. ² Cornelio Bëngbe Bëtsábioye ibnarrespetana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcnyaye chë judiënga ndbomnjémënga jujabuáchama y sempre Bëngbe Bëtsáftaca ibnéncuentaye.

³ Canye te, mo bëts mošenana ora, cha botamana tojáninye mo otjenayoquécá, mëntsá: Bëngbe Bëtsabe canye ángel Cornelio yojtsemnoye yojtsamashjuana y tbojaniyana: —¡Cornelio ca!

⁴ Cornelio chë ángelbioye ibojtsonjaye y auatjananá tbojaniyana: —Taita, ¿ndayá yojtsemna ca?

Y chë ángel tbojaniyana: —Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye.

⁵ Chcasna, mora básefta boyabásenga Jope bëts puebloye michamó y Simón, chë Pedro ca monduabobuatmá, moye chamuánatse. ⁶ Cha posada entsebomna inye Simónbentše, chë bobáchëshiñe trabajayabe yebnentše. Chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.

⁷ Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentsana útata tojánachembo y canye soldádnaca, chabe uajabuachaná, Bëngbe Bëtsá adorayá; ⁸ lempe

ntšamo yojopasacá chënga tojanacuntá y chentšana Jope puebloye tojanichamó.

⁹ Yëfsana mo nÿetsto ora, chënga benachiñe Jope béconana imojtsajnëntscuana, Pedro yebnentša tsbanánoye tojánashëngo, Bëngbe Bëtsáftaca jencuéntama. ¹⁰ Becá tbojánishëntsená y jasama yojtseboše; pero imojtsebopróntantscuana, Pedro mo otjenayoquécá mëntšá tojáninÿe: ¹¹ Celoca yojtsatëfjna y mo canÿe bëts entšayëjuacá yojtsabá y nÿets canta sibientšana yojtsëjonÿana. ¹² Chë entšayëjuañe imojtsemna nÿetscna bayënga, ósojnaye bayënga y nÿetscna shloftšëngnaca. ¹³ Y tojanuena canÿe oyebuambnayana mëntšá: —Motsbaná, Pedro; mobaye y quem bayënga mose ca.

¹⁴ Chora Pedro tojánayana: —Ndoñe, atšbe Utabná. Atše ndocna te chiyáise Moisesbe leyíñe ndoñe yondëlesenciana jasama bayënga y chë jasama ndoñe tšabá imomna bayënga ca.

¹⁵ Y cachiñe tojtëtanuena chë oyebuambnayana mëntšá: —Bëngbe Bëtsá tojalesenciá y canÿe bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

¹⁶ Chë soye unga soyama chca tojanopasá chentšana, chë entšayëjua celoye tojtanátsjua.

¹⁷ Pero Pedro ndoñe yontsetátšëmbo ntšamo tojaninÿcá ndayá chabiana yojtsayanama. Chëntscuana, chë Cornéliëbe ichmónënga noticiánana Simónbe yebnoca tmojánashjajna y shjoca bësocá imojtsobátmana. ¹⁸ Tmojanchembo ora, tmojanënoticiá Simón, chë Pedro ca uabobainá, chentše taibojatanama.

19 Pedro, ndayá tojáninŷama chabosertama yojtsenójuabnantscuana, chë Uámana Espiritu tbojaniyana: “Mouena, muentŷe mora unga boyabásenga cmontsenguá. 20 Motsbaná, mocana matastjango y yapa ntjatenojuabnaycá chëngaftaca cochjá, er atŷe chënga sënjichamó ca”.

21 As Pedro tojtanastjango y chë tmojánashjajnënga tojanéyana: —Atŷe sëndmëna chë smontsenguá cha. ¿Ndáyeca moye ŷmojabo ca?

22 Chora chënga tmojanjuá: —Cornelio ŷonjichamó. Cha endmëna chë soldadëngbe amëndayá, canŷe tŷabá mándbomna entŷá y Bëngbe Bëtsábioye adorayá, y nŷetsca judiënga chabiamá tŷabá mondbëtsoyebuambnaye. Bëngbe Bëtsabe canŷe ángel chábioye tbojabuayená ntŷamo jamana aca chábioye chacotsama, as chë ndayá cha jauyanama cojtsebomncá cha jouenama ca.

23 As chënga tojanëmashengo y posada tojanéyentsame. Yëfsana Pedro chë unga boyabásengaftaca tojána. Básefta Jesucrístbeñe oŷbuáchiyënga Jope pueblentŷënga Pedro tmojantjëmbambá.

24 Chë inŷe yëfsana Cesarea puebloye tmojánashjajna. Chentŷe Cornelio Pédrëbiamá yojtsobatmana, y Cornelio tojanëbuaja pamíllanga y tŷabe amiguëngnaca chentŷe imojtsemna. 25 Pedro tojánashjango ora, Cornelio tojánbocna jajëbenguama y chabe shecuatŷentŷe yojshëntsamentŷiye cha jadórama. 26 Pero Pédrëna tbojtanatsbaná y mëntŷá tbojaniyana: —Matëtsbaná, atŷe cach aquëcá nŷe canŷe entŷá sëndmëna ca.

²⁷ Pedro Cornélioftaca encuéntaye chë yebnentše tojánamashëngo y ba entsanga tojánanyëna, chentše tmojanójtënga. ²⁸ Chora Pedro tojanéyana: — Cach tsëngaftanga šmondětatsëmbo chë judiëngbe leyënguiñe endayana ndoñe yondopodena canye judío ndoñe judío entsángaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinýinýe atše ndocna te šondmëna inýabiama jatsjuabnayana cháftaca jenútanama ndoñe tšabá yondmëna ca. ²⁹ Chíyeca, šmonjobetše ora, ndocá ntjatichamcá nýe sënjabo ca.

Chora tojanatjá: —¿Ndáyeca šmojobetše ca?

³⁰ As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuéntaye y ndeolpe sënjinýe atšbe delante canye boyabása uabuashinýinýana entsayaca bopormaná. ³¹ Cha šonjauyana: “Cornelio, Bëngbe Bëtsá condbétseimpadanama y chë ujabótënga condbétsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca. ³² Básefta boyabásenga Jope bëts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inýe Simónbentše, chë bobáchëshiñe trabajayabe yebnentše, y chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.” ³³ Chcasna, cachora sënjichamó aca jobetšama, y aslëpaye jabama tcojóyaunama. Y as morna, nýetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

*Ntšamo Pedro tojanoyebuambá Cornéliëbe yeb-
nentše*

³⁴ Pedro chora tojanontšé mēntšá jóyebuambayama: —Mora atše šontsosertana, ndegombre Bēngbe Bētsabiamana nyetscanga cachcá uámanēnga imomnama. ³⁵ Nyets luarēnguenache Bēngbe Bētsá júbuajana cha tmojtsatschuaná y tšabe soyēnga tmojtsamēnga. ³⁶ Tšēngaftanga šmondētatsēmbo, Bēngbe Bētsá Israeloca entšanga tojánabuayenama, tšabe noticiēnga jtsóyebuambnayēse, chēnga nyetscanga ainaniñe tšabe ebionana chamotsebomnama, Jesucristbeyeca; y cha endmēna nyetsca entšangbe Utabná. ³⁷ Tšēngaftanga šmondētatsēmbo ntšamo nyets Judeoca tonjanopasama. Chē soye Galilea luaroca tojanobojatsé, Juan entšanga yojanabuayiyná orscana, chēnga bacna soyēnga amana chamotsajbanama y chamuenábayama. ³⁸ Smondētatsēmbo ntšamo Bēngbe Bētsá, Jesús Nazaretocábioye tbojanábuayanama y tojanma chē Uámana Espiritu chabe ainaniñe cháuamashēnguama, y tojanma Jesús corente obená chaotsemnama; y šmondētatsēmbo ntšamo Jesús enjánana entšangbiamana tšabe soyēnga amiñe y nyetscanga chē Satanás yojánama chamosufrimēnga áshnaye, er Bēngbe Bētsá cháftaca yojtsemna.

³⁹ “Bēnga fsēnjáninye y fsēndētatsēmbo lempe ntšamo Jesús tojanmcá Jerusalenoca y nyets Judea luariñe; y cha tmonjanóba, canye cruciñe jacrucificase. ⁴⁰ Pero Bēngbe Bētsá tonjanma unga tianoye cha cháuatayenama y bēngbeñe chaonýnama. ⁴¹ Cha nyetsca entšangbe delante

ndoñe chenátanbocna, pero aíñe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinÿama. Y tojtanayenentsana bënga cháftaca fsënjanse y fsënjanošé. ⁴² Cha šonjichamó entsanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiana y ainëngbiana yochjayana tšabá o ndoñe tšabá tmonjamama. ⁴³ Bëngbe Bëtsabe juabna oyebuambnayënga nÿetscanga cach Jesusbiana tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

Ndoñe judiënga chë Uámana Espíritu tmojanóyëngacñe

⁴⁴ Pedro chë palabrénga cabá yo-jtsóyebuambnantscuana, chë Uámana Espíritu tojánamashëngo nÿetsca chë imojtsuenanëngbe ainaniñe jtsemándayama. ⁴⁵ Chë judiënga Jesucristbeñe ošbuáchiyënga Pédroftaca tmojánabënga imojenjnaná, chë Uámana Espíritu ndoñe judiëngbeñnaca cháumashënguama Bëngbe Bëtsá tojanmama. ⁴⁶ Chënga imojtsuenana chënga inÿetšá jtsebiayangana, chënga tempo ndmabiyañe y jtichámuana Bëngbe Bëtsá bëts soyënga tojanmama.

⁴⁷ Chora Pedro tojánayana: “Pero mëngna chë Uámana Espíritu tmonjóyëngacñe ntšamo bënga tmonjoyëngacñécá. Chcasna, ndocná queochatobenaye jamana chënga uabáinënga ndoñe chamondëtsemnama ca.” ⁴⁸ As Pedro

tojanamëndá chënga jubáyama, Jesucristo jótsëmbonëse. Chentsana chënga tmojanimpadá baseftayté chëngaftaca chaoquedama.

11

Ntsamo Pedro chë Jerusalemoca imojánenefjuana ošbuachiyëngbioye tojanëyana

¹ Jesucristbe ichmónënga y chë Judeoca Jesucristbeñe ošbuáchiyënga tmojántatsëmbona, chë ndoñe judiëngnaca Bëngbe Bëtsabe palabriñe imojtsošbuáchemá. ² Pero Pedro Jerusalemoye tojesaná ora, báseftanga chabiamá ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásënga canjánamna chë más delicadentse base bobachtema tëtšënénga jtsemnama ca, ntsamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. ³ As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

⁴ Chora Pedro lempe chënga tojanacuntá ntsamo chë ndoñe judiëngbioye cha tojána orscana tojanopasama. Cha tojanëyana:

⁵ —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninýe celocana mo canýe bëtš entšëjuacá átšbioye enjétsabeconaye y nýets canta sibiocana enjétsëjonýana.

⁶ Y botamana sënjanrrepará ndayá chë tsoye bëtsemnama y sënjáninýe choye monjëtsemna uamna y tjoca bayënga, ósjojnaye bayënga y nýetscna shloftšëngnaca.

7 Y sēnjanuena canye oyebuambnayana mēntśá: “Motsbaná, Pedro; mobaye y quem bayēnga mose ca.” 8 Chora atše sēnjánayana: “Bēngbe Utabná, ndoñe; atše ndocna te chiyáisese chē Moisesbe leyíñe ndoñe yondēlesenciana jasama bayēnga y jasama ndoñe tšabá imomnēnga ca.” 9 Chentšana cachiñe sēntētanuena chē celocana oyebuambnayana mēntśá: “Bēngbe Bētsá tojalesenciá y canye bayá tšabá jasama yomna ca tojayanēse, ndoñe matsjuabnana chē bayá jasama ndoñe tšabá yontsemna ca.” 10 Chē soye unga soyama chca tonjanopasá y chentšana chē entšējua celoye tontanátsjua. 11 Y cachora unga boyabásenga Cesarea pueblcana ichmónēnga, chē posada sēndbomnentše tmonjánashajna, atše janguanguama. 12 Y chē Uámana Espíritu šonjanmandá atše yapa ntjatenojwabnaysá chēngaftaca jama; y quem chnēnguana Jesucristbeñe ošbuachiyēngnaca átšeftaca tmonjána. Njyetscanga canye entśá Cornelio ca uabainabe yebnoye fsēnjánamashjna; 13 y chana bēnga šonjanacuntá ntšamo tojáninye, cachabe yebnentše canye ángel ibojtsebiatsana y mēntśá tbojaniyana: “Básefta boyabásenga Jope bēts pueblcaye michamó y moye chamuánatse Simón, chē Pedro ca monduabobuatmá, 14 y cha cmochanjabuayená ntšamo aca y acbe yebnentša oyenēnga šmochjotsbocá ca.” 15 As, atše jóyebuambayama sēnjanbojatsé orna, chē Uámana Espíritu tonjánamashēngo chēngbe ainaniñe jtsemándayama, ntšamo bēngbeñe natsana tonjanamashēngcá.

16 “Chora sēnjanenojuabó ntšamo Bēngbe Utabná tonjánayanama: ‘Ndegombre, Juan entšanga béjayeca tonjanēbaye; pero Bēngbe Bētsá chē Uámana Espíritu bochanjíchmuá, tšēngafangbe ainaniñe jtsemándayama cháuamashēnguama ca.’

17 Chcasna, chēngnaca Bēngbe Bētsá chē Uámana Espíritu tonjatsatá, ntšamo bēnga, chē Utabná Jesucristbeñe ošbuáchiyēnga, šonjanatsatacá. Y chca, atše ndoñe quetsátsmēna canye tša uamaná, Bēngbe Bētsá jauyanama ntšamo cha yobošcá ndoñe chaondětsemna ca.”

18 Jerusalemoca Jesucristbeñe ošbuáchiyēnga chē soyēnga tmojanuena ora, ndocá más tmonjantjá y Bēngbe Bētsá tmojtanchuá, mēntšá: —¡Asna, Bēngbe Bētsá chē ndoñe judiēngnaca tojalesenciá chēngbe bacna soyēngama ngmēnaca chamuatenójuaboma y chca amana chamotsajbanama, chē nyetsca tescama yomna tšabe vida chamotsebomnama ca!

Ntšamo Antioquía puebloca tojanobojatsé, entšanga Jesucristbeñe ošbuáchiyana

19 Esteban tmojanóba chentšana, tmojanontsé chē Jesucristbeñe inye ošbuachiyēngnaca jatēcamiyama. As chentšana báseftanga yojtsamna bēn luarēngoye jtsachetēngana Fenicioye, Chipre y Antioquía luarēngoye, y chenache chēnga Jesucristbe soyēngama imojanoyebuambná, pero nye judiēngbiama. 20 Pero báseftanga imojamna Chipre y Cirene luaroquēnga, y chēnga Antioquía bēts puebloye tmojánashjaina orna, chē ndoñe judiēngbeñnaca tmojanoyebuambá, Jesús, chē Utabnabe soyēngama jabuayenase. 21 Bēngbe

Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontsé Bëngbe Utabnábeñe jtsošbuáchiyana.

²² Jerusalenoca Jesucristbeñe ošbuáchiyënga chë soye tmojántatšëmbona ora, Antioquía luaroye Bernabé tmojanichmó. ²³ Bernabé choye tojánashjango orna, tojáninÿe ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nÿetscanga tojanabuayená chamotsiyena nÿets ainánaca Bëngbe Utabnábeñe jtsošbuáchiyëse. ²⁴ Bernabé inamna canÿe entšá tšabe soyënga amá, chë Uámána Espíritu chabe ainaniñe yojtsemándaye y bëtscá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

²⁵ Chentšana, Bernabé Tarso puebloye tojána Saulo janguanguama, ²⁶ y tbojáninÿena ora, Antioquía luaroye tbojëftsanbetše. Antioquía luarentšna canÿe uata nÿetšá Jesucristbeñe ošbuáchiyëngaftaca cánÿiñe ibojëftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

²⁷ Chë tempo, básefta Bëngbe Bëtsabe juabna oyebuambnayënga Jerusalenocana Antioquía luaroye tojána. ²⁸ Chënguentšana canÿa Agabo ca uabainá tojantsá y chë Uámána Espíritbeyeca tojánayana, mëntšá: “Nÿets luariñe entšanga oyeniñe bëtš shëntsana echanjóshjango ca.” Y ndegombre chca tojanopasá, Claudio Romoca bëtš mandado inamna ora. ²⁹ Chcasna,

chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocénanënaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama. ³⁰ Chca tmojanma, y Bernabé y Sáuloftaca chë crocénana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbioye.

12

Santiago tmojanóba; Pedro tmojanëtame

¹ Chë tempo, rey Herodes básefta Jesucristbeñe ošbuáchiyënga tojánishëche jutámiamá y játsëtšënama. ² Tojanmandá espadëjaca chamóbama Santiago, Juanbe catšata; ³ y Herodes tojántatšëmbona judiënga chë soye tojanogúsetama; as, cha tojanmandá Pédrënaca chamutámiamá. Chca tojanopasá chë levadúraca ndëpormana tandëse sayté, Bashco fiesta ora. ⁴ Pedro tmojánishache orna, Herodes tojanmandá chamutámiamá, y chë cárceloca soldadënga cantátanga tmojanenojatá cántentše cha chamotsebojanýama. Herodes yojëtsejuabnaye, Bashco fiesta tojochnëngo ora Pedro juabocnama, entsangbe delante jayanama cha chaóbanama. ⁵ Chcasna, Pedro yojtsëtámëna y chë soldadëngna corente imojtsebojanýá. Pero Jesucristbeñe ošbuáchiyëngna bëtscá Bëngbe Bëtsá imojtseimpadana Pédrëbiamá.

*Bëngbe Bëtsá tojanma Pedro natjëmbana
cárcelocana cháuaisebocnama*

6 Canye te yojtsájamna Herodes entšangbe delante Pedro juabocnama. Chë te ibetna, Pedro yojtsomañe y cátatoica canye soldado yojtsemna; uta cadenëjuaca yojtsabatsëcna y inye soldadëngna bësócana chë utámeniñe imojtsebojanýá. 7 Ndeolpe, Bëngbe Utabnabe canye ángel tojánbocna, y lempe chë utámeniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojaniyana: “Betsco motsbaná ca.” Y cachora chë cadenëjuangá Pédrëbe buacuatšënguentšana tojanatquëcjana, 8 y chë ángel tbojaniyana: “Matichëtjo y matóshecochëtjo ca.” Pedro tojanma ntšamo chë ángel tbojaniyancá, y chora chë ángel tbojátaniyana: “Mataquëfsayé y šmasto ca.”

9 Pedro utámenocana chë ángel ibojtsëstona, pero ndoñe yontsetátšëmbo añe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinýana mo canye otjénayoca cuaftsemncá ca. 10 Y útentše chë soldadënga imojtsebojanýajana chata tbojánachnëngo y yerëša bësásoye tbojánashjango, chë ndayëša yojanamna tsáshenoye jabocnama; y chë bësásana nye cachabe ponto yojotëfjo. Chentšana tbojëftsanbocna ora, canye tsáshenëjana ibojtsaye, y nye ndeolpe chë ángel Pédrëbentšana yojtsojuánañe.

11 Nya chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšentšana y lempe ntšamo judiënga átšeftaca jamama imojuabnámna ca.”

¹² Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cánÿiñe imojtsemna, Bëngbe Bëtsáftaca encuéntaye.

¹³ Pedro chë tsashenoica bësásoca tojanchembo ora, canÿe oservená, Rode ca uabainá, tojánbocna jarrepárama. ¹⁴ Chë oservená Pédrëbioye tbojanoy-atëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tsabe noticia jaúnayama, Pedro bësoca yojtsemna ca.

¹⁵ Chë tsoca imojtsemnëngna chora tmojanियana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojanियana: “¡Chabe ángel ctsemna ca!”

¹⁶ Chëntscuana Pedro cabá yojtsechembuana; tmojánebiatëfjo y tmojáninÿe ora, chënga puerte imojenjnaná. ¹⁷ Pero Pedro tojánëfjatsëmbo iytëca chamobiamama y tojanacuntá ntšamo Bëngbe Utabná utámenocana tbojánatsbocama. Chentšana tojanëyana: “Ntšamo tonjopasama Santiago y chë Jesucristbeñe inÿe ošbuáchiyënga šmochjaúnaye ca.”

Chora Pedro chë yebnentšana tojtáisebocna y ínÿoye yojáta.

¹⁸ Tojanbinÿna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa.

¹⁹ As Herodes tojanmandá Pedro chamotsenguan-guama; pero jtsinÿenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanÿá soldadënga jtsëbáyama. Chë soyënga tojanochnëngo chentšana, Herodes

Judea luarentšana tojéftsanbocna y Cesarea luaroye tojtsanoñe, y choca tojtsanoquedañe.

Herodes tojanóbana

²⁰ Herodes corente yojtsetsátjaye Tiro y Sidonoquëngaftaca; as chënga tmojanenoyeuná Heródesbioye jama. Canye uámana uajabuachaná, Blasto ca uabainábioye tmojanayeumaná, y chana tojanašebuachená Herodes jauyanama ndoñe más entjayánanënga chamondétsemnama, er Tiro y Sidonoca entsanga vida imnabomna Heródesbe luaroca sanángaca. ²¹ Chcasna,

rey Herodes inye tescama tojánachembo. Chë tena, jóyebuambayama Herodes uámana entsayaca yojtopórma y yojótbema chabe mándaye tbemanentše; chentšana tojanonguamé. ²² Chora entsanga tmojanontsé mëntšá uayebuáchana: “¡Chë entsoyebuambná cha entsá ndoñe quenátsmëna! ¡Chana canye dios entsemna ca!”

²³ Cachora, Bëngbe Bëtsabe canye ángel tojanma Herodes šocana chaboshachama, chabe cuenta Bëngbe Bëtsá chamuatschuama entsanga ndoñe yonjáuyana causa. Herodes tojanóbana mamángaca sasná.

²⁴ Pero chë tempo más bëtsá entsanga Bëngbe Bëtsabe palabra imojtsuenana y Jesucristbeñe imojtsošbuáchiye.

²⁵ Bernabé y Saulo chatbe trabajo tbojéftsanma ora, Jerusalenocana Antioquía luaroye tbojésanata y Juan, chë Marcos ca uabobuatmá, chátaftaca tmojéftsanbetše.

13

Bernabé y Saulo tbojanbojatsé Bëngbe Bëtsabe trabajo jamama

¹ Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyebuambnayënga y ošbuachiyëngbioye abuatambayënga. Chënga imojanabaina Bernabé, Simón (chë Sibetá ca uabobuatmá), Lucio Cirenocá, Manaén (nda tojanoboché cányiñe Herodes, chë Galileoca réyefata) y Saulo. ² Canye te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espíritu tojánayana: “Mora šmochjalesencia Bernabé y Saulo tsëngaftangbentsana chabuétsebocnama; chatna canye trabajuama sënjabacacá ca.”

³ Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuéntantscuana, chëngbe cucuatšënga chatbe bestšaše juatsboica tmojancjá, chatbe trabajuñe chaújabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

Bernabé y Saulo Chipre luaroca

⁴ As Bernabé y Saulo, chë Uámana Espíritbeyeca ichmónata, Seleucia ca uabáinoye tbojánata y chentšana bejaycá, Chipre luaroye. ⁵ Salamina bëts puebloye tbojánashjango ora, tbojanontsé Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

⁶ Njyets chë luarëjana tmojánachnëngo orna, Pafos puebloye tmojánashajna; y chentše tmojáninýena

canÿe judío tatsëmbuá, Barjesús ca uabainá. Cha yojánichamo cha canjamna canÿe Bëngbe Bëtsabe juabna oyebuambnayá ca, pero ndoñe chca yonjamna. ⁷ Chë tatsëmbuá inatrabájaye chë Chipre luaroca mandadbiana, Sergio Paulo ca uabainá; y chë mandadna corente osertaná inamna. Cha yojtseboşe Bëngbe Bëtsabe palabra jouenama; as tojanmandá Bernabé y Saulo jobiatsana. ⁸ Pero chë tatsëmbuá, grieguiñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsoşbuáchema, ntşamo chë Jesucristbeñe oşbuáchiyënga imojanoşbuachecá. ⁹ Chora, Saulo chë Pablo ca imojanábobuatmabe ainaniñe chë Uámana Espíritu corente yojtsemándaye; as chë tatsëmbuábioye yejuana ibojonÿinÿiye, ¹⁰ y tbojaniana: “¡Abuambnayá, puerte bacna entşá, Satanasbe uaquiñá y tşabe soyënga ndoñe chaondëtsebínÿnama trabajayá! Bëngbe Utabnabe nÿetsca ndegombre soyëngama aca contsichamo uayátsenaye soyënga yojtsemna ca. ¹¹ Mora, Bëngbe Bëtsá cmochanjacastíga, jtaná cochanjoquéda y baseftayté jinÿama quecochatobenaye ca.”

Cachora Elimas mo ibetiñcá yojoquéda y ibojt-songuaye canÿa buacuetëntşnana chabuánatsama, jtaná yojtsemna causa. ¹² Chë mandado chca tojáninÿe ora, Jesucristbeñe yojtsoşbuaché y yojen-jnaná Bëngbe Utabnabe soyënga tojanatsjínÿama.

Pablo y Bernabé Antioquía pueblentşe, Pisidia luaroca

¹³ Pablo y chabe enutënga, Páfosocana, bejaycá Perge puebloye tmojátananga, Panfilia luaroca.

Pero Juan tojésanabashejuana y Jerusalemoye tojésanshëcona. ¹⁴ Pergentsana Antioquía pueblöye tbojátanata; chë pueblo inamna Pisidia luare béconana. Chentsna, ochnayté, chë judiëngbe enefjuana yebnoye tbojánamashëngo y tbojanótbema. ¹⁵ Moisesbe leyíñe y Bëngbe Bëtsabe juabna oyebuambnayëngbe uabemana librësangañe tmojanalía orna, chë enefjuana yebnentša mándayënga canya tmojanichmó chënga jáuyanama: —Israeloquënga, bënga fsëntseboşe entsanga chašmabuayená, nderado ndayá jayanama šmojtsebošnëse, muentša entsanga añemo chamotsebošnëse ca.

¹⁶ As Pablo tojantsá y entsángbiöye cucuátseca tojánefjatsëmbo iytëca chamobiamama, y tojánayana: —Smochjouena Israeloquënga y ndoñe judiënga Bëngbe Bëtsá adórayënga. ¹⁷ Israeloca entsanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtscanga chamotsemnama, chënga Egiptoca inye luarocana ashjajnëngcá imojoyena ora. Y chentsana, cachabe obenánaca chë luarocana chënga tojésanëbuacana. ¹⁸ Canta bnëtsana uata nyetsá, Bëngbe Bëtsá entsanga ndoyena luaroca chënga yojanëuantana, ¹⁹ y cha tojanma chë Canaán luaroca canyësëftentša entsanga chamopochocama y bëngbe bëts taitanga chëngbe fshantsënga nduiñënga tojánabiana. ²⁰ Chë tempo, chë Bëngbe Bëtsá Abrahámbyöye quem fshantse jatsetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntsüana, canta patse y shachna

bnětsana uata tojanochněngo.

“Chentsana, Běngbe Bětsá chěngbiana mandaděnga tojánabiana, Běngbe Bětsabe juabna oyebuambnayá Samuel chěngbe mandayá yojěftsemna tempěntscuana. ²¹ Chentsana,

Israeloquěnga Samuel tmojanimpadá canye rey chabojayé chaotsaměndama; as Běngbe Bětsá Saúblioye chěngbe rey tbojánbema, canta bnětsana uatěscama. Saúl inamna Cisbe uaqiñá y Benjaminbe běts pamillanguentsá.

²² Más chcoyna, Běngbe Bětsá Saúblioye chě mandayentsana tbojtsanjuaná, y chentsana Davídbioye mo chěngbe reycá tbojánbema. Chabiana Běngbe Bětsá tojánayana: ‘Atše sěndětatsěmbo, David, Isaíbe uaqiñá, canye tšabe entšá yomnama y chama atše sěndoyejuá, y cha sempre enděprontana ntšamo atše stsebošcá jtsamama ca.’ ²³ Davídbentsana canye entšá Jesús enjamna, nda Běngbe Bětsá tbojanichmó Israeloca entšanga jabátsebacama, ntšamo cach Běngbe Bětsá chěngbe běts taitanga tojanašebuachenacá.

²⁴ Cabá Jesús nděbocna ora, Juan nyetsca Israeloquěnga tojanabuayená bacna soyěnga amana chamotsajbanama y chamuenábayama.

²⁵ Juanbe trabajo jopochócama yojtsobeco ora, cha tojánayana: ‘¿Nda atše tsměnama tšěngaftanga šmojuabná ca? Chě tšěngaftanga šmontsejuabná atše tsměna ca cha, atše ndoñe quetsátsměna. Pero átšbentsana echanjabo canya, y atše merecido taitatobuajoñe ni mo jotsejbiyama chabe shecochětjoněshentsá corriēja jajafjonama ca.’

²⁶ “Chcase morna, Abrahámbentsana entšanga y ndoñe judiěnga Běngbe Bětsá adórayěnga;

bëngbiana entsemna quem buayenana soye, chë Bëngbe Bëtsá entsanga játsebacana. ²⁷ Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentše, Jerusalenentša oyenënga y chentša mándayënga ndoñe quenjátanësertana nda Jesús bétsemnama, y chë tmojtsalía soyëngama cach ndoñe. Y chca, chënga Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe libréšangañe iuabemancá. ²⁸ Y masque ndocna bacna soye tmonjáninÿena Jesús jóbana chabotsemnama, Pilato tmojanimpadá chaomandá chábioye jóbama. ²⁹ Chentšana, lempe ntšamo Bëngbe Bëtsabe uabemana palabrënguiñe iuayancá Jesúséftaca tojanochnëngo ora, chabe ústonënga chë cruzocana tmojtanëštjango y tmojanatbontsá. ³⁰ Pero Bëngbe Bëtsá tojanma Jesús cháuatayenama. ³¹ Chë Galileocana Jerusalenoye cháftaca tmojánanga, baytentscuana Jesús yojánebuacuana; y morna, lempe ntšamo Jesusbiana tmojaninÿcá, chënga entsángbeñe montsoyebuambná.

³² “Y chca, mora bënga chë tsabe noticiënga cbontsëtsësná. Ntšamo Bëngbe Bëtsá bëngbe bëts taitanga tojanašebuachenacá, ³³ cha tonjama, bënga chë chëngbe entsanguentšëngbiana, chca chaotsemnama. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana palabrënguiñe, segundo salmentše mëntšá tojanábema, ntšamo Bëngbe Bëtsá Jesúsbioye tbojaniyanama:

Aca atšbe uaquiñá condmëna.

Mënté entsanga sënjinÿanÿé aca atšbe Uaquiñá
comnama ca.

³⁴ Y tempo Bëngbe Bëtsá chabe uabemana
palabrënguiñe tojaninÿanÿé cachá jamama Jesús
cháuatayenama y ndoñe cachiñe chaondóbanama,
mëntšá tojánayana ora:

Chë ndegombre soyënga y chë tšabe bendi-
cionënga ntšamo David sënjanšbuachenacá,
tšëngaftanga chochanjátataye ca.

³⁵ Inÿoca Bëngbe Bëtsabe uabemana palabrënguiñe,
Salmos librëša uabiamnayá, mëntšá tojanábema
ntšamo Jesús Bëngbe Bëtsábioye tbojaniyanama:

Aca ndoñe quecochatsleséncia atšbe cuerpo,
chë acbe Uámana oservenabe cuerpo
chaotsopochocama ca.

³⁶ David, chabe tempo imojoyenëngbiana tojanma,
ndayá cha chaomama Bëngbe Bëtsá tojanjuabocá.
Cha tojanóbana y tmojanatbontsá chë chabe bëts
taitángbioye tmojanëtabuantsá luarentše, y chabe
cuerpo tojanopochocá. ³⁷ Pero chë Bëngbe Bëtsá
tojanma chauatayenamabe cuerpna, ndoñe ton-
janopochocá.

³⁸⁻³⁹ “Asna, baconga y batanga, atše sëntseboše
tšëngaftanga quem soye chašmotsetátšëmbo:
Ndayá Jesús tojanmama, entsanga chëngbe
bacna soyëngama perdonánënga montsemna.
Jesúsbeycá, nÿetsca chábeñe tmojtsošbuáchenga,
bacna soyëngama perdonánënga mochántsemna.
Ntšamo Moisesbe leyiñe iuayancá tmojanmama,
chënga ndoñe tmonjanobená chca perdonánënga
jtsemnama; nÿe Jesúsbeñe jtsošbuáchiyëse
chënga perdonánënga jtsemnana. ⁴⁰ Cuedado

šmochtsebomna, ntšamo Bëngbe Bëtsabe juabna oyebuambnayënga tmojanayancá, tšëngaftangaftaca ndoñe chaondochnënguama.

⁴¹ Bëngbe Bëtsá mëntšá tojánayana:

Smochjouena. Tšëngaftanga chë ntšamo atše ti-jayancá šmojtsábotenga,

ojnanánënga šmochántsemna y šmochanjóbana.

Tšëngaftanga cabá vida šmobomnëntscuana, atše bëts soyënga chanjëftsema,

y masque ndánaca chë soyëngama chacmojt-sacúnta,

tšëngaftanga chiñe ndoñe quešmochatošbuáchiye ca” —Pablo tojanoyebuambá.

⁴² Pablo y chabe enutënga chë judiëngbe enefjuana yebnentšana tmojëftsanbocna ora, chë ndoñe judiënga chëngbioye tmojanaimpadá, chë inye ochnaytescama chë soyëngama más jábuayenama. ⁴³ Chentše chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábioye imojánadorana mo chë judiëngcá, Pablo y Bernabé tmojanëseto. Y chatna chënga tmojanabuayená nýets tempo chamotsejuabnama, Bëngbe Bëtsá chëngbiamama tšabe soyënga yojtsamama.

⁴⁴ Chë inye semana, chë ochnaytena, nýa mo nýetsca chë pueblentše oyenënga tmojanobeconá Bëngbe Bëtsabe palabra jouenama. ⁴⁵ Pero ba entšanga choye jouenama tmojánama chë judiënga tmojáninýe ora, tmojanotjayaná, ba entšanga Pablo imojtseyeunanama; as chënga tmojanontšé mocá ichámuana ndayá cha yojtsóyebuambnama, y chábioye oyenguayana. ⁴⁶ As Pablo y Bernabé

más añémoca mēntśá tbojánayana: “Endánēyta, natsana tšēngaftanga, chē judiēnga šmōmnēnga, Bēngbe Bētsabe palabra jshabuayenana. Pero tšēngaftangna chē palabra šmontsaboté, y šmontsejuabná tšēngaftangbiana ndoñe tšabá yontsemna chē nŷetsca tescama yomna tšabe vida jtsebomnana ca; chē causa, bēnga fchantsoñe chē ndoñe judiēngbeñe Bēngbe Bētsabe palabra jóyebuambayama. ⁴⁷ Er Bēngbe Bētsá chama šjanichamó, mēntśá jauyanēse:

Aca tcbonjuábuayana chē ndoñe judiēngbioye tšabe noticiēnga jábuayenama, chaósertama.

Y chca, aca chēngbiana cochántsemna mo canŷe binŷnayacá.

Chca, ábeyeca nŷets luarēnguenache entśanga atše chanjatsebacá ca.”

⁴⁸ Chē ndoñe judiēnga chca tmojanuena ora, puerte imojtsóyejuaye y tmojanontśé mēntśá íchámuana: “Bēngbe Utabnabe palabra tšabá bēngbiana entsemna ca.” Y chora, chē nŷetsca tescama yomna tšabe vida jtsebomnama Bēngbe Bētsá tempo tojánabacacanga, tmojanontśé Jesúsbeñe jtsošbuáchiyana. ⁴⁹ Y chca, nŷets chē luariñe más entśanga Bēngbe Bētsabe palabra imojtsuenana. ⁵⁰ Pero chē judiēnga tmojanoyebuambá, shembásengaftaca Bēngbe Bētsá adórayēnga y uámanēnga, y chē pueblentśa uámana taitāngaftaca, jamama Pablo y Bernabé chabosufrima y chē luarentśana jtēbuacnama. ⁵¹ As, Pablo y Bernabé tbojésanshecstētonata, judiēnga jinŷanŷiyama chēnga ndoñe tšabá tmojanmama; y chentśana, Iconio puebløye

tbojtsanoñe. ⁵² Pero Jesucristbeñe ošbuáchiyënga corente oyejuayënga imojtsemna, y chë Uámana Espíritu chëngbe ainaniñe corente yojtsemándaye.

14

Pablo y Bernabé Iconio puebloca

¹ Iconioca, Pablo y Bernabé cányiñe tbojánamashëngo chë judiëngbe enefjuana yebnentše y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché.

² Pero chë judiënga Jesucristbeñe ndošbuáchiyënga, chë ndoñe judiëngbioye tmojanayënjaná, Pablo y Bernabebiana podesca chamotsejuabnama.

³ Chíyeca, Pablo y Bernabé bayté chentše tbojanotoná y ndauatjca Bëngbe Utabná Jesucristbiana tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entšanga tojaninñanýé, ndayá chë ichmónata ibojtsoyebuambnacá ndegombre bétsemnama, chë Bëngbe Bëtsá nyetscanga iuababuánýeshanana.

⁴ Pero nyetsca chë pueblentša entšanga ndoñe cachcá imontsejuabnaye; ínýenga chë judiëngaftaca imojtsemna, y ínýengna chë Jesucristbe ichmonátaftaca. ⁵ As, chë judiënga y ndoñe judiënga chentša mandayëngaftaca tmojanenoyeuná chata jtsatsetšenama y ndëtsbéngaca jtsébáyama.

⁶ Pero Pablo y Bernabé chama tbojántatsëmbona orna, tbojtsanëchañe Litra y Derbe puebløye, Licaonia luaroca, y choça chábuañe luarëngoye; ⁷ y chë luarënguenáchnaca,

chata Jesucristbe tšabe noticienga entšanga tmojanabuayená.

Listra puebloca, ndëtsbéngaca Pablo tmojtsanatëchënganja jtsóbama

⁸ Listra puebloca inamna canye boyabása jama ndobená. Ndocna te yondobena jana, chca cosheto inónyna causa. Chë boyabásana yojtsetbemana ⁹ ouenana ntšamo Pablo yojtsichamcá. Y Pablo chábioye tbojanonýinýé ora, tojántatšëmbona chë šocá tša yojtsošbuáchema, shnaná jtsatsmënama; ¹⁰ as Pablo, juayebuáchenëse tbojaniana: “¡Motsbaná y acbe shecuatšëngaca tšabá motsa ca!”

Chora chë boyabása, canye jontsënjëse tojantsá y yojóntša anana. ¹¹ As chë entšanga, ndayá Pablo tojanmcá tmojáninýe ora, tmojanontšë uayebuáchana chë Licaonia luarentša biyañe, mëntšá: “¡Bëngbe diosënga bëngbioye tbojátšma mo entšatcá ca!”

¹² Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inýe diosëngbiana oyebuambnayacá. Páblëbioye chca imojtsábobuatma, er cha más yotsoyebuambná. ¹³ Zeusbiana chentša bachna inabomna canye yebna chë pueblo chaboca, chábioye jadórama. Chë bachna, uacnënga tojanënatse y uantšëfjushangá tojanëyamba chë Zeus jadórama yebnentša amashjuanoye; y cha y chë entšanga imojtseboše chë uacnënga jashebuáyana y jajuinýiyana, chca, chë ichmonátbioye jadórama.

14 Bernabé y Pablo chama tbojántatsëmbona ora, entsáyá tbojtsanenánatsajatanëca, entsanga jinÿanÿiyama, ntšamo chënga imojtsamcá chata tondaye yonjógusetama, y tbojëftsannotjajo entsangbe tsëntsajana y mëntšá ibojtsaychembumbuana: 15 “Baconga y batanga, ¿ndáyeca chca šmojtsama ca? Bëndata cach tsëngaftangcá entsata fsëndmëna. Muentše bëndata fsëntsemna nÿe jábuayenama Bëngbe Utabná Jesucristbe tsabe noticiënga, tsëngaftanga chë quem ndoservena soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nÿetsca béjayënga y lempe ntšamo chenache yobinÿncá. 16 Masque tempo, Bëngbe Bëtsá entsanga tojanalesenciá cada ona chaoma ntšamo tojtsejuabnacá, tsabá cachëngbiana yojtsémnayeca, 17 Bëngbe Bëtsá ndocna te ntjájbanana tsëngaftanga jtsinÿanÿnayana, cachá tojama tsabe soyëngaca, mocna Bëtsá cha yomnana. Cha endama tsëngaftangbiana chauftema y chë matënga botamana chaoshájonama, y becá saná cmondatsatná; y cha endama tsëngaftangbe ainaniñe corente oyejuayana chašmotsebomnama ca” —chata tbojánayana.

18 Masque chë soyënga tbojánayana, nÿe batsatema más bën y ya ndoñe matbënjanobenata chë entsanga jtsëuyanana uacnënga jashebuáyama, chca, chátbioye jadórama.

19 Chca ora, básefta judiënga tmojánashajna Pisidioca, Antioquíocana y Iconiocana, y chentša entsángbioye tmojanayëñjaná, Jesucristbe

ichmonatbe contra chamotsemnama. Chcasna, Pablo ndëtsbéngaca imojtsénanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemnaca. ²⁰ Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebløye tojtesaná; y chë yëfsana, Bernabéftaca Derbe puebløye tojána.

²¹ Derbe puebløca Jesucristbe tšabe noticiënga entšanga tmojanabuayená, y chca, entšanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiøye. ²² Chë luarënguenache chata ibojánana chë Jesucristbe ustonëngbiøye atañëmuaye, cada te chábeñe más chamotsošbuáchema. Y entšángbiøye tmojanëyana: “Bëngbe Bëtsabe amëndayøye jamashënguanma, bënga šontsamna quem luarentše bëtská jëftsepadecénana ca.” ²³ Nyetsca ošbuachiyëngcá enefjuanenache, bëtsëjemëngcá mándayënga tmojanabacacá, chentša Jesucristbeñe ošbuáchiyënguentsana, cachënga chentša ošbuachiyëngbiøye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuénta ora, cha tmojanimpadá, chë ošbuáchiyënga Bëngbe Utabnabe cucuatšinë chamotsemnama, ndábeñe chënga imojtsošbuaché.

Pablo y Bernabé, Sirioca Antioquía puebløye tbojtanata

²⁴ Pisidia luarëjana tbojánachnëngo ora, Panfilia luarøye tbojánashjango. ²⁵ Perge pueblentše

Jesucristbe tšabe noticiënga entšángbioye tmojanabuayená, y chentšana Atalia puebloye tbojánata. ²⁶ Chentšana, Bernabé y Pablo, bejaycá tbojtánata Siroca Antioquía puebloye. Chentša entšanga Bëngbe Bëtsá tmojanimpadá chata chabe cucuatšinë chabotsemnama, chë trabajuiñe chaotsanýenama; y chorna, chë trabajo ya tbojanpochocá. ²⁷ Choye tbojtánashjango ora, nyetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninýanyé, chë ndoñe judiëngnaca chamotsobenama Jesucristbeñe jtsošbuáchiyama. ²⁸ Y Pablo y Bernabé bayté chentše tbojanototoná Jesucristbeñe ošbuáchiyëngtaftaca.

15

Ichmónënga y bëtsëjemëngcá mándayënga Jerusalenocá tmojánenefna jencuëntama

¹ Chë tempo, báseftanga Judeocana áshjajnënga tmojanontsé, Antioquía pueblentše, chentša Jesucristbeñe ošbuáchiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyinë endayancá, ndoñe quenátopodena tšëngtaftanga atsebácanënga jtsemnama ca.”
² Chíyeca, Pablo y Bernabé jabuachana chca buatëmbayëngtaftaca imojánenatsëtsnaye. Cabana, tmojanëbuáyana Pablo, Bernabé y ínýenga Jerusalenoye chamotsama, choca chë Jesucristbe ichmónëngtaftaca y chë chentše

Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

³ Chcasna, chë Antioquioca imojánenefjuana Jesucristbeñe ošbuáchiyënga Jerusalenoye chënga tmojanichamó. Fenicia y Samaria luarëjana imojtsachñëjuana ora, chënga tmojanacuntá ntšamo chë ndoñe judiënga chëngbe tempsca soyënguiñe ošbuáchiyana tmojtšanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

⁴ Pablo y chë ínÿenga Jerusalenoye tmojánashjajna ora, chentša Jesucristbeñe ošbuáchiyënga, Jesucristbeñe ichmónënga y bëtsëjemëngcá mándayënga chëngbioye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá. ⁵ Pero básefta fariseunga, chora ya Jesucristbeñe ošbuáchiyënga, tmojantsá y mëntsá tmojánayana: “Chë ndoñe judiënga entsamna chë más delicadëntse base bobachtema tëtšenënga jtsemnana, bënga judiëngcá; y tšëngaftanga cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

⁶ As, chë Jesucristbeñe ichmónënga y bëtsëjemëngcá mándayënga tmojánenefjna jencuéntama, chë ndoñe judiënga aíñe o ndoñe yonjánamnama chë más delicadëntse base bobachtema tëtšenënga jtsemnama, ntšamo chë judiënga imojanamancá. ⁷ Bën y bëtscá chënga tmojanencuentá chentšana, Pedro tojantsbaná y mëntsá tojanëyana: “Jesucristbeyeca catšátanga,

tšëngaftanga šmondëtatšëmbo, ya bayté entsemna Bëngbe Bëtsá tšëngaftangbentsana atše šonjanábuayana, Jesucristbe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema. ⁸ Bëngbe Bëtsá jtsetatšëmbuana lempe ntšamo entšanga tmojtsejuabnacá. Y cha šonjaninÿanyé, chë ndoñe judiëngnaca innobena chabe entšanga jtsemnama, chábeñe tmojtsošbuáchese, chë Uámana Espíritu chëngbe ainaniñe cháuamashënguama cha tojanma ora, ntšamo cha bëngbe ainaniñe tojanmcá. ⁹ Y chca, Bëngbe Bëtsabiana nÿetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnama y ainaniñe tšabe juabna chamotsebonnama, Bëngbe Bëtsabe palabriñe jtsošbuáchiyëse. ¹⁰ Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplínama, mo nda ínÿabioye uauta uasmanësha cuaftsasmëmnacá; pero lempe chë mandënga, ni bëngbe bëts taitanga ni bënga ntsobenana jocúmpliana. ¹¹ Y chca ndoñe chaondëtsemna. Bënga mondošbuaché bënga atsebácanënga imomnama Bëngbe Utabná Jesús chabe tšabe juabna šojaninÿanyéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanéyana.

¹² Chorna, chentše imojtsemna entšanga

n̄yetscanga iytēca tmojanobiamā, y tmojanuena Bernabé y Pablo jtsóyebuambnayana, chē bēts soyēngama, Bēngbe Bētsabe obenana entšanga jin̄yan̄iyama, y in̄ye soyēngama chabe obenánaca, ntšamo chē ndoñe judiēngbeñe Bēngbe Bētsá chátaftaca tojanmcá.

¹³ Chē útata jóyebuambayama tbojanpochocá ora, Santiago mēntšá tojánayana: “Jesucristbeyeca catšátanga, šmochjouena: ¹⁴ Simón šonjabuayená ntšamo Bēngbe Bētsá natsana tojanin̄yan̄yé, chē ndoñe judiēngnaca cha iuan̄yēnama, y chíyeca cha chēnguentšana banga tojubuáyana chabe entšanga chamotsemnama. ¹⁵ Ntšamo Simón šonjabuayenacá entsemna cachcá ntšamo chē Bēngbe Bētsabe juabna oyebuambnayēnga tmojanayancá, ntšamo yochjanopásama y ntšamo Bēngbe Bētsabe uabemana palabrēnguiñe endayancá, mēntšá:

¹⁶ Chentšana atše chanjésabo

y chē Rey Davidbe pamíllanga cachiñe uámanēnga chantabiamā;

mo nda can̄ye uáshajayena yebna tojētsjebcá, atše, Davidbe pamíllanga cachiñe uámanēnga chantabiamā;

¹⁷ chca, chē in̄ye entšanga chamonguango ndayá jamana atše, tšēngaftangbe Utabná, más chašmotsábuatmama,

n̄yetsca ndoñe judiēnga, chē atšbe entšanga chamotsemnama atše tijábacanga.

¹⁸ Chca atše, tšēngaftangbe Utabná sēntsichamo, nda ya bayté entsemna tonjanma entšanga chē soyēnga chamotsetatšēmbuama ca —chiñe endayana.”

19 Chentšana Santiago mēntšá tojaněyana: “Chíyeca atše sēntsejuabná, bēnga ndoñe šontsamna chē ndoñe judiēngbiama jamana más totcá chaotsemnama Jesucristo jtséstonama. 20 Chamna, šontsamna chēnga juabuábiamana y jáuyanana ndoñe chamondětsesá, sananga chē ndaye soyēnga entšanga tmojuabná diosēnga yomna ca jadórama tmojuiyēbana; bacna soyēnga shembásēnga o boyabásēngaftaca ndoñe chamondětsama y ndoñe chamondětsesá tšesana bayēngbe mēntšena, y buiñe cach ndoñe ca. 21 Er chē natsana tempēnga orscana, nyetsca pueblēnguenache mondmēna chē Moisés tojěftsanayana soyēnga entšángbioye abuyayinayēnga; y chabe leyēnga, nyetsca ochnayté mondbetsalíaye chē bēnga judiēngbe enefjuana yebnēnguenache ca” —cha tojaněyana

Chē Jerusalenoca ichmónēnga y bētsějēmēngcá mándayēnga canye tsbuanácha tmojanichmó chē ndoñe judiēngbiama

22 Chentšana, chē Jesucristbe ichmónēnga y bētsějēmēngcá mándayēnga, nyetsca chē Jesucristbeñe ošbuáchiyēngaftaca tmojanenoyeuná chēnguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojaněbuáyana Judas, chē Barsabás ca uabobuatmá, y Silas; chata ibnamna uámanata chē Jesucristbeñe ošbuáchiyēnguentše. 23 Y chēngaftaca canye tsbuanácha tmojanichmó, y chiñe mēntšá yojétsayana:

Bēnga chē Jesucristbe ichmónēnga y chē bētsějēmēngcá mándayēnga, cach tšēngaftangcá

Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

²⁴ Bënga fsëntsetatšëmbo bëngbentsana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tšëngaftanga ndoñe šmontsetátšëmbo ntšamo jtsejuabnayana ndayá jamama yomnana, Jesucristbe canye ndegombre ustoná jtsemnama. ²⁵ Chcasna, bënga fsënjenoyeuná y šonjúnynana tšabá yojtsemna báseftanga bënguentsana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. ²⁶ Chë útatna ba soye tbojotsbocá vida jáshbiana, Bëngbe Utabná Jesucristbiana oservéniñe. ²⁷ Chátaftaca Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemanama. ²⁸ Chë Uámana Espíritu y bënga cachcá fsëntsejuabná, bënga ndoñe šontsamna tšëngaftanga jamëndana bëtscá jabuache mandënga Moisesbe leyënguñe chašmotsocumplínama. Nye quem uámana soyënga chiñe aiñe cmontsamna jtsobedecénana: ²⁹ Ndoñe šmattsesaye mëntšena, chë ndaye soyënga entšanga tmojuabná diosënga yomna ca jadórana tmojóba bayëngbiana; ndoñe šmatjofsiye buiñe, ni šmatjase tsešana bayëngbe

mëntšena; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bëngbe Bëtsá salúdoca chacmotsábouamna ca — chiñe yojétsayana.

³⁰ Chcasna, chë quem Jerusalenocana ichmónënga tmojésanodiošoftanentsana, Antioquía puebloye tmojána; y chocna, nÿetsca chë Jesucristbeñe ošbuachiyëngbioye tmojanëbuaja y chë tsbuanácha tmojanayentsbuaché ³¹ Chë Antioquía pueblentša Jesucristbeñe ošbuáchiyënga ntšamo chë tsbuanáchañe yojtsabemancá tmojanalía ora, bëts añemo tmojtanca y corente imojtsóyejuaye. ³² Judas y Silas Bëngbe Bëtsabe juabna oyebuambnayata ibnamna; as, chátnaca chë chentša Jesucristbeñe ošbuachiyëngbioye ba soyënga tmojanéyana, chënga añemo chamotsatsbomnama y Jesucristbeñe corente chamotsošbuáchema. ³³ Chentšana baseftaytese, chentša Jesucristbeñe ošbuáchiyënga chëngbioye tmojtanadiošoftá, chë ndëmuanÿenga tmojanichamóngbioye jtama. ³⁴ Pero Sílasna tšabá ibojtsinÿana cachentše más jëftsajétanama. ³⁵ Pablo y Bernabé baseftayshinÿe Antioquía pueblentše tbojanototoná y ba ínÿengaftaca Bëngbe Utabná Jesucristbe tšabe noticiënga entšanga tmojanabuatambá y tmojanabuayená.

Pablo cachiñe inÿe luarëngoye tojána, Bëngbe Bëtsabe trabajo jamama

³⁶ Chentšana baseftaytese, Pablo Bernabébioye tbojaniyana: “Bëngbe Utabnabe palabra tbonjanabuayená luarëngoye bochjésa, choca

Jesucristbeñe ošbuáchiyënga jábuachama y jányama ntšamo imojtsemnama ca.”

³⁷ Bernabé yojtseboše, Juan chë Marcos ca uabobuatmábioye chátaftaca jëftsbetšama. ³⁸ Pero Páblëna ndoñe tšabá ibontsinýana cha jëftsbetšana, er Juan chátbentšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana. ³⁹ Y chë palabrama tondaye tbonjanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojëftsanbetše, y bejaycá Chipre luaroye tbojánata; ⁴⁰ y Páblëna, Silas tbojanábuayana jëftsbetšama. Chë Antioquía pueblentša Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšinë chabotsemnama, chatbe trabajuiñe chaotsanýenama. Chentšana, Pablo Sílasftaca tbojánbocna y ⁴¹ Siria, Cilicia luarënguëjana tojánachnëngo entšanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchema.

16

Pablo Timotéobioye tbojáninýena

¹ Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiñá y chabe taitana griego entšá inamna. ² Chë Listra y Iconioca Jesucristbeñe ošbuáchiyënga Timoteobiam

tšabá imojanoyebuambná. ³ Pablo tojánbošena Timoteo jěftsbetšama; pero cabá ndetsbetše orna, Pablo base bobachtema chë más delicadentše tbojantětše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nÿetsca judiënga imnatátšëmbo Timoteobe taitá griego inamnama. ⁴ Chë ibojtsachnějuana pueblënguenache chata ibojtsana Jesucristbeñe ošbuachiyëngbioye abuayiynaye, ntšamo Jerusalenoca Jesusbe ichmónënga y bětšëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá. ⁵ Nÿets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

Pablo mo otjenayoquécá canÿe Macedonioca entšábioye tbojáninÿe

⁶ Chë Uámana Espíritu, Pablo y Sílasbioye tojaninÿanÿé, chata ndoñe yontsanamna Asia luaroca Bëngbe Bětšabe palabra entšanga jábuayenana; asna, tbojánachněngo Frigia y Galacia luarëjana. ⁷ Y Misia luaroca enajébanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondětšama. ⁸ Misia luarëjana tmojánachněngo ora, Troas luaroye chënga tmojána. ⁹ Chë te ibeta, Pablo mo otjenayoquécá tojáninÿe canÿe Macedonioca boyabása ibojtsebiatsana y mëntšá ibojtseimpadana: “Diosmanda Macedoniye

mabo y šmabëjabuache ca.” ¹⁰ Pablo chca tojáninÿe y cachora lempe tmonjanprontá Macedonioye jama. Atšnaca, chë quem soyënga uabiamnayá, chënga sënjétsatjëmbambnaye. Bënga fsënjëtsejuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entšanga jábuayenama.

Pablo y Silas Filipos pueblaca

¹¹ As, Troasentsana bejaycá fsënjána Samotracia luaroye, y yëfsana Neápolis puebløye, ¹² y chentšana Filíposoye. Filipos enjamna canÿe uámana bëts pueblo Macedonioca y bëtscá romanënga oyeninë. Chë luarentše baseftayté fsënjanoquedanga. ¹³ Canÿe ochnaytena, chë pueblentšana fsënjéftsanbocna y chë fshájaye tsachoye fsënjána. Fsënjauena chentše canjamna canÿe luare Bëngbe Bëtsáftaca jencuëntama ca, y fsënjána janguanguama. Fsënjáninÿena ora, chentše fsënjanothiama y Bëngbe Bëtsabe palabra fsënjanoeyebuambá chentše tmojanójoto shembásengbiama. ¹⁴ Enjamna canÿe shembása, Lidia ca uabainá, Tiatira pueblócá, y cha enjamna uámana uabuángana uafjatsenga entsayá uená. Cha inamna Bëngbe Bëtsábioye adorayá y chentše Páblëbioye ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema. ¹⁵ Cha y chabe yebnentše oyenënga tmonjánenabaye ora, Lidia mëntsá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché

ca; chcasna, mabënga yebnoye, átšbentše chašmoquedama ca.”

Y šonjanëtaríe bënga chentše joquédama.

¹⁶ Canÿe te, chë Bëngbe Bëtsáftaca encuéntaye luaroye fsënjétsajna orna, šonjanëbiatše canÿe tobiáše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiáše yojanmalísiaye soyëngama. ¹⁷ Chë tobiáše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe Bëtsabe oservénënga y tšëngaftanga cmontsabuaiyiná ntšamo Bëngbe Bëtsá yobena tšëngaftanga játsebacama ca!”

¹⁸ Y bayté chca enjanchembumbuana; chë causa, Pablo bonjëtsetana y cabana, tonjanobuértana y chë bacna bayëjbioye mëntšá tbonjaniyana: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentšana tojésanbocna.

¹⁹ Pero, chë bayëjbe juabna chábentšana tojésanbocnama y chëngbiamama más crocénana jabe-mama chora chë tobiáše ndoñe yontsobenama, chë tobiáše nduiñënga tmojáninÿe ora, Pablo y Sílasbioye tmojánishëche y tmojtsanasjojoye plazoye, mandayëngbioye.

²⁰ Chë mandayëngbioye tmojanënatse ora, chënga mëntšá imojtsichamo: “Quem boyabásata judío entšata bondmëna, y muatbe causa bëngbe pueblentša entšanga montsenbouenana, ²¹ y

bontsabuatambá soyënga jamama ntšamo chë judiënga imuamancá y bëngbe leyënguïñe chë soyënga jamama ndoñe quenátslesenciana. Bënga ndoñe quešnátamna ni jouenana, ni jamana chë soyënga, romanënga bétsemnayeca ca” —chënga imojtsichamo.

²² Chora chë entšanga tmojanontšé uayebuáchana; as, chë mándayënga tmojanamëndá chata entšayá jtsëtsejquëcana y niñëfjëngaca jtsachebuánganjana.

²³ Jabuache tmojanachebuánganjentšana, cárceloye tmojanautame y chë utámenënga shanyá tmojanmandá yejuana chaotsabuajënyama.

²⁴ Chca tmojanmandá ora, chë utamianá chata tojanënatse chë más tsoye utámenoye y shecuatšentšana tsbuanëšiñe tojanatsebuá.

²⁵ Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inye utámenëngna chca imojtsuenana.

²⁶ Ndeolpe, corente jabuache yojtsébánjua y chë utámena yebna fshantsocana yojtsábonjnaye. Cachora, nyëtsca chë utámenentša bëšašangá tojantëfjo y nyëtsca utámenënga chë cadenëjuangá yojtsayentšjafjona.

²⁷ Pero chë utámenënga shanyá tojanofšená y chë utámenentša bëšašangá yojtsatëfjnama tojáninye ora, cha tojanjuabó nyëtsca utámenënga tmojtsanacheta ca; chë causa, chabe espadëja yojenosëngbotëntšena jtsenóitanama.

²⁸ Pero Pablo tbojánbochembo: — ¡Ache cuerpo ndocá matenábomana; nyëtscanga camuentše fsëndëtsomñe ca!

²⁹ Asna, chë utámenentša shanyá canye

uajuinÿanêsha tojanëyá y chë utámenoye ochamanana tojánamashëngo y auatja causa ngmëmnyá Pablo y Sílasbe shecuatsëntse yojoshëntsamentšiye. ³⁰ Chentsana tojtanëbuacna y tojanëyana: —Señórata, ¿ndayá šojtsemna jamama atše ats bocaná jtsemnana ca?

³¹ Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëgnaca ca.

³² Y cha y nÿetscanga chë yebnentše imojtsemnënga, Bëngbe Utabnabe palabra tmojanabuayená. ³³ Cach ora chë ibeta, chë utamianá chata tojanënatse chë lisianënguifne jetsajabiama. Chentsana, cha y chabe pamíllanga tmojánenabaye. ³⁴ Chentsana, chë utamianá chata tojanënatse chabe yebnoye y saná tojanacaredadó. Cha y nÿetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchemá.

³⁵ Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. ³⁶ Chë utamianá Páblëbioye tbojaniyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

³⁷ Pero Pablo chë soldadënga tojanëyana: —Bëndátnaca fsëndmëna mo Romoca onÿnanatcá derecho bomnata y šonjáchebuanganja entšangbe delante, bacna soyënga aíñe o ndoñe tatifjamama cabá ndinÿanÿiye ora, y cárceloye šmonjautame. ¿Y mora imojtseboše iytëcana jtabáshejuanama? Chca

ndocna te chaondětsemna; cach mándayënga chamuabo jabátëbuacnama ca —cha tojánayana.

³⁸ Chentsana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onÿnanatcá derecho bomnata ibnamnama; chë causa, chë mándayënga puerta imojtsauatja. ³⁹ Chcasna, cach mándayënga tmojána chata perdón jatétejañama; chentsana tmojtanëbuacna y tmojanëyana: “Diosmanda, muentšana inÿe luaroye motsoñata ca.” ⁴⁰ As chata chë utámenentšana tbojëftsanbocna y Lídiëbe yebnoye tbojëftsanata. Chentsna, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentsana, chata inÿoye tbojtsanoñe.

17

Tesalónica puebloca, Pablo y Sílasbioye ndoñe tšabá tmonjanëbuaja

¹ Pablo y Silas inÿe luaroye ibojtsaye ora, Anfípolis y Apolonia bëts pueblënguëjana tbojánachnëngo y canÿe bëts pueblo, Tesalónica ca uabáinoye tbojánashjango. Chentše, chë judiënga canÿe yebna imnabomna chënga jénefnama. ² Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrënguñe iuayana soyëngaca, ³ chënga yojanabuayiyná y ndegombre

yojaninÿanÿná, Bëngbe Bëtsabe Uámana Uabuayaná jóbanama y chentšana jtayenama ibojamnama. Y mëntšá yojanëtsëtsná: “Chë Cristo, Jesús endmëna, ndabiamama atše cbontsabuyainá ca.”

⁴ Judiënguentshana báseftanga chiñe imojtsošbuáchiye y Pablo y Silas tmojanëseto más joudenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca. ⁵ Pero chë judiënga ndošbuáchiyënga chca tmojáninÿe ora, puerta envidia imojtsebomna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nÿetsca chë pueblentsa entšanga chamotsenbouéнанama; y canÿe entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entšangbe cucuatšinë jabáshejuanama. ⁶ Pero chentše ndocná tmonjáninÿena; as chë entšanga Jasón imojtsesjojye y chentša mándayënga imojétsemnoye tmojanánatse y Jesucristbeñe inÿe ošbuachiyëngnaca choye tmojanënatse, y mëntšá imojtsáyebuache: “¡Chë boyabásata, chë ndëmuanÿata ibojtsama nÿetsca luarentša entšanga chamuenbouéнанama, quem luaróynaca tbojabo, ⁷ y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguiñe ndoñe quenatslesenciancá, er chënga montsichamo inÿe rey canmëna, Jesús ca, y cha, César chë Romoca mandadbe cuenta nÿetscángbeñe yojtsemánda ca!” —chënga imojtsáyebuache.

⁸ Chë entsanga y chë pueblentša mándayënga chca tmojanuena ora, corente imojenbouénana.

⁹ Pero Jasón y chë ínÿenga, cháftaca imojtsemnënga, crocénana tmojtanjajó, y as tmojtanabáshejuana.

Pablo y Silas Berea Puebloa

¹⁰ Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebloye chabuétseboचना. Y chata choye tbojánashjango ora, chë judiëngbe enefjuana luaroye tbojánata. ¹¹ Chentša judiënga imojamna más tšabe ainana bomnënga chë Tesalonicoca judiëngbiama; chcasna, oyejuayënga chë buayenana soye Jesucristbiama tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojsëtsëtsnacá aïñe o ndoñe ndegombre yojtsemnama. ¹² Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca.

¹³ Pero, Pablo Bereoca chë Bëngbe Bëtsabe buayenana soyama entsanga yojtsabuayiynama chë Tesalonicoca judiënga tmojántatšëmbona ora, chënga choye tmojána y tmojanma chentša entsanga chamuenbouénanama. ¹⁴ Chcasna, banga Jesucristbeñe ošbuáchiyënga tmojanma cachora Pablo chentšana chauétseboचना y bėjaye tsachoye chaotsoñama; chëntscuana, Silas y Timoteo Bereoca tbojanoquedá. ¹⁵ Pablo tmojantjëmbambá entsangna, Atenas ca uabaina bëts pueblóntscóñe cháftaca tmojána. Chentšana, Pablo chënga tojanabuayená

chamuaishéconama Silas y Timoteo jaúnayama betesco jtsayana, Pábloftaca jateninýenama.

Pablo Atenas pueblaca

¹⁶ Pablo Atenas bêts pueblaca Silas y Timoteo yojtsëbatmanëntscuana, puerte tbojanongmé, er cha tojáninýe chentša entsanga imojtsadorana bëtscá cachëngbe pormana soyënga, ndayama chënga imojanjuabná diosënga yojamna ca.

¹⁷ Chíyeca, chë judiëngbe enefjuana yebnentse, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentša plazoca chë ndëmuanýenga chentše imojanashjajuanëngaftácnaca.

¹⁸ Y báseftanga, ntšamo jtsejuabnayama entsanga abuátambayënga, epicureunga y estoiquënga ca uabainëngnaca Pábloftaca imojánenatsëtsnaye. Inýenga imojtsichamo: “¿Ndayama quem bostero yojtsoyebuambná ca?” Y ínýengna: “Chana inýe luarëngoca entsangbe diosëngbiana muentše entsabóyebuambnaye ca.”

Chënga chca imojtsichamo, er Páblëna Jesusbiana y chë obanënga jtayenama yojanoyebuambná. ¹⁹ Asna, chentša entsanga cha tmojanánatse canýe luaroye, entsanga jénefnama y oyebuambnayënga joyaunayama luare, Areópago ca uabáinoye. Chentše imojanamana uámanënga jénefnana, nderado ndabiama jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bétsayanana bënga quefstsobena jtsetatšëmbuama ca? ²⁰ Aca tsëm soyënga šcontsëtsëtsná y bënga

fséntseboše jtsetatsëmbuana ndayá chë soyënga bétsayanana.

²¹ Er nÿetscanga Atenasentša oyenënga y inÿe luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuéntayana.

²² As Pablo tojantsá chëngbe tsëntsaca chë Areópago ca uabáinentše y tojánayana: — Atenasentša entšanga: ntšamo bominÿe sënjjajjá, atše sëntsetatsëmbo tšëngaftanga ba diosënga puerte šmayaunana y šmadoránama.

²³ Atše sëndánrreparana tšëngaftangbe diosënga šmétsadorana luarënguenache y sënjinÿena canÿe altar y chentše mëntsá iuábemana: “Chë Bëtsá nduabuatmabiama ca”. Y morna, chë Bëtsá chë nda ntsabuatmcá šmadoránabiama, atše cbontsabuaiyná.

²⁴ “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórama entšangbe jebna yebnënguiñe, ²⁵ ni quebnatájaboto ndocná chabiama tondaye chaondëtsama, er cha endmëna nda inétsama bënga vida chamotsebomnama y jtseshachnayama chamotsobenama, y cha nÿetsca soyënga šnetsatšatnaye.

²⁶ “Cha nÿe canÿe boyabásabentšana nÿets luarënguentša entšanga tojánabiama, nÿets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entšanga chamuetsiyenama; ²⁷ chca, Bëngbe Bëtsá chamonguanguama, masque

chabiamana ndoñe corente tmontsetátšëmbo, y chamuinýena y chábeñe chamotsošbuáchema; pero ndegombre, Bëngbe Bëtsá bëngbentše cada cánýabentšana ndoñe bënoca quenátsmëna. ²⁸ Ntšamo canýa tojanayancá: ‘Bënga Bëngbe Bëtsáftaca cánýiñe mo canýacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tšëngaftanguentša báseftanga bëts soyëngama uabiamnayëngnaca tmojanayancá: ‘Bënga nýetscanga Bëngbe Bëtsabe básenga mondmëna ca’. ²⁹ Y chcasna, Bëngbe Bëtsabe pamíllanga bënga tmomñese, ndoñe quešnátamna jtsejuabnayana Bëngbe Bëtsá yomna mo cach entšangbe castellano, midio o chë ndëtsbeca pormana soyëngcá ca, er chë soyëngna nýe ntšamo entšanga tmojajuabocá y tmojtsobencá japórmana. ³⁰ Pero Bëngbe Bëtsá tojanjuabó ndoñe ntjatonyáyana chë entšangbe tempsca ndosertánana, y morna, nýetsca luarënguentsa entšanga entsamënda, ndaye bacna soyënga tmojtsamama ngménaca chamuenojuabó, chca amama chamotsajbaná y Bëngbe Bëtsabe benache chamuatishache ca. ³¹ Bëngbe Bëtsá canýe te tojuinýnaná, y chë tena, ndocnábiocyte ínýabiamana más tšabá ntjatonyáyacá, cha echanjayana entšanga tšabá o ndoñe tšabá tmonjamama; lempe chca cha echanjama canýa cachá tbojabocacá entšáftaca, Jesús; y chca yochtsemnamna, Bëngbe Bëtsá entšanga tojinýanyé, chë bocacaná Jesús cháuatayenama cachá tojánmayeca ca” —Pablo tojánayana.

³² Chë obanënga mochtayenama ichámuana chë

entšanga tmojanuena ora, báseftanga Pablo imojtsáboyejuana, y ínÿengna mēntšá imojtsichamo: — Bēnga fsēntseboše chē contsichamo soyēnga más chchoye cachiñe jatuenama ca.

³³ As Pablo chēngbentšana tojésanbocna. ³⁴ Pero báseftanga aíñe Jesucristbeñe imojtsošbuáchiye y Pablo tmojanasto más jatuenama; chēnguentše imojamna Dionisio, canÿa chē Areopagoca tbiamanēnguentšá; canÿe shembásanaca, Dámaris ca uabaina, y ínÿenga.

18

Pablo Corinto puebloca

¹ Chē soyēnga tojanochnēngüentsana, Pablo Aténasentšana Corinto bēts puebloye tojána. ² Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiēnga Romocana chamuáisebocanama choca bēts mandado Claudio tojanmandá causa. Pablo tojána chata jautsētsayama, ³ y ntšamo chata jamama Páblēnaca jamama inatátšēmboyecna, chátaftaca yojtsoquedañe y cánÿiñe chēnga imnatrabájaye; chēnga imnatátšēmo mo tambotemēngcá entšējuaca japórmana. ⁴ Y nÿetsca ochnayté, Pablo yojanamana chentša judío entšangbe enefjuana yebnoye jana, Bēngbe Bētsabe soyēngama jóyebuambayama, y puerte yojtsentšena judiēnga y ndoñe judiēnga chamotsošbuáchema, ntšamo cha yojtsanētsētnacá ndegombre bētsemnama.

5 Silas y Timoteo Macedoniocana choye tbojánashjango ora, Pablo nyets tempo Bëngbe Bëtsabe soyëngama entšanga yojtsabuayiynaye y puerte tšabá chë judiënga yojaninyáná, Jesús ndegombre Bëngbe Bëtsabe Uámana Uabuayaná bétsemnama. 6 Pero chë judiënga Páblëbe contra imojtsemna y tmojanontsé podesca chabiamá ichámuana. Asna, Pablo chabe uichëtjonyangá yojtsenántšasajaye, chënga jinýanýiyama chënga ndoñe tšabá tmonjáchjanguama, y tojanéyana: “Tšëngaftanga ndatsebácanënga chašmojóbanëse, cach tšëngaftanga šmochtsótatsëmbñe; atšna ndoñe. Mëntescana chë ndoñe judiënga jábuayenama chantsoñe ca.”

7 Chorna, chë judiëngbe enefjuana yebnentšana tojëftsanbocna y canye boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena. 8 Y Crispo, canye chë enefjuana yebnentša mandayá, Bëngbe Utabná Jesucristbeñe yojtsošbuáchiye y nyetsca chabe pamíllangnaca; y banga chë Corinentšëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. 9 Canye ibeta, Bëngbe Bëtsá Páblëbioye mo canye otjenayoquëcá tbojaniyana: “Ndoñe matauatjana; nye cochtsana atšbe soyëngama oyebuambnaye y ndoñe iytëca cattsemana. 10 Er atše ácaftaca sëntsemna y ndocná quecmochátsbojajo ntšámnaca jáborlama; atše bëtscá entšanga quem pueblentše sëndábamna ca.” 11 Chcasna, Pablo Corinentše canye uata y chnénguana shinye tojanototoná, Bëngbe Bëtsabe palabra entšanga abuatambaye.

12 Pero, Galión chë Acaya luarentša mandado inamna orna, chë judiënga imojenóyeunaye Páblëbe contra; cha tmojánishache y chë tribunaloye tmojanánatse. ¹³ Chocna, chë mandado tmojaniyana: —Mua entsanga entsëtsësná y entsama chënga Bëngbe Bëtsá chamotsadorana, pero ndoñe ntšamo bëngbe leyënguiñe endayancá ca.

14 Pablo jóyebuambayama uatajanóntša orna, Galión chë judiënga tojanéyana: —Quem entsá nderado ínÿabioye matbënjóba o ndayánaca chca matënjobuachjanguá, as cocayé atše matijótbema tsëngaftanga judiënga yejuana joyaunayama; ¹⁵ pero ntšamo šmontsichamcá entsemna nÿe buatëmbana soyëngama, nÿe tsëngaftanga šmëbuatma entsangbiamama y cach tsëngaftangbe leyëngama; chcasna, cach tsëngaftanga cmontsamna jenóyeunayana y jamana ntšamo chašmojenoyeunacá. Atše quem base soyëngama ndoñe quetsátsboše ngoberna jtsemnana ca.

16 As Galión tojanamëndá chë tribunal luar-entsana chë judiënga jtëbuacnama. ¹⁷ Chorna, chë entsanga tmojánishache chë judiëngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chë soye todayana ibontsentšamna.

Pablo Antioquiøye tojtaná y chentsana cachiñe inÿe luarëngoye tojána, Bëngbe Bëtsabe trabajo jamama

¹⁸ Pablo cabá bayté Corintentše tbojántotona. Chentsana, Jesucristbeñe ošbuachiyëngbentsana

tojesanodiošoftá y bejaycá Siria luaroye tojána, Priscila y Aquílaftaca. Cabá Sirioye nda ora, Cencrea puebloca n̄yets stjēnashe yojtsenátsbotje, Bēngbe Bētsábioye jin̄yinȳiyama can̄ye soye tbojanšbuáchenama. ¹⁹ Efeso puebloye tmojánashjajna ora, Páblēna Priscila y Aquíla tojésanabashejuana. Chentšana, cha tojána chē chentša judiēngbe enefjuana yebnoye y chentše chē judiēngaftaca yojanoyebuambná y imojánenatsētsnaye. ²⁰ Báseftanga Pablo tmojanimpadá in̄ye baseftayté chentše chausomñama, pero chana ndoñe tonjanoyauná; ²¹ chentšana, chēngbentsana tojesanodiošoftá, mēntšá jēftsēyanēse: “Nderádose cachiñe chantésabo tšēngaftanga jabábuachama, Bēngbe Bētsá šojalesenciase ca.”

Chora, Pablo bejaycá Efesocana tojēftsanbocna. ²² Cesarea puebloye tojánashjango ora, tojána jacheuayama Jesucristbeñe ošbuáchiyēnga Jerusalemoca; y chentšana Antioquiye tojána. ²³ Chentše baseftayté yojēftsemna; y chentšana, Pablo tojesaná Galacia y Frigia luarēnguenache, Jesucristbeñe ošbuáchiyēnga añemo atšatnaye.

Apolos, Efeso puebloca Bēngbe Bētsabe soyēngama yojanabuayiná

²⁴ Cach tempo, Efesoye tojánashjango can̄ye judío, Apolos ca uabainá, Alejandría bēts pueblocá; cha puerta obená inamna jonguamiyama y corente inatátsēmbo Bēngbe Bētsabe uabemana palabrengama. ²⁵ Bētská tojánatsjin̄ye chē Bēngbe Utabná tojanin̄yan̄yé benachama; añémoca yojanoyebuambná y Jesusbe soyēngama

botamana yojanabuatambá, masque cha nýe ntšamo Juan entsanga tojánabuatambama y tojanébáyama inatátšëmbo. ²⁶ Ndauatjca Apolos tojanontšé jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inýinýena benache bëtsemnama. ²⁷ Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañemó y choca Jesucristbeñe ošbuáchiyëngbiana canýe tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanëjabuache. Bëngbe Bëtsá chëngbe tšabiana yojanjuabnáyeca, chënga Jesucristbeñe corente imojtsošbuáchiye. ²⁸ Entšangbe delante chë judiëngaftaca jabuachana imojánenatsëtsnaye y nýetscanga tojaninýanýé, ntšamo ndoñe tšabá inamncá chë judiënga imnatatšëmbuama; y Bëngbe Bëtsabe uabemana palabrëngaca chënga tojaninýanýé, Jesús Bëngbe Bëtsabe Uámana Uabuayaná bëtsemnama.

19

Pablo Efeso puebloca

¹ Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanýena, pero chëngna nýe ntšamo Juan chë Ubayaná tojanabuatambacá imnatatšëmbo.

² Pablo chënga tojanatjá: —¿Uámana Espíritu

chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiamá ora ca?

Chora chënga tmojanjuá: —Ni mo queftsátstatšëmbo chë Uámana Espíritu yomnama ca.

³ Y Pablo tojanéyana: —As, ¿ntšamo šmojánenabaye ca?

Y chënga tmojanjuá: —Fsënjánenabaye ntšamo Juan entšanga yojanëbayancá ca.

⁴ As Pablo tojanéyana: —Juan tojanëbaye chë bacna soyënga amama ngménaca tmojanenojuabó, chca amana tmojanajbaná y chë Bëngbe Bëtsabe benache tmojánishachënga, y entšanga yojanëtsëtsná chë chábensana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

⁵ Chca tmojanuena ora, chënga tmojánenabaye Bëngbe Utabná Jesús jótšëmbonëse, chábeñe imojtsošbuáchema. ⁶ Pablo chëngbe bestšašiñe chabe cucuatšënga tojanjajó ora, Uámana Espíritu chëngbe ainaniñe tojánamashëngo jtsemándayama; tmojanontšé inyetsá biyangana, chënga tempo ndmabiyañe, y Bëngbe Bëtsabe juabna imojtsoyebuambná. ⁷ Chentše imojtsemna bnëtsana uta entšanga.

⁸ Unga shinýentscuana Pablo yojánaye chë judiëngbe enefjuana yebnoye y ndauatjca Jesucristbe soyëngama yojanoyebuambná; entšángaftaca imojánenatsëtsnaye y entšanga yojanëtsëtsná Bëngbe Bëtsabe amëndayama, chënga chábeñe chamotsošbuáchema. ⁹ Pero ba nduauenanënga ndoñe imontsošbuaché y Bëngbe Utabná tojaninýanyé Benachama entšángbeñe

bacna soyënga imojtsichamo. Chcasna, Pablo chëngbentsana tojtsanojuánañe y nÿe chë Jesucristbeñe ošbuáchiyënga tojanëbuaja canÿe scueloye, canÿe entšá Tirano ca uabainabe yebnoye. Chentše cada te chë ouenanëngaftaca yojanoyebuambná, ¹⁰ y chca yojánama uta uatëntscuana; y chca, nÿetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. ¹¹ Y Bëngbe Bëtsá puerte bëts soyënga Pábloftaca yojtsama. ¹² Tša bëts soyënga tojanma; chíyeca, nÿetsca chë Pablo tojuabojajo entšayá y pañuelëjuangá, entšanga imojanamana šoquëngbioye juyambana, y chca tmojama orna, chë šocanënga juenatjëmbana y chë bacna bayëjënga entšángbentsana jésebocanana.

¹³ Pero básefta judiënga tsáshenañe bacna bayëjënga entšángbentsana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntsá imojtsëtsësnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca cbontsamënda muabentsana chašmuaisebocnama ca.”

¹⁴ Chca imojánama chë judío Esceva ca uabainabe canÿsëfta uaquiñënga. Esceva inamna bachnangbe amëndayá. ¹⁵ Pero canÿe, Escévëbe uaquiñënga chca tmojánayana orna, chë bacna bayëja mëntsá tojanëjua: “Atše Jesús sënduábuatma y sëndétatsëmbo nda Pablo yomnana; pero tšëngaftanga, ¿ndëmuanÿënga šmomna ca?”

¹⁶ As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayëñaná,

jabuache jtsajantsetayëse; chë causa, chënga chë yebnentsana tmojtsanacheta enaşënga y lisiánënga. ¹⁷ Nyetscanga Efesoca oyenënga, judiënga y ndoñe judiënga, chca tmojántatšëmbona y corente imojtsanauatja. Y chca, Bëngbe Utabná Jesús entšanga más imojtsatschuanaye.

¹⁸ Jesucristbeñe imojtsošbuachiyënguentsana, banga imojánashjajuana y entšangbe delante imojtsecompšaye, tempo bacna soyënga tmojanmama; ¹⁹ banga, chë bocjuanana soyënga jamama imojanëntsénënga, chëngbe bocjuanana librëšangá tmojaniyëbo y entšanga imojtsantješna ora, chëšangá imojtsajuinÿiye. Tmojanjuabó ntsachetšá chë librëšangá betsámanama y tojanóbocna shachna bnëtsana uaranga crocénana nyetšá. ²⁰ Y chca, Bëngbe Utabnabe palabra más ba entšanga imojtsuenana y chiñe imojtsošbuáchiye y Bëngbe Bëtsá chabe obenana entšángbeñe yojtsinÿinÿnaye.

²¹ Chca tojanochnëngüentsana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentsana Romoye jama ca. ²² Asna, chabe uajabuachanënguentsana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentše tbojanjëtana.

Efesoca entšanga tmojänenbouenana

²³ Chë tempo, Efesoca entšanga corente tmojänenbouenana, chë Bëngbe Utabná yojtsinÿanÿná Benache imojtsisháchichanëngbe causa. ²⁴ Chë entšanga chca tmojanma,

er canye entšá mídioca soyënga pormayá, Demetrio ca uabainá, chënga tojanayënjaná chca jamama. Cha yojanamana binche soyetémënga japórmana y chëtémënga yojáninÿna mo chë Efeso puebloquëngbe diosá Artemisa jadórama bëts yebncá. Demétrioftaca imojantrabájangna bëtscá crocénana imojanójacañe chë soyetémënga eniñe. ²⁵ Demetrio tojanëbuaja cháftaca imojantrabájangna y ínÿnga cach mídioca soyënga pórmayënga, y mëntšá tojanëyana: “Baconga, tšëngaftanga šmondétatšëmbo, bënga bëtscá crocénana jtsebonnamna quem trabajuentšana chca jopódiana. ²⁶ Pero tšëngaftanga šmontsonÿá y šmontsuenana ntšamo chë Pablo ca uabainá yojtsichamcá. Cha entsichamo, chë entsangbe pormana soyënga ndoñe yontsemna jtsadoránana ca; y chca ba entšanga tojabuayená y chënga aiñe montseyeunana. Chë soyna ndoñe nÿe muentše Efesentše chca quenátopasana; nÿets Asia luaríñnaca chca entsopasana. ²⁷ Resjo entsemna; chca causa, entšanga bëngbe trabajuama ndoñe tšabá quemochátichamo y chë uámana Artemisa jadórama bëts yebnama mochántsicamo uámana yebna ndoñe yondmëna ca. Y chca, Artemisbe obenana entšanga mochantsábotena y Artemisa ndoñe bañe quemochátabuatma, nda Asientše y nÿets luaríñnaca mondadorana ca.”

²⁸ Chca tmojanuena ora, chca pórmayënga puerta tojánëtëna y tmojanáyebuachena: “¡Efesoquëngbe Artemisa corente bëtšá endmëna ca!”

²⁹ Y chca, nÿetsca chë pueblentša entšanga tmojánenbouenana. Tmojanotabá Gayo y

Aristarquëbioye, Macedonioca boyabásata, Páblëbe tjëmbambayata; y sjojónana tmojanënatse chëngbe enefjuana yebnóntscoñe. ³⁰ Pablo tojánbošena choye jamashënguama chë entsángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá. ³¹ Chë Asioca mándayëngbentse báseftanga innamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

³² Chëntscuana, entsanga imojtsejotonocna, ínÿenga imojtsechembumbuana canÿe soye y ínÿengna inÿe soye, chënga corente imojtsenbouenana causa, y banga chentse imojtsemnënga ndoñe imontsetátšëmbo ndayama choye tmojanobéconama. ³³ Pero básefta judiënga, canÿe entsá, Alejandro ca uabainá, chë entsangbe natsanoye tmojanajuatsëntse, y báseftanga cha tmojanbuayená ntšamo yojtsopasánama. Asna, Alejandro tojánefjatsëmbo cucuátšeca iytëca chamobiamama, er cha yojtseboše entsangbe delante chë judiënga jobuauyanama. ³⁴ Pero, Alejandro judío bemnama chë entsanga tmojántatsëmbona ora, nÿetscanga tmojanáyebuachena uta horëntscuana, mëntšá: “¡Efesoquëngbe Artemisa corente bëtsá endmëna ca!”

³⁵ Chë pueblentša mándayëngbe uajabuachaná, entsanga iytëca jábiamama tojanobená ora, tojanéyana: “Efesoquënga, nÿets luariñe endótatsëmbo, quem pueblentse oyenënga iuamna jtsinÿenana chë Artemisa jadórama bëts yebna y chë cha jadórama celocana otsatsëna

ndëtsbé. ³⁶ Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuaboycá. ³⁷ Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiana ndoñe podesca tmonjoyebuambá. ³⁸ Demetrio y cháftaca šmotrabájanga, nderado ndabiama ndaye demanda šmojtsebomnësna, cabildoca endatëfjna y chentše mándayënga montsemna chë demandënga jouenama, y chëngbentše cada ona šmochjëftsendemánda. ³⁹ Y tšëngaftanga inye soye šmojtsenguasna, cmontsamna ntšamo bëngbe leyënguïñe yomandancá, nyetsca quem pueblentše oyenëngaftaca jenóyeunayana. ⁴⁰ Ndayá mënté tojopasá causa, resjo entsemna bëngbiana chamuayana, ntšamo leyënguïñe yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enbouenanana tojopasá ca šojátjayëse ca” —cha tojanëyana. ⁴¹ Y chca jayanëse, chë entšanga tojtanicamó.

20

Pablo, Macedonia y Grecia luaroye tojána

¹ Chë enbouenanana tojanochnëngo ora, Pablo chë Jesucristbeñe ošbuachiyëngbioye tojanëbuaja jábuayenama, añemo chamotsatsbomnama; tojesanodiošoftá y Macedonioye tojëftsanbocna. ² Chë luarënguëjana cha tojánachnëngo Jesucristbeñe ošbuáchiyënga becá añemo atatšatnaye, ba chabe palabrëngaca; chentšana,

Grecia luaroye tojánashjango, ³ y chentše unga ishinye tojanoquedá. Barquëshañe Sirioye játama Pablo yojtseprontana orna, tojántatsëmbona chë judiënga cha jtsóbama tmojanenóyeunama. Asna, tojanenojuabó jeshëconama, cach Macedonia luarëjana jésachnënguse. ⁴ Pablo quem boyabásenga tmojantjëmbambá: Sópater, chë Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófinnaca, Asia luarocata. ⁵ Chënga tmonjanonatsé y šonjanëbatma Troasoca. ⁶ Chë levadúraca ndëpormana tandëse saye fiestentsana, Filíposentsana barquëshañe fsënjëftsanbocna y shachna tianoye, Troasoca chë tmonjanonatsenga fsëntanishëche, y chentše canye semana fsënjanoquedanga.

Ntsamo tojanopasá Troas puebloca

⁷ Chë inye semana jobojátšama te, fsënjánenefjna Jesucristbeñe ošbuachiyëngcá tandëse jajátayama, cányiñe jasama; y Pablo entsanga enjëtsëtsësnaye. Cha bonjamna yëfsana chentšana jëftsebocnana; chë causa, más bën chëngaftaca tonjanoyebuambá, tsëntsetëntscuana. ⁸ Fsënjamna canye tsoye tsbanana tsañoca y chentše ba uajuinjanëshangá enjanamna; ⁹ y canye bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocnayana tbojanábuache. Cabana, corente tojtsanomaná ora, chë unga tsañocana tontsanótsatše y obaná chora tmontanatsbaná. ¹⁰ As, Pablo tonjánastjango, chë bobóntsbioye tbonjanotsbuajó y tbonjanotsejcuá.

Y chë entsanga tonjanëyana: “Ndoñe nyetšá matauatjëngana; ainá cha entsatsmëna ca.”

¹¹ Chentsana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entsángaftaca tonjanse y tontëtanontsé oyebuambnayana, jabinÿnëntscuana. Chora Pablo chentsana tontsanoñe. ¹² Y chë otsatšena bobontsna ainá imojtsatánatseñe, y chama chë entsanga corente oyejuayënga imojtsemna.

Pablo Troasentsana Mileto puebloye tojána

¹³ Bëngna fsënjanonatsé y barquëshañe fsënjána Aso publóntscoñe, chentsana Pablo jtesbetšama, ntšamo fsënjanenoyeunacá, er Pablo tonjánbošena fshantscá choye jana. ¹⁴ Asoca Pábloftaca fsëntaneninÿena ora, bëngaftaca barquëshañe cha tonjána Mitilene puebloye. ¹⁵ Chentsana fsënjëftsanbocna y yëfsana Quío luarëjana fsënjánachnëngo, y chë inÿe yëfsana Samos luaroye fsënjánashjajna. Chentsana fsënjána y yëfsana Mileto puebloye fsënjánashjajna. ¹⁶ Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndétsemnana. Chca tojánbošena er cha enjëtseboše betsco Jerusalemoca jtsatsmënana, tojopodesna chë judiëngbe fiesta, Pentecostés ca uabaina fiestama.

Ntsamo Pablo chë Efesoca ošbuachiyëngbeñe bëtsëjemëngcá mándayënga tojanëyana

¹⁷ Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana. ¹⁸ Chënga tmonjánashjajna ora, Pablo

tonjanéyana: “Tšëngaftanga šmondětatsšëmbo ntšamo atše quem Asia luaroye sënjabánashjango orscana tšëngaftangbeñe snetsamana. ¹⁹ Nýets tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiye tijëftsoperdé y ba soyënguiñe tijasufrí, chë judiënga atše jóbama mondboše causa. ²⁰ Y lempe ntšamo tšëngaftangbe tšabiamana yomncá tchonjabuayená; tondaye ntjatsbuetamencá. Nýetscangbe delante sënjabuatambá y tšëngaftangbe yebnënguenáchnaca. ²¹ Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngménaca chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchema. ²² Y mora Jerusalemoye chanjá; Uámana Espiritu chca šontsemánda y ndayá choca chjapásamna ndoñe quetsátstatsšëmbo. ²³ Nýe mëntsá aíñe sëndětatsšëmbo: Nýetsca bëts pueblënguenache ndayëjana atše chandbétsana, Uámana Espiritu šondbétsebuayiynaye entsanga cašmochjutame y puerta chaisufrima camochjama ca. ²⁴ Atšbe vida cach atšbiamana ndoñe yapa quenatámama, chaitsaina o chayóbana. Pero atšbiamana iuámanana endmëna ndayá atše jobenayana atšbe trabajo jëftsepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entsángaftaca tšabia yomnama jábuayenama.

²⁵ “Y mora atše ndegombre sëntsetatsšëmbo, tšëngaftangbentšana, chë ndëmuanyëngbentšë Bëngbe Bëtsabe amëndayama sënjabuayená,

ndocná atše más quešmochátinÿe. ²⁶ Chíyeca, atše ndegombre mënté cbetsÿyana: Atše tondaye quetsátstatsëmbo nderado nda ndatsbocaná chaojóbanabiama, ²⁷ er atše ntšamo Bëngbe Bëtsá jamama yokuabnacá lempe tcbonjabuayená, tondaye ntsebuetamencá. ²⁸ Chcasna, cach tsëngaftangbiama šmochtsantješna y nÿetscanga muentše Jesucristbeñe ošbuachiyëngbiámnaca. Chëngbeñe mo chëngbe abujajëngcá Uámana Espíritu tcmonejajayé, Bëngbe Bëtsabe entšanga chašmotsanÿenama, chënga Bëngbe Bëtsá chábenga tojábiana, chabe Uaquiñabe buiñe juabuáshanëse y jóbanëse, mo bëtscá cuafjopagacá. ²⁹ Atše séntsetatsëmbo, atše chaitsoñe orna, banga mochanjabo y chënga mochántsemna mo corente tsátjaye tjañe quešëngcá, Jesucristbeñe ošbuáchiyënga chábeñe ošbuáchiyana chamotsajbanama chënga jamama. ³⁰ Y tsëngaftangbentsánënaca báseftanga mochanjábocana y entšángbioye uayátsenaye soyënga mochanjabuatambá, chca, báseftanga Jesucristbeñe ošbuáchiyënga chë ínÿengbentsana chamotsoluarema y nÿe chë abuátambayëngbioye chamotsësetonama. ³¹ Chcasna, sempre šmochtsantješna; ndoñe chacmondébnëtjomba, atše unga uatëntscuana, bnëté y ibeta, tsëngaftanga cada ona cbondétsabuayiyinama y chama atše puerta tijasufrí.

³² “Y morna, Jesucristbeyeca catsátanga, Bëngbe Bëtsabe cucuatšiñe cbétsabashejuana y ntšamo tsëngaftangbiama chabe tsabe juabna yomnama palabrëngaca, tsabá chašmuesomñe. Cha

endobena jamama tšëngaftangbe ainaniñe más chašmotsošbuáchema, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entšángbioye, ndëmuanÿenga cha tojáchembo chabe entšanga chamotsemnama. ³³ Atše ndocnabe crocénana, o castellano o entšayá atšbiana quetsatántšaboše; ³⁴ más inÿetšá, y tšëngaftanga lempe šmondétatšëmbo, atše cach atšbe cucuátšeca tijëftsetrabajama, atšbiana y átšeftaca imojamnëngbiana opresido enjamna soyënga janguanguama. ³⁵ Atše nÿets tempo sëndinÿanÿná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabrëngama sempre jtsejuabnayëse: ‘Canÿe entšá más oyejuayá jtsemnana ndayánaca inÿabioye tbojtsatšetná ora, y inÿabioye tbojtseyëngacá ora ndoñe nÿa nÿetšá ca’ ” —Pablo tonjanoyebuambá.

³⁶ Pablo chë soyënga tonjánayanentšana, tonjanoshamentšé y nÿetscanga chentše monjëtsemnëngaftaca Bëngbe Bëtsá tmonjanótšëmbona. ³⁷ Nÿetscanga tmonjánenobošachna y Pablo tmontanotsejcuá y tmontanámochó. ³⁸ Y entšanga corente ngménaca monjëtsemna, chënga ndocna te más cha mochántinÿe ca Pablo tojanéyana causa. Chentšana, chënga chë barquësha enjetsamnëntscoñe cha tmonjantjëmbambá.

21

Pablo Jerusalenoye tojána

1 Chë Jesucristbeñe ošbuáchiyënga fsënjëftsanabashejuana ora, barquëshañe fsënjanojayé y ndericho Cos luaroye fsënjána; chë yëfsana Rodasoye y chentšana Pátara puebloye. 2 Pátara pueblentše canye barquësha fsënjáninÿena, Fenicioye enjëtsaye; asna, chëshañe fsënjanojayé y chentšana fsënjëftsanbocna. 3 Fsëntsanachnëjuana ora, fsënjáninÿe Chipre luare; Chipre bëngbe uañicuayoica tonjanoquedá y bëngna Sirioye fsënjëtsaye. Tiro pueblentše chë barquëshentša uasmanëshangá jëftsáboshjonama yojámnyeca, chë puebloye bënga fsënjëftsanamashjna. 4 Chentšana, Jesucristbeñe ošbuáchiyënga fsënjánanÿena y canÿsëfta te chëngaftaca fsënjanoquedá. Chënga Pablo tmonjanianyana cha ndoñe ibonjamna Jerusalenoye jtsayana ca, er chë Uámana Espíritu tojanabuayená ndayá choca cháftaca jopásama. 5 Chë canÿsëfta te tonjanochnëngo ora, chentšana fsënjëftsanbocna y nyetscanga parejo chëngbe shémangaftaca y básengaftaca šonjanatjëmbambá chë pueblo chabóntscoñe; y chentše, chë chënyañe fsënjanošamentšé y Bëngbe Bëtsá fsënjanimpadá. 6 Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

7 Tirentšana fsënjëftsanbocna y Tolemaida puebloye fsënjánashjajna; y chentše tonjanopochocá bëngbiama bejaycá chë te ayana. Tolemaidentše Jesucristbeñe ošbuáchiyënga fsënjanocheuá y chëngaftaca canye te fsënjanoquedanga. 8 Yëfsana, bënga

chentsana fsenjěftsanbocna y Cesarea luaroye fsenjánashjajna. Chocna, bęnga fsenjána Felipe chę Jesucristbiamna tšabe noticięnga abuyaynayabe yebnoye y cháftaca fsenjanoquedanga. Felipe enjamna canya chę Jesucristbe ichmónęngbioye ujabuachanęnguentšá, Jerusalemoca ubuáyanęnga. ⁹ Felipe enjánabamna canta ndębouamna bembangna y chęnga monjamna Bęngbe Bętsabe juabna oyebuambnayęnga. ¹⁰ Ya bayté chentše fsenjětsemna orna, Judeocana tonjánashjango canya Bęngbe Bętsabe juabna oyebuambnayá, Agabo ca uabainá. ¹¹ Agabo bęngbioye tonjánashjango ora, Páblębe uasnanęja tonjanca y cucuatšęnga y shecuatšęnga cachá tonjanenabatsęca y męntsá tonjánayana: “Uámana Espíritu entsichamo, Jerusalemoca quem uasnanęja nduíńbioye chę judięnga męntsá camochjama y ndońe judięngbe cucuatšińe camochjáboshjona ca.”

¹² Chca fsęnjauena ora, bęnga y chentša entsanga Pablo fsęnjanimpadá Jerusalemoye ndońe chaondętsama. ¹³ Chora Pablo tonjánayana: —¿Ndáyeca šmojtsošaché y šmojtsama atšbe ainanińe puerte ngmėnana chaotsemnama ca? Atše sęntseprontana y ndońe nýe chašmobatsęcama; Jerusalemoca jobanámnaca sęntseprontana, Bęngbe Utabná Jesusbiamna ca —cha tonjánayana.

¹⁴ Jáyęnjana nadońe chibiatanobená ora, ndońe más chibiatanimpadá; nýe męntsá fsęnjaniyana: — Ntšamo Bęngbe Utabná yojtsebošcá chaotsemna ca.

¹⁵ Chę soyęnga tonjanochnęngüentšana, fsęnjanoprontá y Jerusalemoye fsenjána.

¹⁶ Cesareoca, básefta Jesucristbeñe ošbuáchiyënga choye šonjanatjëmbambá y chocna, chënga šonjanënatse canye Chipre luaroca entšabe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

Pablo tojána Santiago jauatsëtsayama

¹⁷ Jerusalemoye fsënjánashjajna orna, chentša Jesucristbeñe ošbuáchiyënga oyejuayënga šonjanëbuaja. ¹⁸ Yëfsana, Pablo bëngaftaca tonjána Santiago jábuachama, y chentše, nyetsca chë ošbuachiyëngbeñe bëtsëjemëngcá mandayëngnaca monjëtsemna. ¹⁹ Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanmama.

²⁰ Chca tmonjanuena ora, Bëngbe Bëtsá tmontanchuá y Pablo mëntšá tmonjaniyana: “Morna, Jesucristbeyeca bëngbe catšata, contsonyá ntšamo ba uaranga judiënga Jesucristbeñe imojtsošbuáchema, y chënga nyetscanga montsantješna nyetsca Jesucristbeñe ošbuáchiyënga chë Moisesbe leyentša nyetsca mandënga chamotsocumplínama. ²¹ Y

entšanga chëngbioye noticia tmojatsatá, aca chë inye luarënguenache imoyena judiënga cojtsabatambá, Moisés tojanmandá soyënga ndoñe ntseyeunanama y basetëmënga base bobachtema chë más delicadentše ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatsëmbcá ndoñe chamondëtsamana ca. ²² Y morna, ¿ntšamo chë

soyëngama cochtsemana? Ndegombre, chënga mochanjátatsëmbona aca moye tcojabama. ²³ Chcasna, ntšamo cbochanjabuayenacá cochjama: Bëngbentše canta boyabásenga montsemna y chënga entsamna Bëngbe Bëtsabiamama canye šbuachenana soye jamama. ²⁴ Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábenga jtsatsmënama ntšamo chamojtsama ora, y ntsachetšá jëtsjájuaama chaojtsamncá, aca cochjëtsjájua, as chënga chamobená nyets stjénashe jtsenátstbotjiamama, jinyanÿiyama, ntšamo Bëngbe Bëtsábioye tmojašbuachenacá ya tmojamama. Y chca, nyetsca judiënga mochanjinÿe ndoñe ndegombre yontsemna chë ntšamo chëngbioye acbiamama tmojacuntacá; masna, chënga mochanjátatsëmbona aca ndegombre ntšamo Moisesbe leyiñe yomandancá icuamama. ²⁵ Y chë ndoñe judiënga Jesucristbeñe imojtsošbuachengbiamna, bënga ya fsënjubuábiamama y fsënjáuyana ndayá jtsocumplínama chënga yojtsamnama, mëntšá: ‘Ndoñe chamondëtsesá mëntšena, chë entsanga tmojtsejuabná diosënga imomna soyënga jadórama tmojiyëbana; ni buiñe, ni tsešana bayëngbe mëntšena; y ndoñe chamondëtsama bacna soyënga shembásenga y boyabásengaftaca ca’ ” —chënga tmojánayana.

Bëngbe Bëtsabe bëts yebnentše judiënga Pablo tmojánishache

²⁶ As Pablo, yëfsana chë cántanga tonjanënatse y chëngaftaca tonjanma soyënga Bëngbe Bëtsabe

delante tšábenga jtsatsmënama. Chentšana, Pablo Bëngbe Bëtsabe bëts yebnoye tonjánamashëngo chë bachnanga júnyama, ndayténtscoñe yojamna chë cantangbiamama soyënga jtsamama, Bëngbe Bëtsabe delante tšábenga jtsatsmënama, y jayanama ndayté chëngbiamama yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabiamama juatšëmbonama.

27 Chënga tmojanenoyeuná y tmojánayana canÿsëfta tentscuana chca jamana ca. Chë canÿsëfta te ya jochnënguama yojtsemna orna, básefta judiënga Asioquënga Pablo tmojáninÿe Bëngbe Bëtsabe bëts yebnoca y tmojanma entšanga chamuenbouénanama. Y cha tmojánishache, 28 mëntsá jtsayebuáchëse: “¡Israeloca entšanga, šmabétsëjabuache ca! Quem boyabása entsemna chë nÿets luarënguenache iuana abuátambaye soyënga bëngbe entšangbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnama ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashengo, y chca cha tonjama chë Bëngbe Bëtsabe bëts yebna Bëngbe Bëtsabe bominiñe ndoñe tšabá chaondëtsemnama ca” —chënga imojtsichamo.

29 Chca imojtsichamo, er entšanga Pablo tmojáninÿe chë bëts pueblentše Trófimo Efesocáftaca; y imojétsejuabnaye chábioye Bëngbe Bëtsabe bëts yebnoye Pablo tbojánánatse ca.

30 Nÿetsca chë pueblentša entšanga tmojánenbouenana, y ochamanana chë Pablo yojtsemnoye tmojánashajna. Pablo tmojánishache

y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame. ³¹ Jtsóbama ya imojtsebuachéta ora, chë Romoca soldadëngbe mandayá tojántatsëmbona nÿetsca chë bëts pueblentša entšanga imojtsenbouenanama. ³² Asna, chë mandayá chabe soldadënga y inÿe chentša amëndayënga tojánachembo y cánÿiñe chë entšanga imojtsemnoye tmojëftsanótjajo. Entšanga, chë mandayá y chë soldadëngbioye tmojánanÿe ora, tmojtsanajbaná Pablo jantšetayana.

³³ Chorna, chë soldadëngbe amëndayá tojanobconá, Páblëbioye tbojánishache y tojanmandá uta cadenëjuaca cha chamotsebátsëcama y tojanatjá: “¿Nda mua yomna y ndayá tojama ca?” ³⁴ Pero chë entšángbeñe, ínÿenga canÿe soye imojtsáyebuache y ínÿenga inÿe soye; y chca, ntšamo ndegombre tojanopasama jtsetatsëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. ³⁵ Chë soldadëngbe oyenoca grádasbengoye tmojánashajna ora, chë soldadënga tojanotocá Pablo cutsnana juambama, chë entšanga tša rábiaca imojtsemna causa, ³⁶ er chënga ústonoye imojétsaye y “¡Chaóbana ca!” imojtsaiuáyebuache.

Ntšamo Pablo entšangbe delante tojanenëuyaná

³⁷ Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama! ³⁸ As, ¿aca ndoñe condmëna chë Egiptocá, chë ndoñe bayté quenátsmëna entšanga yojanëtsëtsná chë mándayëngbe contra chamotsemnama y chë canta uaranga podesca uamana entšanga puñálaca uajatëngaftaca, entšanga ndoyena luaroye tojanbocná ca?

³⁹ Chora Pablo tbojanjuá: —Atše judío sëndmëna, Tarso puebloca onÿnaná, canÿe uámana pueblentše Cilicia luaroca; Diosmanda šmoleseñciá entšanga jáuyanama ca.

⁴⁰ As, chë soldadëngbe amëndayá chca tbojanlesenciá. Páblëna chë gradasbenguiñe tojantsá y cucuatše tojanatsbaná entšanga iytëca chamobiama. Nyetscanga iytëca imojtsemna orna, Pablo hebreo biyañe mëntsá entšanga tojanëyana:

22

¹ “Baconga y taitanga, mora šmochjouena atše jenëuyanama ntšamo chjayancá ca.”

² Pablo cachëngbe biyañe, hebreo biyañe yojtsóyebuambnama entšanga tmojanuena ora, más iytëca tmojanobiama. As Pablo tojanëyana:

³ “Atše judío sëndmëna. Tarso pueblentše, Cilicia luaroca sënjanonÿná, pero muentše Jerusalemntše sënjanoboché y sëndëtatšëmbo soyëngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nyets atšbe ainánaca Bëngbe Bëtsá sëndëserveda, ntšamo nyetsca tšëngaftanga mora šmontsamancá. ⁴ Atše sënjánama chë Jesucristo tojaninÿanÿé Benache

ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. ⁵ Chë judío bachnangbe más uámana amëndayá, nÿetsca chë judiëngbeñe bëtšëjemëngcá mándayënga y inÿe muentša mándayënga mondobena jayanana ntšamo sentsichamcá ndegombre yomnama. Chënga uabemana tsbuanachangá šmonjaniyé, bëngbe catšátanga judiënga chamotsetatšëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjána choca Jesucristbeñe ošbuáchiyënga jótabayama, moye Jerusalenoye junatsama jacastígayama.”

Pablo tojanacuntá ntšamo Jesucristbeñe ošbuachiyá tojanóbema (Hch 9.1-19; 26.12-18)

⁶ “Pero canÿe te benachiñe Damasco béconana sënjétsaye orna, mo nÿetsto ora, nÿe ndeolpe atšbe juachañe canÿe bëtš tcuinÿe celocana tonjanbuashinÿínÿena. ⁷ Y fshantsoye sënjétseshajaye y canÿe oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’ ⁸ Atše sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atše sëndmëna Jesús Nazaretocá, y aca condama atšbe entšanga chamotsesufrínama ca.’ ⁹ Chë átšeftaca monjánajnënga chë bëtš tcuinÿe tmojáninÿe y tmojanouatjananga, pero chë oyebuambnayana ndoñe tmonjanuena. ¹⁰ Chora atše sënjantjá: ‘¿Bëngbe Utabná, ndayá jamama šojtsemna ca?’ Y cha šonjaniyana: ‘Matëtsbaná y mëtëtontsé Damascoye jama.’”

Chentše canya cmochanjabuayená ndayá jamama cmojtsemnama ca.’ ¹¹ Chë tcuinýe yapa tonjanbuashinýínýena causa, atše jtaná sënjanoquedá. Chcasna, chë ínýenga šmontanobuacuetëntsé y chca, Damascoye sënjánashjango.

¹² “Chentše enjamna canýe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguiñe iuayancá, y nýetsca chentša judiënga monjanamana chabiamá tšabá jtsóyebuambnayana. ¹³ Cha tonjánabo atše jinýama y tonjánashjango ora, šonjaniyana: ‘Jesucristbeyeca atšbe catsata, Saulo, chacmotsatabinýna ca.’ Cachora y cha sënjáninýe.

¹⁴ “Chentšana cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiamá yobošcá chacotsetatsëmbuama, chë nýetsca soyënguiñe Tšabá Amá chacuinýama y cachabe uayásentšana chacóyeunama. ¹⁵ Bëngbe Bëtsá chca tojama, aca chë chabe buayenana soyëngama entšángbeñe chacóyebuambama, y chamna nýets luarentša entšángbeñe cochjacuénta, ntšamo tcojinýe y tcojouencá. ¹⁶ Y mora, jndoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnama ca’ ” —cha šonjaniyana.

Pablo tojanacuntá ntšamo chë ndoñe judiëngbiøye tmojánichmoma

¹⁷ “Jerusalenoye sëntaná ora, Bëngbe Bëtsabe bëts yebnoye sënjána cháftaca jencuéntama, y

ndeolpe atše mo otjenayoquēcá sēnjanoquedá.
 18 Chca orna, Bēngbe Utabná sēnjáninýe y cha mēntšá šonjaniyana: ‘Betsco motsa y cam ora Jerusalenentšana métsebočna; quemuentša entšanga ndoñe quecmochatóyeunaye ntšamo atšbiana condētatsēmbo y contsētsetsnacá ca.’ 19 Atše sēnjanjuá: ‘Bēngbe Utabná, chēnga mondētatsēmbo atše sēnjánana nýetsca chēngbe enefjuana yebnēnguenache y chē áceñe ošbuáchiyēnga sēnjanētámiana y sēnjánatsetsenaye; 20 y acbiana ndegombre oyebuambnaya Esteban tmonjanóba ora, átsnaca chentše sēnjamna y tšabá imojtsama ca chama sēnjétsejuabnaye, y cabá chē monjanóbanangbe entsáyējuangá atše chora sēnjanabojanyá ca’ —atše sēnjanjuá. 21 Pero chca sēnjánayana ora, Bēngbe Utabná šonjaniyana: ‘Motsa; atše bēn luarēngoye, ndoñe judiēngbioye cbochanjíchmuca.’ ”

Pablo y chē soldadēngbe amēndayá

22 Chē entšanga chēntscōñe tmojanuena; pero chē ndoñe judiēngbiama tojanoyebuambá orna, chēnga tmojanontsé uayebuáchana: “¡Ndoñe tšabá quenátsmēna cha vídaca chaotsemnama! ¡Motsóba ca!” 23 Y chēnga más imojtsáyebuache; puerte rábiaca chēngbe uichētjonējuangá tsbanánoye imojtsēbéntaye y tsbanánoye polvēshe imojtsētšana; 24 chē causa, chē mandayá tojánayana chē soldadēngbe oyenoye Pablo chamotsēmashēngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache. 25 Pero jtsetjanjama ya tmojanbatsēca orna,

chentše imojtsemna soldadëngbe amëndayábioye Pablo tbojantjá: —¿Tšëngaftanga šmobena canýe entšá derecho bomná mo canýa Romoca onýnanacá jatjanjana, ndegombre tšabá o ndoñe tšabá tonjamama cabá ndayana ora ca?

²⁶ Chë básefta soldadëngbe mandayá chë soye tojanuena ora, tojána y nýetsca soldadëngbe amëndayábioye chama ibojuenaye, mëntšá: — ¿Ndayá cochjama? Chë entšá derecho bomna mo canýa Romoca onýnanacá canmëna ca.

²⁷ As chë amëndayá tojána Pablo yojtsemnoye y tbojaniana: —Smëyana, ¿aca derecho bomná mo canýa Romoca onýnanacá comna ca?

Y cha tbojanjuá: —Arseñor ca.

²⁸ Chora chë amëndayá tojánayana: —Atše becá crocénana sënjëtšajó mo canýa Romoca onýnanacá derecho jtsebomnama ca.

As Pablo tbojanjuá: —Y atšna derecho bomná mo canýa Romoca onýnanacá sëndmëna atše tijañonýná orscana, er atšbe taitá chca derecho bomná inamna ca.

²⁹ Chcasna, chë jatjanjama imojtseprontanënga, Páblëbentšana tmojanojuaná; y chë mandayánaca tojanojuaná y yojsauatja, Pablo derecho bomná mo canýa Romoca onýnanacá yojamnana tojántatšëmbona ora, er cha tojanmandá Pablo chamotsebátsëcama.

Pablo, Jerusalenentša uámana mándayëngbe delante

³⁰ Chë soldadëngbe amëndayá yojtseboše ndegombre jtsetatšëmbuama ndaye soyama judiënga

Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nyetsca chë judiëngbe amëndayënga chamobéconama. Chentsana, Pablo tbojanábocna y chëngbe delante tbojanatsá.

23

¹ Chora Pablo, nyetsca chë mandayëngbioye tojanënyanýé y tojanëyana: —Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

² As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama. ³ Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtsjantšetá, bacna entšá, ntšamo ndegombre tcojuabnacá ndinýinýnaya! Aca chentše contsetbemana tšabá o ndoñe tšabá tijamama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chë leyiñe ndoñe quenátslesenciana ca.

⁴ As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uámana amëndayábioye cochjóyenguango ca?

⁵ Chora Pablo tojánayana: —Taitanga, atše ndoñe quetsátstatsëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrenguiñe mëntšá endayana: “Entšangbe mandayabe contra ndoñe catjayana ca.”

⁶ Pablo tojáninýe chë mándayënguëntšë báseftanga saduceunga y ínýengna fariseunga imojtsemnama; as, mëntšá tojanáyebuachena: — Taitanga, atšë fariseo sëndmëna; atšbe bëtsëtsanga fariseunga mondmëna. Atšë, jtsošbuáchiyëse chë obanënga mochtayenama tsobátmana causa, atšë ndoñe tšabá sëntsama ca tšëngaftanga šmochjayana ca.

⁷ Pablo chca tojánayana ora, chë fariseunga y saduceunga tmojanontšé enatsëtsnayana, y chë causa nyetsca entšanga ndoñe cachcá imontsejuabnaye. ⁸ Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aíñe chë soyënguñe jtsošbuáchiyana. ⁹ Y nyetscanga tša imojtsáyebuache; asna, básefta fariseunga ley abuatambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canýe ángel o espíritu muábioye ndegombre tbojauyana ca.”

¹⁰ Entšanga más imojtsáyebuache y chë soldadëngbe amëndayá yojtsauatja nderado entšanga Pablo muantsatcacaye; as, cha tojanmandá soldadënga chamua Pablo chë entšángbentšana jaisábocnama y chë soldadëngbe oyenoye cachiñe jesánatsama.

¹¹ Yëfsana íbeta, Bëngbe Utabná Páblëbioye tbojánëbëbocna y tbojaniyana: “Pablo, ainaniñe añemo cochtsebomna. Ntšamo aca atšbiamna condétatšëmbo y muentšë Jerusalemntšë condoyebuambnacá, cachcá cmontsemna Romoca jamama ca.”

Judiënga tmojanenoyeuná Pablo jtsóbama

¹² Chë inye yëfsana, judiënguentsana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana.

¹³ Chca jamama tmojanjuabó entsanga imojamna canta bnëtsanëngama más.

¹⁴ Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntsá tmojánayana: “Bënga Bëngbe Bëtsá mëntsá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofsiyana, Pablo jóbantscuana.

¹⁵ Morna, tšëngaftanga y chë inye muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

¹⁶ Pero, Páblëbe uabenbe uaquiñá chë soye tojántatšëmbona; asna, tojána chë soldadëngbe oyenoye, chama Pablo jauenayama. ¹⁷ Chorna, Pablo canye básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nyetsca soldadëngbe amëndayábioye; canye soye entsebomna chábioye juenayama ca.”

¹⁸ As, cha chë bobontse tbojëftsanbetše, chë nyetsca soldadëngbe amëndayábioye tbojanánatse y tbojaniyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebomna canye soye aca jauyanama ca.”

19 Chë soldadëngbe amëndayá chë bobóntsbiöye tbojëftsano buácu etëntsïye, luaroye tbojanánatse y tbojantjá: —¿Ndayá cojtse bomna atše jauyanama ca?

20 As chë bobontse tbojaniana: —Judiënga tmojenoye uná taitá jaimpádama, yëfse chëngbe amëndayëngbiöye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca.

21 Pero ndoñe catjóyaunaye; chënguentsana canta bnëtsanëngama más entsanga iytëmenënga Pablëbiana montsanýá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojaniana.

22 Chentsana, chë soldadëngbe amëndayá chë bobóntsbiöye tbojanmandá, ndayá ibojuenayama ndocnábeñe ntsecuéntayana, y chentsana tbojtanchimó.

Pablo tmojanánatse Félix, chë Cesareoca mandádbiöye

23 Chentsana, chë soldadëngbe amëndayá tojánachembo útata chë inýe soldadëngbiöye mándayënguentsana, y tojanamëndá chamoprontama uta patse soldadënga, inýe canýsëfta bnëtsanënga couayënguiñe y inýe uta patse lanzësangaca, Cesarea pueblöye ibeta, las nueve ora jabocanama; 24 y tojanamëndá couayënga chamoprontá Pablo chauenójayema.

Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye.

²⁵ Y canýe tsbuanácha chëngaftaca tojanichmó y chëchañe mëntsá yojtsábemana:

²⁶ Claudio Lisias, chë bëts uámana mandado Felixbiama: Salud bomná chacotsomñe.

²⁷ Judiënga quem boyabása tmojishache y montseboše jtsóbama; pero cha mo canýa Romoca onýnanacá derecho bomná yomnama sënjátatsëmbona ora, atšbe soldadëngaftaca sënjá y chëngbe cucuatšentsana cha sënjatsbocá.

²⁸ Atše sëntseboše jtsetatsëmbuana ndaye soyama chënga chabe contra imojtsichámuama; as, cha sënjuánatse nyetsca chë judiëngbe amëndayënga montsemnoye; ²⁹ y chentsana, atše sënjátatsëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamna, ni mo cárceloye jutámiam. ³⁰ Pero atše sënjátatsëmbona chë judiënga tmojenoyeuná cha jtsóbama; chíyeca, cam ora cha ácbioye sentsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

³¹ Chentsana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris puebloye tmojanánatse. ³² Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayiñe enjaquenënga Pábloftaca tmojána. ³³ Cesareoye chënga tmojánashjajna ora, chë tsbuanácha chë mandádbioye tmojanantšabuaché,

y Páblënaca chabe cucuatšiñe tmojánboshjona.
³⁴ As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatšëmbona ora, ³⁵ tbojaniyana: “Acbe contra ichámënga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanýama.

24

Ntšamo Pablo chë mandado Félixbe delante tojanenëuyaná

¹ Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentshana y canya entšanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

² Pablo tmojanábocna ora, Tértulo tojanontšé chabe contra jayanama y Félixbioye tbojaniyana: “Aslëpaye, taita mandado, ácbeyeca bënga natjëmbana fsëndoyena y aca puerta obiashjáchá cómnayeca ba tšabe soyënga quem luarentša entšangbiana yojtsebinýna. ³ Nýets tempo y nýetsquénache chë soyënga fsëndóyëngacañe, bëts uámana mandado, y bënga chama corente cbondetsechuaná. ⁴ Pero ndoñe yapa bën jatenbiamnayamna, Diosmanda ratotema šmotsoyauná. ⁵ Bënga fsëntsetatšëmbo quem boyabása entšanguentše entsemna mo bacna

shacuanca, nyets luarënguenache yojtsana y yojtsama chë judiënga nyetscanga cachca soye ndoñe chamondëtsejuabnama, y cha yojtsemna chë Nazaretocabe ustonëngbe uanatsaná. ⁶ Y tonjábošena jamama Bëngbe Bëtsabe bëts yebna, Bëngbe Bëtsabe bominyiñe ndoñe tšabá chaondëtsemnama; chíyeca bënga cha fsënjotbá. Bënga fsënjábošena chabiamana jayanana tšabá o ndoñe tšabá tonjamama, ntšamo bëngbe leyënguñe endayancá; ⁷ pero chë soldadëngbe amëndayá Lisias tonjontremeté y jabuachana bëngbe cucuatšentšana tbojtsánatseñe, ⁸ y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstsichámuama ca” —cha tojánayana.

⁹ Y chë judiënga chentše imojëtsemnëngna imojtsanichamo añe chca tojanopasá y lempe ndegombre yojtsemna ca.

¹⁰ Chentšana, chë mandado Páblëbioye tbojánëfatšëmbo chaóyebuambama; as Pablo tojánayana: “Atše sëndëtatšëmbo aca ba uatama comna muentša entsangbiamana tšabá o ndoñe tšabá tmonjamama ichamuá; chcasna, tondayama ntsauatjca y puerte oyejuayá acbe delante šcuenëuyaná. ¹¹ Ntšamo cach aca jtsetatšëmbuama contsobencá, cabá bnëtsana uta te entsemna atše Jerusalenoye sënjá, Bëngbe Bëtsá jadórama. ¹² Y quemënga ndoñe chešmátinýena nderado ndáftaca jabuachana enatsëtsnayıñe, ni entsanga chamuenbouénanama amiñe, Bëngbe

Bëtsabe bëts yebnoca, ni chëngbe enefjuana yebnënguenache, ni inÿe luarënguenache chë bëts pueblentše. ¹³ Quem entsanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca. ¹⁴ Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse ntšamo Bëngbe Bëtsá šonjaninÿanÿé benache yomncá; y quem entsanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nÿetsca chë Moisesbe leyinë y Bëngbe Bëtsabe juabna oyebuambnayëngbe uabemana librëšanguentša soyënguiñe sëndošbuaché; ¹⁵ y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nÿetsca entsanga, lempe tšabá amënga y chë ndoñe tšabá amëngnaca. ¹⁶ Chíyeca, atše nÿets tempo puerte tšabá sëndama, tondayama ntjatenócochinÿenama y atšbe ainana natjëmbana chaotsomñama, Bëngbe Bëtsabe delante y entsangbe delántnaca.

¹⁷ “Básefta uatama inÿe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnjëmënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama. ¹⁸ Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentše šmonjinÿena, pero ndoñe chešmátinÿena ni

ba entsángaftaca, ni enbouenaniñe. ¹⁹ Chë šmonjinÿenënga entsamna ácbioye jabana y acbe delante atšbe contra chamuayana, nderado ndayá tmojtsebomñese. ²⁰ O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tijobuáchjanguama chešmënjínÿena, atše castiganá jtsemnama šojtsemna ca chënga chamuayanama; ²¹ o nderado nántsemna chë atše chëngbentše sëntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’ ”

²² Félix bëtscá inatátšëmbo Bëngbe Utabná tojaninÿinÿé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanëyana: “Chë soldadëngbe amëndayá Lisias chaojáshjango ora, chanjayana ntšamo quem tšëngaftangbe sóyeca jamama ca.”

²³ Y chentša soldadëngbe amëndayábioye tbojanmandá Pablo jtsebojanÿama, pero nÿe utamená ndoñe chaondëtsemna ca; y tojanmandá, Páblëbe amiguënga jalesénciyana ntšamo tmojtsebošcá cha chamuauájabuachama.

²⁴ Chentšana baseftaytese, chë mandado Félix Cesareoye tojtanashjango, chabe shema Drusíaftaca, canÿe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canÿa nanjobenaye

Jesucristbeñe ošbuachiyá jtsemnama. ²⁵ Pero, nyetsca soyënguiñe tšabá jtsamama, cachá jenomándama jtsobenama y ntšamo tmojamama nyetsca entšangbiama Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojaniyana: “Mora, mata; luare quétstsebmna ora, cbochjachembo ca.”

²⁶ Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanóffajana cháftaca jencuéntama. ²⁷ Y chca uta uata tojanochnëngo; chentšana, Félix ya ndoñe más chë mandado yontsemna y chabe cuenta Porcio Festo mandadcá tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanboshjona.

25

Pablo Festbe delante

¹ Festo chë luaroye tojánashjango y unga tianoye, Cesarea pueblentšana Jerusalenoye cha tojána. ² Chocna, chë bachnangbe amëndayënga y chë más uámana judiënga Fëstbioye tmojána Páblëbe contra jayanama. ³ Y tmojanimpadá, mo chëngbiama canyë bëts pavor cuenta, cha chaomandá Pablo Jerusalenoye chamuánatsama. Chëngna imojétsejuabnaye Pablo benachiñe chamotsóbama. ⁴ Pero Festo tojanëyana, Páblëna Cesareoca utamená yojtsemna y baseftaytese cha choye jtama ca. ⁵ Y tojanëyana: “Chamna, tšëngaftangbe amëndayënga átšeftaca Cesareoye chamua y chë boyabása ndaye bëts

soye tojobuáchjanguase, choca chabe contra šmochjayana ca.”

⁶ Festo Jerusalemense posufta o bnětsana te más chěngaftaca tbojěftsanjétana y chentšana Cesareoye tojtaná. Yěfsana, cha tojanótbema chabe puestentše tribunaloca y tojanmandá Pablo choye chamuánatsama. ⁷ Pablo choye tojánashjango ora, Jerusalemocana tmojánashajna judiěnga tmojanobobeaconá y ba uabouana soyěnga chabe contra imojtsichamo, pero ni canye chě soyěngama tmonjanobená jinŷanŷiyana chca ndegombre bětsemnama.

⁸ Y Pablo, cachá jeněuyanama měntšá yojtsichamo: —Atše tondaye chiyatobuachjanguá, ni judiěngbe leyěngama, ni Běngbe Bětsabe běts yebnama, ni Romoca běts mandadbe contra ca.

⁹ Festo yojtseboše chě judiěngaftaca tšabá joquédama; as Páblěbioye tbojantjá: —¿Tacatjábošena Jerusalemoye jama, choca atše quem acbe soyama jayanama ca?

¹⁰ As Pablo tojánayana: —Atše sěntsemna chě Romoca běts mandado tojichamó aměndayěngbe delante y chěnga entsamna jayanama atše tšabá o ndoñe tšabá sěnjamama. Ntšamo ndegombre contsetatsěmbcá, judiěngbe contra atše ndocna bacna soye chiyatsma. ¹¹ Nderado atše ndaye běts soye tijobuachjanguá y chama atše jóbanama šojtsemněse, atše tondaye quichátayana atše ndoñe chayóbanama; pero atšbe contra montsichamo soyěngama tondaye ndegombre tontsemněse, ndocná queochatobenaye chěngbe cucuatšine atše jaboshjonana. Chíyeca, Diosmanda chě Romoca

bëts mandado cháuyana tšabá o ndoñe tšabá sënjama ca —Pablo tojánayana.

¹² As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábošenësna, chábioye cochjá ca.

Festo, Rey Agrípaftaca tbojanencuentá ntšamo Pábloftaca jamama

¹³ Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsëtsayama. ¹⁴ Bayté chata chentše tojanajétana; y chca, Festo chë réybioye tbojanencuentá Páblëbe soyama. Cha mëntšá tbojaniyana: —Muentše endmëna canye entšá, Pablo ca uabainá; Félix utamená tbonjëftseboshjona, atše mandadcá sënjontsé ora. ¹⁵ Jerusalemoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama. ¹⁶ Y atše sënjáuyana: “Chë romanënga ndoñe quematamana ndocnabiana jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenëuyanama cha chaobenama ca.” ¹⁷ Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puestentše tribunaloca sëntótbema y sënjamandá chë boyabása jobetšana. ¹⁸ Pero chabe contra ichámënga, ntšamo atše sëndanjuabnacá chënga mochjayanamna ni mo canye bëts soye chabe contra chemátayana, chënga jóyebuambayama

tonjóyentšbuache ora. ¹⁹ Chënga chabe contra montsichamo, nýe cachëngbe Dios ntšamo jadórana yomnana y canya Jesús ca uabainábiamá; cha tojanóbana, pero Pablo entsichamo cha ainá yotsomñe ca.

²⁰ “Chora atše ndoñe quetstétsetatšëmbo ntšamo chë soyiñe jamana; asna, Pablo sënjantjá Jerusalenoye jama tayojétseboše ca, choca atše jayanama tšabá o ndoñe tšabá cha tonjanmama. ²¹ Pero cha šonjaimpadá camuentše jaboshjonana, cach Romoca bëts uámana mandado chë soyama tojayanëntscuana ca. Chcasna, atše sënjamandá cha chamotsebojanýama, chë mandádbioye jíchmuama atše jobenayëntscuana ca” —Festo tbojançantá.

²² Chca tbojanencuentá ora, Agripa Féstbioye tbojaniana: —Atšnaca sëntseboše chë boyabása joyeunayama ca.

Y Festo tbojanjuá: —Cach yëfse oído chábioye cochanjabuájua ca.

²³ Chë yëfsana, Agripa y Berenice corente uachuanentše chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentša uámana taitanga. Chentšana Festo tojanmandá Pablo jobetšana; ²⁴ y chora cha tojánayana: “Rey Agripa y nýetsca taitanga bëngaftaca šmojtsemnënga: Chentše entsemna chë boyabása. Nýetsca judiënga chabe contra átšbentše montsabíchamo, Jerusalenoca y quem Cesarea puebléntšnaca, y nýa jtsayebuáchëse tša šmontseimpadana cha chaóbanama; ²⁵ pero atše sëntsejuabná

quem boyabása tondaye tonjama, jóbanama chabotsemnana ca. Y más, cachá šonjainpadá chë Romoça bëts uámana mandado César chabe soyama cháuyanama; chcasna, chca chanjama, chábioye cha chanjíchmuá. ²⁶ Pero atše, atšbe bëts uámana mandádbioye quem boyabásabiamá juábobemama ndocna serto soye quetsátsbomna causa, tšëngafangbe delante cha tijatsá, y masna, acbe delante, bëts rey Agripa; chca, lempe chacojatjá chentsana, ndayá juabemama atše chaitsebomnana. ²⁷ Er atše sëntsejuabná ndoñe corente juabnayabe soye yomna, canye utamená jíchmuana y ndayama chabe contra tmojsichámuama ndoñe lempe ntjuabemana ca” —cha tojánayana.

26

Pablo tojanontsé rey Agripbe delante jóyebuambayama

¹ Chentsana, Agripa Páblëbioye tbojanianana: —Jóyebuambayama contselesenciana, cach aca chacuenéuyanama ca.

As Pablo, chë réybioye jachuyama cucuatše tojanatsbaná y jenéuyanama tojanontsé mëntsá jayanama: ² —Atše ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atše jenéuyanama nÿetsca soyëngama ntšamo judiënga atšbe contra montsichámuama; ³ y más sëntsoyejuá, taitá conduábuatmama lempe ntšamo judiënga monduamancá y condëtatšëmbo chë judiënga

ndayama imuenoboyebuambnama. Chcasna, Diosmanda uantádoca šmotsoyeuná.

Pablo tojanacuntá ntšamo cha tempo inam-nama

⁴ “Nýetsca judiënga mondétatsëmbo ntšamo atše tempscana chëngbeñe tsiyenama, bobontse sënjamna orscana, atše sënjanonýná luarentše y Jerusalementše. ⁵ Chëngnaca mondétatsëmbo y montsobena jayanana, chënga tmojtsebošëse, chca ndegombre yomnama; atše nýets tempo fariseucá vida sëndbomna, y chë fariseunga mondoyena más soyënga jtsamëse chë judiëngbe leyëngaca chë inýe judiëngbiamá. ⁶ Y mora, ntšamo Bëngbe Bëtsá bëngbe bëts taitanga tojanašebuachenacá, chë obanënga jtayenama cha yochjamama puerte jtsošbuáchiyëse atše obatmana causa, šmojuánatse atšbe contra jayanama. ⁷ Bëngbe bnëtsana uta Israeloca bëts pamíllanga mondobátmana chë šbuachenana soye chëngbiamá chaóshjanguama y chíyeca, cada te bnëtë y ibeta chënga Bëngbe Bëtsá mondadorana y mondëservena. Y atše cach soyama obatmana causa, bëts rey Agripa, judiënga mora atšbe contra montsabíchamo. ⁸ ¿Ndáyeca tšëngaftanga judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

Pablo tojanacuntá, ntšamo tempo cha Jesu-crístbeñe ošbuáchiyënga yojanaborlánama

⁹ “Y cach átšnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente

chamosufrima, ¹⁰ y chca Jerusalenentše atše sēnjanma. Chē bachnangbe amēndayēnga mando šmonjanatšetá, y chca, banga Jesucristbeñe ošbuáchiyēnga cárceloye sēnjanētame; y jtsēbáyama ca chēngbiamama montsanichamo ora, átšnaca aíñe chca chamoma ca sēnjánichamo. ¹¹ Y ba soye, chē judiēngbe enefjuana yebnēnguenache jabuache chēnga sēnjanatsetšená, chēnga Jesucristo ústonana chamotsajbanama, y chēngaftaca tša etonaná sēnjétsemna causa, chē inye luarēngoca bēts pueblēnguenáchnaca chēnga sēnjanēcamena.”

*Pablo tojanacuntá ntšamo cha Jesucristbeñe ošbuachiyá tojanóbema
(Hch 9.1-19; 22.6-16)*

¹² “Y cachcá jamama canye te Damascoye sēnjétsaye; chē bachnangbe amēndayēnga uabemanēchangá šmonjanēntšabuaché chca jamama y, cachēnga choye šmonjanichmó. ¹³ Pero, uámana rey, chē benachējana mo njetsto ora, sēnjáninye canye bēts tcuinye celocana, shinýama corente más enjétsebinýnaye, y atše y chē átseftaca ajnēngbe shēconana corente enjétsebuashinýinýana. ¹⁴ Nýetscanga fsēnjánshajaye y atše sēnjanuena canye oyebuambnayana, hebreo biyañe, mēntšá šonjétsatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmēche niñēfjiñe cha tojtsoscunjná orcá, cachá jenótsetšenana ca.’ ¹⁵ As atše sēnjánayana: ‘¿Nda comna, Bēngbe Utabná ca?’ Y chē Utabná šonjanjuá: ‘Atše sēndmēna Jesús, y aca condama atšbe

entsanga chamosufrima ca. ¹⁶ Pero matëtsbaná y matëtsá. Atše cbonjébëbocna jinÿinÿiyama aca tchojuábuayanama atše šcochjasérviamama, y chacotsetatšëmbuama y entsanga chacuacuntama, mora tconjinÿe soyama y más chcoye atšbiamama cbochanjinÿinÿiye soyëngámnaca. ¹⁷ Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná, ¹⁸ chënga atšbe soyëngama josértama aca chacomama. Chca, chënga bacna juabnënga ndoñe chamondëtsebomna, mo ibetiñe cuaftsemnëngcá, sinó mo binÿniñcá chamotsemna átšeftaca, atše chë entsangbe juabnënga binÿnayá. Satanasbe cucuatšifne ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebomnama canÿe luare entsángaftaca, chë ndëmuanÿengbioye Bëngbe Bëtsá tšabe entsanga y chabe entsanga tojábiamama, chënga átšbeñe betsošbuáchiyama ca’ ” —cha šonjanियana.

Pablo tojanma ntšamo chë mo otjenayoquëcá tojaninÿcá

¹⁹ “Chcasna, bëts rey Agripa, atše sënjanma chë mo otjenayoquëcá sënjáninÿe ora ntšamo Cristo šonjanियancá; ²⁰ y natsana, Damascoca entsanga chë tšabe noticiëngama sënjanabuayená; chentšana, Jerusalenoquënga y nÿetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngmënaca chamuatenójuaboma, chca amana

chamujbaná y Bëngbe Bëtsabe benache chámuatishachama, y soyënga chamotsama jinÿinÿiyama chca ndegombre tmojanmama. ²¹ Chca sënjánama causa, judiënga Bëngbe Bëtsabe bëts yebnocá šmonjanishache y tmonjánbošena atše jtsóbana. ²² Pero Bëngbe Bëtsá sempre šonduájabuachana, y chca, cada te mëntscoñama, nÿetscanga Bëngbe Bëtsabiamá sëndabuayiná, uámanëngbioye y nduámanëngbioynaca; nÿe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inÿetšá ndoñe. ²³ Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nÿetscanga chábeñe tmojtsošbuáchenga atsebácanënga mochtsemnama ca.’ ”

Pablo tojanma rey Agrípbioye jáyëñjanama, Jesucrístbeñe ošbuachiyá chaóbemama

²⁴ Pablo, cachá jenëuyanama chë soyënga tojánayana ora, Festo mëntšá tojanáyebuachena: —¡Pablo, opá cojtsóbema! Yapa ualíaye causa, opá tcojtsóbema ca.

²⁵ Pero Pablo tbojanjuá: —Opá ndoñe quetsásmëna, bëts uámana Festo; inÿetšá entsemna; atše sëntsoyebuambná nÿets juábnaca, y ndegombre soyënga. ²⁶ Chentše rey Agripa entsuenana, y cha puerte tšabá chë soyëngama endëtatšëmbo, chíyeca, tondayama ntjatauatjca,

atše chabe delante sëntsoyebuambná; atše corente sëndétatsëmbo chánaca chë soyëngama yotatsëmbuama, er ndayá Jesús tojanmá, ndoñe tonjopasá ndaye iytémena chaboye. ²⁷ Bëts rey Agripa, ¿Bëngbe Bëtsabe juabna oyebuambnayënga tmojánayana soyënguiñe aca quecošbuaché? Atše sëntsetatsëmbo aíñe chiñe cošbuáchema ca —Pablo tbojaniyana.

²⁸ Chora Agripa tbojanjuá: —Batšatema más y maščjayëñaná Jesucristbe ustoná atše jóbemama ca.

²⁹ As Pablo tojánayana: —Nye batšatema más o bëts cama más, atše Bëngbe Bëtsá sëntseimpadana, ndoñe nye bëndatbe barie, sinó nyetscanga chë mora šmojsuenanënga, atšcá Cristbe ústonënga chašmobiamama, pero utámenënga ndoñe chamondëtsemna, ntšamo mora atše sëntsemncá ca.

³⁰ Chorna, chë rey, chë mandado, Berenice y chë chëngaftaca imojantbiámanënga tmojantsbaná, ³¹ y luaroye tmojána chë soyama jencuéntama. Mëntšá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmëna ca.

³² Y Agripa Féstbioye tbojaniyana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

27

Roma bëts puebloye Pablo tmojanichmó

¹ Italia ca uabaina luaroye Pablo jíchmuama tmojanenoyeuná ora, atše, quem librëša uabi-amnayá, cháftaca sënjána. Chora Pablo y chë

inÿe utámenënga Julio ca uabainabe cucuatshiñe tmonjánabashejuana. Julio enjamna canÿa chë Romoca bëts mandadbe soldadënguentša mandayá. ² Asna, fsënjánašëngo canÿe Adramitio puebloca barcuñe; ya chë Asioca bëts publëngoye juama enjétsamna. Cesarea pueblentšana fsënjánbocna y Aristárnaca bëngaftaca enjétsamna; cha enjamna Tesalónica bëts pueblócá, Macedonia luaroca.

³ Chë inÿe yëfsana, Sidón puebloye fsënjánashjajna. Chentše Julio, tšabá mandbomná Pábloftaca enjétsamna; tbonjanlesenciá chabe amiguëngbioye chauabuáchama, chënga chamofjama y chamóbocuedama. ⁴ Sidonocana fsënjéftsanbocnentšana, bëngbe contra corente enjétsabinÿiaye. Chíyeca, Chipre fshantsënga catšbioicajana, ndoñe yapa quentétsebinÿiayëjana bënga fsënjána. ⁵ Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

⁶ Chë soldadëngbe amëndayá, canÿe Alejandría puebloca barco chentše tonjáninÿena, Italia luaroye yojétsaye; asna, šonjanamëndá chë barcuñe jenójajiyana. ⁷ Baseftaytentscuana uenana fsënjánana y pordonto fsënjánobená Gnido pueblentša ndirichiñe jashjanguana. Cabá bëngbe contra enjétsabinÿiaye causa, Salmón luarëjana fsënjánachnëjna, Creta fshantsënga béconana, ndoñe yapa quentétsebinÿiayëjana. ⁸ Y chca, pordonto bejaycá fsënjánana, fshantsënga béconana; chentšana, canÿe pueblo, Tšabe Puertënga ca uabáinentše fsënjánashjajna, Lasea ca uabaina pueblo béconana.

9 Chca, bayté tonjanochñengo y chora chë bejaycá jama puerte resjo enjésemna, er ya chë judiënga bayënga jobáyama te tonjanochñengo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjétsobeco.

10 Chíyeca Pablo chë entsanga mëntsá tonjanabuayená: “Baconga, atse šontsinÿana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiamama cach ndoñe, mo nderado muanjanóbana ca.”

11 Pero chë soldadëngbe amëndayá Páblëbioye ndoñe ntjoyeunayana; más, chë barcuentsa mandayá y chë barco nduíñbioye aíñe. 12 Ndoñe tšabá yonjamna, chë barco chora enjétsemnentse chë uaftena tempëntscuana jëftsemnana; chë causa, nÿa mo nÿetscanga tmonjanenoyeuná cachiñe bejaycá chentšana játama, nderado cuanjobenaye Fenice puebioye jashjanguama y chentse jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinÿe endbetsenatjëmbambana juachoica tsjuanoicajana y tsmanoicajana.

Mar béjayiñe puerte uaftena y binÿia tojanóshjango

13 Chentšana tonjanontsé tsmanoicana batšá binÿiayana, chíyeca chë entsanga tmonjanjuabó ya yojtsanopodena jtëtóntsana jama ca. As, chentšana fsënjëftsanbocna y bejaycá fsënjána, Creta fshantsënga beconanëjana. 14 Pero

baseftayté chentšana, chë fshantsëngocana tonjanontsé corente jabuache binÿiayana y chë barquëshoye enjétsoshjajuana. Chë binÿia yojanabaina Nordeste binÿia ca. ¹⁵ Chë barcna nÿe chë bínÿiëbe ponto tonjanontsé uayana; chë binÿia enjétsobayëjana jama ndoñe quentétsopodena causa, šonjanotocá nÿe ntšamo tojtsebinÿiayá chašúyambama. ¹⁶ Chentšana fsënjánachnëjna Cauda ca uabaina stëtšoicajana, base fshantsënga mar béjayoca; chiñe ya ndoñe tša jabuache quentétsëbinÿiaye y pordonto fsënjánobená buyeshoicana jtabocnana chë barco enjanasjá canouše, ndoñe chaondëtsóndbemama. ¹⁷ Ya chë barquëshoye fsëntanëšëngo orna, chë entsanga lazéjangaca chë barquëshasha tmontsanabatsécaca, más uamorochësha chaotsamnana. Pero chënga monjétsauatja nderado chë barco chë Sirte ca uabaina cascajuentše nanjetsánjua; asna, chë barcuentsa ancla tmonjanashëbéútsena, chë barco ndoñe betscó chaondëtsábonjnana, y ntšamo enjetsanbinÿiaycá fsënjána. ¹⁸ Chë inÿe yëfsana y chë binÿiayana cabá jabuache enjétsëmna causa, chënga tmonjanontsé chë barcuentsa uasmanëshangá jtsëshbuétsëtšana; ¹⁹ y unga tianoye bëgnaca šonjanotocá, cach bëngbe cucuátšeca, chë barcuentsa soyënga buyeshoye jtsëtšanana. ²⁰ Baytentscuana bënga ndoñe chibiatanobená jinÿana ni shinÿe, ni estrellatëmënga, tša tonjétsëibetata causa; y tša jabuache enjétsëbinÿiaye causa, bënga ya ndoñe quefstétsanobatmana chentšana jótsbocana.

²¹ Ya bayté enjétsëmna y chëntscuana tondaye

saná ntjascá fsënjétsemna. Chentšana, Pablo bëngbe tsëntsaca tonjantsá y tonjánayana: “Baconga, tšabá manjamna atše mašmënjanoyeuná y Creta luarocana ndoñe matmënjëftsanbocna; chca mora ndoñe mal mamojtsepasá y ndoñe nÿa nÿetsá matmënjobuetše. ²² Pero mora ngmënaca ndoñe matsmëñëngana; masque chë barco echantsenatjëmbe, tšëngaftanguentsá ndocná queochatóbana. ²³ Ibeta canÿe ángel šonjébëbocna; Bëngbe Bëtsá, ndabia atše sëndmëna y nda sëndëserveda, cha tbojichmó; ²⁴ y chë ángel mëntsá šonjauyana: ‘Pablo, ndoñe matauatjana; entseyta aca chë Romoca bëts mandádbioye chacotsama, y aca Bëngbe Bëtsábia cómnayeca, nÿetsca quem barcuñe ajnënga jobanámentšana cha echanjatsebacá ca.’ ²⁵ Chcasna, baconga, ndoñe matauatjëngana, er atše Bëngbe Bëtsábeñe corente sëntsošbuaché y lempe ntšamo chë ángel šonjauyancá echanjóbocna. ²⁶ Pero mora entseyta canÿe fshantse mar bėjaiñe chašúshejanguama ca” —cha tonjanéyana.

²⁷ Canÿe ibeta, uta semana fsënjánana chentšana chë Adriático ca uabaina mar bėjaiñe fsënjétsemna, y nÿe inÿoye y inÿoye chë binÿia šonjétsëyambaye. Y mo tsëntseto yojétsemna orna, chë barcuentsa trabájayënga tmojanjuabó ya fshantse béconana imojétsemna ca. ²⁸ As chënga tmonjanmedidá ntsachetšá chë búyeshe buatjoye inamnama y tonjanóbocna unga bnëtsana y chnënguana metro; más chcoye cachiñe tmonjanmedidá y uta bnëtsana canÿsëfta metro tonjanóbocna. ²⁹ Chënga monjétsauatja nderado

bëts ndëtsbéngaca nanjetsántšëtjiama; asna, chë barco stëtšoicajana canta ancla buyeshoye tmonjanashëbëútsena, chë barco ndoñe más chaondëtsábonjnama, y tša monjëtsebošë betesco chaobínÿnama. ³⁰ Chëntscuana, chë barcuentsä trabájayënga tmojánbošëna chentšana jtsachetana; chamna, chënga tmojanontšë chë canoušë buyeshoye justjanguana, pero chca imojétsama, mo chë anlënga chë barco natsanoica cuaftsëstjajuancá. ³¹ Pero Pablo chë soye tojáninÿe, y chë soldadëngbe amëndayábioye y chë soldadëngbioye tonjanená y mëntsá tonjanëyana: “Chë barcuentsä trabájayënga cach quem barcuentsë ndoñe chamonjoquedase, tšëngaftanga ndoñe quešmochatobenaye muentšana jótsbocama ca.”

³² As, chë soldadënga tmonjána y chë canoušentsä lazëjënga tmontsantëtsetšë y buyeshoye chëse tmontsantsatšë.

³³ Enjëtsebinÿana ora, Pablo nÿetscanga tonjanaimpadá ndayánaca chamosëngama, mëntsá jáuyanëse: “Ya uta semana entsemna y tšëngaftanga ni mo batšatema chešmatamaná, y tondaye chešmatsbmuananga. ³⁴ Diosmanda, masque nÿe mo batšatëmnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

³⁵ Pablo, chca tonjánayanentsana, canÿe tandëse tonjanca y nÿetscangbe delante Bëngbe Bëtsábioye tbontanchuá. Chorna, tonjanjatá y tonjanontšë jasama. ³⁶ Chentšana nÿetscanga tmonjanenñémó y chëngnaca tmonjanse. ³⁷ (Chë

barcuentše nÿetscanga fsënjamna uta patse y canÿsëfta bnëtsana y chnënguanënga.) ³⁸ Ntšamo imnabošcá tmonjansentšana, buyeshoye trigo tmontsanashaná, chca, chë barco ndoñe yapa chaondëtsautama.

Chë barco tojtsanenatjëm̄ba

³⁹ Ya tonjanbinÿna ora, chë barcuentša trabájayënga ndoñe quemëntétsetatsëm̄bo ndaye fshantse chentše bétsemnama, pero tmonjáninÿe chë fshantsentše canÿe luare jachañe, chë bėjaye chë luaroye omashjuanentše, y chiñe canÿe chënÿañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana. ⁴⁰ Asna, chë anclentša lazëjënga tmontsantëtsetše y chë anclënga buyeshoye tmontsanboshjuana, y chë timón, chë barco juyambama oservena soyentša uabatsëcnëjëngnaca tmontsanjafjoná. Chorna, chë barcuentša natsanoica niñësiñe entsëjua tsbanánoye tmontanëšëngo, y chë binÿia tonjanma chë barco chaontšé chë chënÿoye juabéconama. ⁴¹ Pero chë barco canÿe luaroye tonjánashjango, y chentše chë bėjaye catatoicajana enjetsobuá y chë barco cánÿentše, bëtscá cascajo buyeshiñe binÿnentše tontsananjó. Chë barcuentša natsanoica lado chë cascajuiñe entsanajuena, ndócnoye juabónjuama ntsopodencá, y chë stëtšoica lado puerte entsanashatiyiyná y lempe entsanandbiamná, yapa binÿia causa y búyeshe chentše enjétsojantšetaye causa.

⁴² Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe

chamondétsachetama. ⁴³ Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tojanmandá nyetscanga chë jachbabama obenëngna natsana chë buyeshoye joshbuetšana tsachoye chamuashjanguama, ⁴⁴ y chë ínÿengna tablëshënguiñe o chë barcuentša pedazënguiñe chamoshbuetšama. Y chca, nyetscanga fsënjanobená tšabá y ndocá ntjapasacá fshantsoye jashjanguama.

28

Pablo Malta luaroca

¹ Ya nyetscanga fshantsoca tšabá fsënjétsemna ora; fsënjántatsëmbona chë luare Malta ca yojanabaina. ² Chë luarentša entsanga bëngaftaca corente tšabá mándbomnënga monjétsemna; canÿe íñeshe tmonjanangbotjó y šonjanëbuaja choca bënga jatóšboniyama, er tša enjétsaftena y yapa enjétsesësna. ³ Pablo tojanatbaná básefta buashana chamesëfjënga y chë íñeshoye enjétseshacjnaye ora, canÿe mëtšcuaye tojánbocna y enjetsachaye, chentše yapa obonÿaye causa, y Páblëbe cucuatšíñe tontsanonjonjá. ⁴ Chë luarentša entsanga, chë mëtšcuaye Páblëbe cucuatšíñe yojtsajonÿanama tmonjáninÿe ora, monjétsenatsëtsnaye: “Quem boyabása ndegombre inÿa obanayá cuanmëna; mar béjayoca jobanámentšana tojotsbocá, pero chca uamana causa, diosá Justicia ndoñe quebnatsleséncia cha vida chaotsebomnama ca.”

⁵ Pero Pablo tontsanenacuestëtoná y íñeshoye chë mëtšcuaye tbontsantsatše y Pablo ndocá

chenatanpasá. ⁶ Chë entšanga imojétsejuabnaye chábioye bochtsacuefshachá y nýe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninýe ora, ya ndoñe cachcá quemëntétsanjuabnaye y tmonjanontsé ichámuana Pablo canýe díos inamna ca.

⁷ Chentša béconana inamna chë luarentša mandayabe fshantsënga. Cha šonjanëbuaja y corente tšabá šonjanacuedá, unga tentscuana. Chë taitana Publio ca inauabaina. ⁸ Chë tempo, Públiëbe taitá šocá jutsnëshañe inajájona, calentóraca y buiñeca buamachnëjuanánaca. Pablo tonjána cha jinýama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanajó, y chca, cha shnaná enjétsatsmëna. ⁹ Chca tonjanopasá chentšana, chë luarentša inýe šoquënga Páblëbioye monjánajna y cha enjánashnaye. ¹⁰ Bëtscá tšabe soyënga chentše bëngbiamá tmonjanma, y cachiñe játama ya chë barcuñe fsëntanenojayenga orna, lempe ntšamo bejaycá jama šonjanëjabotcá chënga šonjanatšatá.

Pablo Romoye tojánashjango

¹¹ Chë fshantsentše mar béjayoca unga ishinýe fsënjëftsemna, y chentšana canýe Alejandriocana yojanabá barcuñe fsënjanenojayé; chë barco nýets uaftena tempo chë luarentše yojëftsamna y enjanabaina Cástor y Pólux ca, mo chë romanëngbe uta diosata catšatcá. ¹² Chentšana, Siracusa bëts puebloye fsënjánashjajna y chentše unga te fsënjëftsemna; ¹³ y chentšana fshantse béconana bejaycá fsënjána, Regio puebloye

jashjanguentscuana. Yěfsana, tsmanoicana tsjuanoye enjětsebinýiaye, y chca, chë inýe yěfsana Puteoli puebloye fsěnjánashjajna. ¹⁴ Chentše básefta Jesucristbeñe ošbuáchiyěnga fsěnjánanýena, y šonjaněbuaja chěngaftaca canýe semana chentše jěftsajétanama; y chentšana Romoye fsěnjěftsanbocna. ¹⁵ Romoca Jesucristbeñe ošbuáchiyěnga ya imojětsetatšěmbo běnga choye fchjanashjajnama; chcasna, chěnga tmonjánbocna běnga jajébenguama canýe luare Foro del Apio y Unga Taberněnga ca uabainóntskoñe. Pablo chěnga tonjánanýe ora, Běngbe Bětsá tbontanchuá y puerte añémoca enjětsemna. ¹⁶ Romoye fsěnjánashjajna ora, soldaděngbe aměndayá Páblěbioye tbonjalesenciá cányabe yebnentše chaotsiyenama, y tonjanmandá canýe soldado chabotsebojanýama.

Ndayá Pablo Romoca tojanma

¹⁷ Choye fsěnjánashjajnentšana unga tianoye, Pablo tonjanmandá chentše imnoyena judiěnga más uámaněnga chamobéconama; y nýetscanga ya tmojánenefjna ora, cha tojaněyana: —Catšátanga judiěnga, masque atše tondaye chiyatsma běnga judiěnga mondbětsama soyěngama contra, ni běngbe běts taitanga imojanamana soyěngama contra, judiěnga Jerusalenoca šmonjanishache y romaněngbe cucuatšiñe šmonjánboshjona. ¹⁸ Chë romaněnga lempe šmonjantjá chentšana, monjětseboše atše jětsboshjonana, er ndocna bacna soye chemátaninýena atše jóbanama chašotsemnama. ¹⁹ Pero chë judiěnga ndoñe quemtětseboše atše chašmuatsboshjonama;

chíyeca, šonjanotocá jáimpadana cach Romoca bêts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entšanga, judiëngbe contra jayanama. ²⁰ Chíyeca, atše tcbonjúbuaja jányama y jáuyanama, er ndayama chë Israeloca entšanga puerte jtsošbuáchiyëse mondobátmanama, chë obanënga mochtayenama, atše mora utamená séntsemna ca —tojanéyana.

²¹ Chora chënga tmojanियana: —Bënga ni mo canyë tsbuanácha Judeocana fchiyatáyëngaca acbiamá noticiëngaca, y ni canyë catsata judío, chocana moye ashjajnënguentšá, ndocna bacna soye acbiamá chešnatacuntá. ²² Bënga fsëntseboše jouenana ntšamo aca cojuabnama, er ntšamo Jesucristbe ustonëngbiamá fstsëtatšëmbcá, entsemna ana nyëts luarenache chëngbe contra entšanga imojtsichamo ca.

²³ Asna, canyë tescama Pablo tmojanियana chca chaotsemnama; y chë tena, ba entšanga chë Pablo posada inabomnoye tmojanobeconá. Y cachëscana tojanjéтанëntscuana, Pablo entšanga yojanëtsëtsná Bëngbe Bëtsabe amëndayama, ndayama cha ininyë y inatátsëmbo; y yojtsentšena chënga jáyëñjanama Jesúsbeñe chamotsošbuáchema, Moisesbe leyënguentša soyëngaca y Bëngbe Bëtsabe juabna oyebuambnayëngbe uabemana librëšangañe soyëngaca. ²⁴ Báseftanga aíñe imojtsošbuáchiye ntšamo Pablo yojtsanëtsëtsnacá ndegombre bëtsemnama, pero ín्यengna ndoñe. ²⁵ Nyëtscanga ndoñe cachcá montsanjuabnaye causa,

tmojanontsé chentšana jésebocanana. As Pablo tojanéyana: “Nýets razónaca chë Uámana Espíritu tšëngaftangbe taitanga tojanéyana, Bëngbe Bëtsabe juabna oyebuambnayá Isaíasbiajana, mëntšá:

²⁶ Motsa chë entsanga jauyanama:

‘Bëtsá šmochantsuenana, pero tondaye quec-
mochátësertana;
tša šmochantsafšna, pero tondaye
quešmochátinýe.

²⁷ Muentša entsanga ainánaca josértama ndoñe
quemátsboše causa,

chënga nduauenanënga montsemna y
nduabinýnëgnaca;

chënga bomínýeca ndoñe chamondobená jinýama,
ni chëngbe matscuašeca jouenama,

ni chëngbe ainánaca josértama ndoñe chamon-
dobená,

chca, atšbe benache ndoñe chamondishachama,
atše ndoñe ntjátsebacama ca.’ ”

²⁸ Pablo chora mëntšá tojanéyana: “Ndegombre šmochtsetátšëmbo, cach quem Bëngbe Bëtsabe buayenana soyënga entsanga bacna soyënguentsana játsebacama, chë ndoñe judiëngbioye mochanjábuayenaye, y ndegombre chënga cocayé aíñe mochanjóyeunaye ca.” ²⁹ (Pablo chca tojánayana ora, chë judiënga chentšana imojésebocana y tša imojtsenatsëtnaye.)

³⁰ Pablo uta uata chentše tonjanoquedá canýe uántšamena yebnentše; y nýetscanga cha jauatsëtsayama monjánajnënga cha enjanëbuájajana. ³¹ Nýetscangbe delante puerte añémoca entsanga enjanabuayiyná Bëngbe Bëtsabe amëndayama, y enjanabuatambá soyënga

Bëngbe Utabná Jesucristbiamá, y ndocna Romoca
mandayá quebënjatanauyá chca jtsamama.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files
dated 29 Jan 2022
19104c0e-9046-5ff3-82fb-eb838c88dcf9